

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laititi ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomina e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.
2. O Mataupu o Tusi Aoga Aso Sa ma Autalavou 2022, ua maua lea i le upega Tafailagi (website) a le EFKS; www.cccs.org.ws. Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefona 24340, po o le e-meli-extneduc@cccs.org.ws.

3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesootai mai lo tatou Ofisa i tuatasi o i luga, pe lafo mai i le Pusa meli 163, Apia.
6. Ua saunia le Tusi Aoga mo le Vasega Matutua 2022, e le susuga ia Peteru Seiuli FS, Ietitaia Solipo FS, Semikueva Su'a FS, Isamaeli Aula'i FS, Satala Sa'u FS. Farani Pauga FS, Apelu Lelevaga FS, Vaegatootoo Magele FS, Panapa Alafau FS, Keresoma Seuala AM, Faalefu Tumutalie AM, Falealii Afamasaga AM, Oli Levi AM, Luulau Taulagi AM ma Tavita Pulu AM.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Maseifua Taniesu
(Faatonu A'oa'oga Kerisiano)

FAASOLOGA MATAUPU VASEGA MATUTUA

2022

ASO SA MATAUPU TUSI FAITAU

IANUARI:

30 Se vaega o le foafoaga
(Aso Sa o Tupulaga) Ieremia 10: 11 – 13

FEPUARI:

6 Ia fuga mai le toafa Iopu 29: 21 – 23
13 Ua faoa e Iakopo le tofi
o Esau Kenese 27: 1 – 27
20 Valaau le Atua – Sola Iona Iona 1: 1 – 6
27 O le maota o lo’u Tamā Luka 2: 41 - 52

MATI:

6 O le Atua e afio ifo Luka 9: 37 – 50
13 O’otia ona o le agasala Esoto 32: 19 – 35
20 Atuatuvaale ma le loto Faataoto 12: 23 – 28
27 E lē o se mea malie Kenese 18: 1 – 15

APERILA:

3 O le savali o le ola Luka 18: 31 – 19: 10
10 E oo mai lava le upu
(Aso Sa o le Laupama) Luka 21: 29 – 22: 6
17 E lē o le malosi Roma 6: 1 – 14
24 O meaola uma a le Atua Kenese 1: 20 – 25

ME:

1 O lagomeli Faamasino 14: 8 – 14
8 Molimau ma le lotogatasi
(Aso Sa o Tinā) Fa’aaliga 1: 1 – 3
15 Ala manumalo mo le Ekalesia Fa’aaliga 12: 1 – 17
22 Faafouina o le lalolagi Salamo 124: 24 – 30
29 Ua tumu le lalolagi i laei
o le Atua Isaia 6: 1 – 5

IUNI:

5 Faatalitali Galuega 2: 1 – 13
12 O le Ekalesia o tagata Roma 16: 1 – 16
19 Fa’aaliga o le Atua Esekielu 1: 1 – 14
26 Faatinoina o tiute tauave Esekielu 18: 1 – 17

IULAI:

3 O le atamai e lei mafaufauina
mai le tagata ese Faamasino 13: 2 – 20
10 O a’u o se leoleo o lo’u uso? Kenese 4: 1 – 16
17 Malosi i totonu o le vaivai 2 Korinito 12: 1 – 10
24 Sapasapaia e agelu Mareko 1: 12 – 13
31 Ua faia sami Kenese 1: 6 – 9

AOKUSO:

7 O le Faatuatua o le Seila Saslamo 107: 23 – 30
14 Faatauva meaa uma
(Aso Sa o Tamā) Failauga 1: 1 – 15
21 Avea ma tagata Failauga 6: 1 – 12
28 Fanau mai ma le tauiviga
o le a i ai. Kenese 25: 19 – 28

SETEMA:

4	Luitau malosi (Aso Sa Talalelei)	Luka 12: 1 – 21
11	Upu o le Ola	Luka 15: 1 – 10
18	O le mamanu (1)	Mareko 10: 41 – 45
25	Faatumauina le alofa o le tasi i le isi	1 Peteru 4: 8 – 11

OKETOPA:

2	Ua taumafai Atonia ina ia avea o ia ma tupu	1 Tupu 1: 1 – 18
9	LOTU TAMAITI	
16	Fa'aaliga o le Filemu	Isaia 2: 1 – 5
23	Tofia mo malo	Ieremia 1: 4 – 10
30	Na valaau e aveva ma Tagata Paia	1 Korinoto 1: 1 – 19

NOVEMA:

6	Tulafono po o le faiā?	1 Korinoto 7: 1 – 9
13	O le tino e tasi	1 Korinoto 12: 12 – 31
20	O le feagaiga felanulanua'i	Kenese 9: 8 – 17
27	Ia fausia se nofoaga o Sulufaiga	Esoto 24: 15 – 25: 9

TESEMA:

4	Mai le fale'ie i le fale tele	2 Samuelu 7: 1 – 17
11	O le a afio mai le Alii i lona Malumalu	Malaki 3: 1 – 4
18	O lou auai faalaua'itele	Galuega 2: 37 – 47
25	O le Atua ua ia i tatou i o tatou tuā'oi ma tua atu	Mataio 1: 18 - 25

ASO SA: 30 IANUARI 2022

MATAUPU: SE VAEGA O LE FOAFOAGA
(A part of Creation)

SINI: Ia a’oa’o tamaiti ia latou iloa ma malamalama, o mea uma lava i le lagi i lugā, po o le lalolagi i lalo nei le tagata ma le atulaulau, o mea o le foafoaga a le Atua.

TUSI FAITAU: Ieremia 10: 11 – 13

FESOASOANI MO FAIAOGA:

Sei muamua ona tatou talatala laitiiti le tusi, ina ia faigofie ona fesootai i la tatou mataupu o lenei Aso Sa. O le ulutala o le mataupu atoa, Ieremia 10: 1 – 25 o faapea mai, “*E silisili ese le Alii, ae faatauvaa tupua.*” O le mafaufauga aoao tetele lena o taoto i le mataupu atoa. O le faamanatu i le tagata, o mea uma lava e aofia ai ma le tagata ma mea o ia fausia (tupua) o mea o le foafoaga a le Atua, e pei ona tusia i le Kenese 1: 1.

Ae o le vaega tonu o agai i ai la tatou mataupu o lenei Aso Sa, Ieremia 10: 11 – 13; O lo o toe faamanatu mai ai le Fofoaga atoa a le Atua i le amataga. “O le Atua na faia le lalolagi i lona mana, o lona poto foi o tumau ai le atulaulau, ma lona faautauta sa ia fofola ai le lalolagi o i ai nei, f (12).” Le Atua sa ia fofoa, ma silasila atu i mea uma sa ia fofoa, ua lelei ma atoatoa. Le fofoaga lea o fa’aalia mai e le lagi, ma talatala faatasi mai ai ma le mamalu o le Atua, atoa ma le ofoofogia o mea sa ia faia, (Salamo 19: 1 (ff)). Ae o le f. 13, o faamatala mai ai e le Tusitala, se vaega o le fofoaga a le Atua, e tusa o la tatou mataupu o lenei taeao; Ae maise i le uila, le timu ma le matagi, i taimi e omai faatasi ai. O uila tatou te vaaia i tafā lagi pe a emo mai, ma matagi malolosi e omai faatasi ma le timu, o fa’aalia ai galuega mamana a le Atua fofoa. E foliga sauā ma faaleaga mea matagi malolosi i nisi taimi, ma tupu ai le atuatuvaale i le tagata. Peitai, afai o mea uma na fofoa ma silasila i ai le Atua ua lelei, e le o i ai foi la se taumate i le faamoemoe tāua

na faia ai. Po o le a le malolosi o matagi, tatou te to’afilemu lava ma fiafia, pe afai o mausali o tatou fale, ma mautu o latou faavae, e tusa foi o tulafono o fausia ai ia mea. E ala ona fefe ma atuatuvaale, o le oo mai o le matagi, a’o faasamasamanoa lava ma faatamala. O le faamanatu tāua lea o le mataupu o lenei taeao. Ola i ala o le Atua, po o le a le malolosi o matagi ma afā e oo mai, Tatou te le vaaia o ni faigatā, ma ni puapuaga,; ae o fa’aalia ai lona mamalu i mea o lana fofoaga. O matagi malolosi foi faamanatu maia i le tagata, le mafai, le poto, ma le faautauta o le Atua fofoa. O lo tatou iloa mautinoa o le Atua i totonu o vaega ia o lana Fofoaga, o le tupu malosi foi lena o lo tatou faatuatua ia te Ia.

Fanau, ola i ala o le Atua ma tumau i le faatuatua ia te Ia, ina ia mafai ona outou iloa o Ia ma lona mamalu Silisiliese, mai totonu o faigata o tou fetaiiai, auā o se vaega lava o lana Fofoaga. O le Fofoaga foi na faia e Iesu e ala i le Taulaga sa ia osia, e mo le saolotoga o tagata mai le agasala o pologa ma fefe ai.

Uiga o Upu ma Fuaitau:

i)	f (11) fano	-	faaumatia/oti
ii)	f (12) mana	-	malosi lilo
iii)	f (13) ausa	-	asu/o le puao
	ua	-	timu

GALUEGA FAATINO:

Taliga Fesili (Faitau le Tusi Paia, ma mātau lelei le uiga o upu ma faaupuga, ona tali mai lea o fesili o i lalo)

1. O le f (11), “Ia faapea ona outou fai atu ia te i latou.” O ai o faasino i ai le upu “latou”?

Tali: Tagata uma o ifo i tupua ma le tumau i le Atua Soifua.

2. O le f (12); O ai na faia ia mea o taua i le f.12?

Tali: O le Atua fofoa.

3. O le f (13) – O le a le taimi tonu o tautala i ai le fuaiupu lea?
Tali: Taimi o le loulouā o le tau, tetele timuga, emo le uila, ma matagi malolosi po o le Taimi o afā

PESE: 224

A’OA’OGA:

1. Aua le atuatuavale i taimi o afā.
2. E tofotofoina le faatuatua i faigata.
3. O faigatā, o se vaega lava o le Fofofoaga.

.....

ASO SA: 6 FEPUARI 2022

MATAUPU: **IA FUGA MAI LE TOAFA**
(The Desrt shall bloom)

SINI: Ia a’oa’o tamaiti ia latou iloa, ma malamalama lelei; O le Upu a le Atua, o le ua lava lea e ola ma fua tele mai ai le tagata ua matelāina.

TUSI FAITAU: Iopu 29: 21 – 23

FESOASOANI MO FAIAOGA:

O le Iopu 29: 1 – 17, e pei se talaaga o le siosiomaga sa ola ai Iopu i le taimi ua tea. O se olaga sa mafanafana ma maualuga le fesoataiga ma le Atua. Sa tausī e le Atua, ma maua e le aunoa lona malosī i le talutalufou o le ola. Sa tele ana lafu-manu ma malie lē galala i le suasusu; sa fua tele lona laueleele, e le’i mativa i le suau’u e tafe mai e pei o vaitafe; O lana fanau ma le tele o faamanuiaga. Sa fa’aaloogia ma avea ma alii-sili i tagata, O lana upu foi sa le’i avemāmāina e tagata o le nuu. Sa fesoasoani i tagata matitiva, matua oti, ma i latou e le taualoa. Alofa i fafine ua oti a

latou tane, matitiva, ma le tagata ese o moomia se lavea’iina mai le faamasinoga. O se auiliiliga o le olaga o Iopu, tatou te lei iloa tele i le amataga, auā o faamanuiaga e le nao manuia faa-le-tino, ma le faaeaina i le tulaga lautele ae o tutusa ma le taua o lona faia lea o mea lelei i tagata, e ese mai le tu’uaiga a Elifasa o taua i le Mataupu 22: 6 – 9.

Tulaga la ia o lona saogālemū, ma lona mautū, toe fa’aaloogia i le sosaiete, lea e pei ua toe ta-aofai mai le f 18 – 29; Ma le 29: 21 – 23, o faatatau tonu i ai la tatou mataupu o lenei taeao. A faitau lelei lava la i le f 22 – 23; E foliga o upu o le lauga a Iopu, e le gata ina mālīe i tagata, a’e lei toe gagana i ai se isi, sa faatalitali ia Iopu, e pei o la e faatalitali le suā-timu, po le ua; ma o latou fofoga o faamatalatala ane e tali le vai, e ola ma malilie ai mai iā te ia.

E le o sesē le tulaga fiafia i le taunuuga lelei, na mafai ai e Iopu ona tali atu i tu’uaiga a ana uō. Ae o le vāivāiga e tasi o iloa mai le lauga a Iopu, o le matautia lea o le lagona mimita, po o le lagona ifo, o ia lava! O le mimita e tau faa-sesē, pe a faia e le tagata le sa’o. na te vavaese foi le tagata mai le Atua, ma palasi atu ai ie tele o isi sēsē (agasala) e tele. Ae le leaga le toe manatua o tualumaga o le tuanai; *Ae silisili ai ona lelei le toe manatua e le tagata, o le anoanoai o faamanuiaga a le Atua mo ia.* O le iloa lelei e le tama ma le teine o faamanuiaga e mai le Atua, o le lavea’iina foi lenā e oe mai le mimita; ma saga fua atili mai ai pea le ola gaogaoī, i le talitonu ma le faatuatua i le Atua. O le mea lava lenei ia iloa lelei e tagata uma ma mautinoa, E leai lava se Amiotonu e tasi, e faatusalia i le Atua; Roma 3: 10. O Iesu, o le Upu a leAtua, e totogi ma fuga mai ai o tatou olaga naumati ma le soata, e ala i le faatuatua, i le Taulaga o le faaolataga na Ia faia.

GALUEGA FAATINO:

Tusiga a le tagata poto, e āva, ma e le mimita foi!

Toe tusi lelei mai fuaiupu e tolu o la tatou tusi faitau,, (f 21 – 23) i le gagana ma le tusiga e iloa ai o oe o le tagata e pei ona tā’ua i luga, ae le o oe o Iopu.

- Fesoasoani lau susuga i le faiaoga, e toe faaupu le tusiga o le Galuega faatino, ina ia malamalama le vasega, i le uiga o le tusiga, e fa'aaloalo ma faamaulalo i luma o le Atua.

PESE: 137 “Le faaola e, ua ou sau nei.”

A’OA’OGA:

1. O le Upu mana a le Atua, e fua lelei ai lo tatou ola.
2. Ia iloa e le tagata, o mea uma lava e ou le Atua lea.
3. Aua le mimita i mea ua e maua.

.....

ASO SA: 13 FEPUARI 2022

MATAUPU: UA FAOA E IAKOPO LE TOFI O ESAU
(*Jacob steals Esau’s birth right*)

SINI: Ia a’oa’o tamaiti ia latou iloa ma malamalama lelei, o le faoa e Iakopo o le tofi o Esau, o le faataunuaina lava lea o le Folafolaga a le Atua.

TUSI FAITAU: Kenese 27: 1 – 27

FESOASOANI MO FAIAOGA:

O le tusi sa faitauina o la tatou mataupu mo le aso, o le tala ua tatou masani ai, e uiga i le faoa e Iakopo o le tofi o le ulumatua mai ia Esau, atoa ma faamanuiaga sa fuafua e le tamā o Isaako, e faamanuia ai i lona atalii matua o Esau, ua maua uma e Iakopo. O lo o manino lelei lava le tala a Kenese i le mea na tupu; o atagia i le tala, o Iakopo ma lona tinā o Repeka, e foliga o tagata leaga ia. Ae afai e leaga i la tatou mātau faa-le-tagata; O le fesili – “Aisea, na le faasaoina ai e le Atua, pe afai e sēsē? Afai foi ua olegia ma

faavalea e Iakopo lona tamā o Isaako, o lona uiga; “O lea lava e talia e le Atua le tulaga lea?” O le tāua lea o la tatou mataupu o lenei taeao; O se mataupu e foliga o atagia mai ai se mea e le sa’o; ua lagalaga ai le tele o manatu, e saili ai le mea moni ma sa’o. o lea felavasa’i solo o lagona ma mafauauga eseese i le mea ua tupu; O lo o vavala mai ai lava le mea moni. E le suia e le manatu o le tagata, le mea ua uma ona folafola e le Atua. Sa folafola e le Atua ia Aperaamo i le tele o taimi, faamanuiaga mo lona aiga, lona nuu ma le lalolagi e ala mai i lana fanau (Kenese 22: 16 – 18) O le sailiga o se avā a Isaako, o lo o i ai isi aiaiga e tele mo le fa’auauina o nei folafolaga a le Atua, (Kenese 24: 2 – 3); atoa ma le fananau mai o tama, (Kenese 25: 23 – 26b). O atagia iinei i le vaai faa-mataupu silisili, - E feseuai, pe pulea e Iakopo Esau. O le faaiuga o le Mataupu e 26: 24 – 25, o aliali mai ai le solia e Esau o le isi vaega o le tautoga a Aperaamo, le tamā o lona tamā, e ‘aua le faiava i nuu o Kanana. O le Mataupu la sa faitauina, e pei o se alafua e mafai ona tupu i le tele o aiga, i le tulaga o le fai tama faapito o le isi i le isi, po o le amanaia foi o le matua, ona o ia o le alii o aiga. O le tulaga foi i le tau faasēsē, ma le se’e ese o faamanuiaga, o lo o i ai lava i le tulaga fese’etai e le lautasi. Auā o le mea na faia e Iakopo i lona tamā o Isaako, na faia foi e Lapana ia te ia. O le faamanuiaga foi na ia faoa mai ia Esau, na ia toe taumafai lava e faafoi, ina ua la toe fetai ai ma lona uso. E pei ona fai atu o taaina lava ia o le lalolagi o tatou i ai, ae le mafai e le lalolagi ma ona manatu, ona suia le filifliga ma le mea o finagalo ai le Atua. O Iesu foi le Alo o le Atua, na asamo i ai le lalolagi agasala ina ia fai mo latou, ma latou maua ai le faamanuiaga o le Ola e faavavau, e ala i le faatuatua ia te Ia.

Uiga o Upu ma Fuaitau:

- i) f (1) puaoa - nenefu/le manino
- ii) f (3) utu ma le aufana- o le utu e pei o se ato e tuu ai fulu-āū, po o ū, a o le aufana, o le aupega lea e pei o se afa-masina (halfmoon). O le laau

- iii) f (9) fagaga - ma le pa'u memei malosi, e fana ai le fulu-āū. o le vaega o le fanua e fafaga ai manu (puaa, oti, po o povi foi)
- iv) f (12) faaoleole - tagata tau faasēsē/tagata tau faavalea
- v) f (12) fetu'u - faamalaia

GALUEGA FAATINO:

Fa'aaliga o Mafaufauga: Tusi mai sina parakalafa laitiiti, e faailoa mai ai sou taofi e uiga i le mea tonu e tatau na i ai. Ua e faitau i le tala, o le a foi sou lagona i le mea ua tupu ma le finagalo o le Atua.

- Fesoasoani lau susuga i le faiaoga, e ala i sou finagalo fa'aalia, e fesoasoani ai i le vasega.

PESE: 146 (Po ua e mau tofi i le malo nei?)

A'OA'OGA:

1. O le filifiliga a le Atua, e le fuaina i se manao o le tagata.
2. 'Aua le fai-tama faapito.
3. Ia e ava i lou tamā.
4. Aua e te pepelo.

.....

ASO SA: 20 FEPUARI 2022

MATAUPU: VALAAU LE ATUA - SOLA IONA
(*God calls – Jonah flees*)

SINI: Ia malamalama le vasega, valaaau le Atua ia Iona e momoli lona finagalo i Nineva le aai tele, ae tulai ua sola i Tasesa.

TUSI FAITAU: Iona 1: 1 – 6

FESOASOANI MO FAIAOGA:

O le tusi a le Perofeta o Iona, o le tala lava i le alofa mutimuti vale o le Atua i ona tagata i le lalolagi. O le faaeaea ma le amanaiaina o lana tofiga o Iona lana Pefeota, na Ia valaauiina ai o ia, e tulai ia ma alu i Nineva le aai tele, ma alaga atu i ai, aua ua oo mai a latou agasala i ona luma. Peitai, ua tulai Iona ma sola i Tasesa i luma o le Atua.

O le igoa o Iona, o le faailoga o le lupe, o le igoa ua tatau mo Perofeta uma ua filifilia e le Atua mo lona finagalo. O Perofeta uma lava a le Atua, e tatau ona le ponā ma maua le loto nuti momoia, ma le alofa mutimutivale i tagata agasala.

O Iona o lona tamā o Amitai, o lona uiga o le moni ma le faamaoni. E tatau ai i Perofeta a le Atua ona fai i latou ma atalii o le moni ma le faamaoni o le Atua. O le afioga ma le upu a le Atua, ua oo mai ia Iona, e moni lava ma le faamaoni. O le Upu e alu atu ma le mana, e le foi fua mai. E foi mai lava, ina ua faaolaina tagata uma, latou te talia, ae fano lava i latou e teena.

O Nineva i lea taimi, o le laumua lea o le malo o Asuria, e tele ina tupuga mai ai auga tupu o le malo o Asuria. O le agasala a le tupu ma tagata o Nineva o lo latou le iloa lea o le Atua Soifua, o le na faia le lagi ma le lalolagi ma mea uma o i ai. Ua avea le tamaoiga ma le paoa ua latou maua, ua latou faamaualuluga ai, ma faamoemoe ai i ia mea, e fai ai le mea e loto i ai. Ua le gata ina latou agasala, a ua latou faia isi tagata ma tagata agasala. Ua tumu le fua a le Atua, ua tutusa ai i latou ma tagata o Sotoma (Kenese 18: 20 & 21) Ua matautia i le silasila mai a le Atua.

Ua manatu alofa ai le Atua, ua tatau ona faailoa ia Nineva le mata'utia o lo latou ola agasala ua i ai. E le toe fia silasila lava le Atua i ona tagata o faaumatia ona o le ola agasala. Ua finagalo ai le Atua, e lelei ona faailoa i le tupu ma tagata o Nineva, ua oo atu i

ona luma le mata'utia o a latou agasala. Afai lava latou te salamo, ma foi mai i le Atua, ua faaolaina, a e a leai ua faaumatia i latou. O le afuaga lea o le afioga a le Atua ia Iona, "Ina tulai ia, ina alu i Nineva le aai tele, ma alaga i ai, ua oo mai a latou agasala i ou luma. Ua ese mai le valaauina o Iona mai isi Perofeta. O isi Perofeta ua valaauina e ave le feau a o Iona, ua poloaiina, ia tulai ma alaga atu le feau a le Atua i tagata o Nineva. Ua le tala'iina, a ia alaga leo tele, ia lagona e tagata uma le afioga a le Atua, auā ua faanoanoa o Ia ia latou amio mataga ma le ola agasala ua latou faia. O le mafuaaga lea na sola ai Iona i Tasesa. Auā ua fefe Iona e lamatia lona ola, ona o ia lava e alu e alaga i tagata o Nineva.

E le gata i lea, ua iloa lelei e Iona le Natura o le Atua, o le alofa mutimutivale lava o Ia. Afai ae alu e alaga atu ia Nineva, ua silafia e le Atua a latou agasala, ona salamō ai lea o i latou, e mautinoa lava e faamagaloina a latou agasala ma faaolaina i latou. I le manatu o Iona ia faaumatia Nineva, auā o le nuu ese, ua na o Isaraelu lava, le nuu filifilia ma tagata o le Atua. Fai mai le tatou mataupu, Valaau le Atua – sola Iona.

O le valaau a le Atua, e fia faailoa lona alofa mutimutivale, ina ia lavea'iina ona tagata mai le agasala, e tatau ai ia Iona ona maua le alofa mutimutivale o le Atua, e alofa ai i isi tagata ma faaolaina ai, ae le o le tula'i ma sola 'ese. Ia manatua e lē mafai lava ona sola 'ese, pe lafi se tagata mai le silafaga a le Atua, e pei ona fai mai le Salamo 139: 7. Ou te alu ea ifea ai lou Agaga? Ou te sola ifea ai ou luma?

O le feau lea ma le a'oa'oga lea o le tatou matapu i lenei taeao. O le finagalo o le Atua mo i tatou, ia tatou usitai i le Atua, ma faailoa atu le alofa mutimuti vale o le Atua i tagata uma.

O Iesu Keriso le Alo o le Atua, ua ia faailoa mai le alofa mutimutivale o le Atua ia i tatou, ua faaolaina i tatou mai le faafanoga o le mata'utia o le agasala.

Uiga o Upu ma Fuaitau:

- i) Tasesa - o le aai e i Kilikia i Asia Itiiti
- ii) Nineva - o le laumua o Asuria
- iii) Iopa - o le aai e i ai le uafu o vaa

GALUEGA FAATINO:

Faitau le tala, ona e tusi mai lea o ni mafuaaga se lua na ala ai ona sola Iona i Tasesa.

PESE: 126 (Pese ma Viiga)

A'OA'OGA:

1. Valaau le Atua, ia faalogo ma usitai.
2. Ia e alofa i tagata ua saisaitia i le agasala.
3. 'Aua le faia le agasala.

.....

ASO SA : 27 FEPUARI 2022

MATAUPU : O LE MAOTA O LO'U TAMA
(*My Father's House*)

SINI : Ia malamalama le vasega, o le maota o lo'u Tamā, o lo o faatatau i le malumalu i Ieruselema, o lo o fetalai Iesu, o le maota o lona Tamā.

TUSI FAITAU: Luka 2: 41 – 52

FESOASOANI MO FAIAOGA:

Fai mai le tusi a 1 Tupu 9: 3. Ua fetalai mai le Alii ia Solomona, "ua ou faalogo i lau tatalo ma lau aioi na e aioi mai i ou luma, ua ou faapaiaina lenei fale ua e faia e tuu ai lo'u igoa e faavavau e faasaga i ai o'u mata ma lo'u loto i aso uma."

Fai mai le tatou tusi faitau i lenei taeao, ua o i Ieruselema Iosefa ma Maria i lea tausaga ma lea tausaga i le tausamiga o le paseka. Ina ua atoa le sefulu ma le lua o tausaga o Iesu ona o ae lea o i latou i Ieruselema, e tusa ma le tausamiga o le paseka.

Peitai, e i ai le mea na tupu, ua mae'a aso o le tausamiga o le paseka, ona toe foi ai lea o i laua i Nasareta, a o Iesu ua nofo pea o ia i Ierusalem. O le manatu o Iosefa ma Maria, o loo i ai Iesu i le latou malaga toe foi, a o loo i ai faatasi ma isi o la auaiga. Ina ua po tasi i le ala, ona la iloa ai lea, e le o i ai Iesu faatasi ma la'ua. Ua la saili atu i o la aiga e le o i ai o ia.

Ona la toe foi ai lea i Ierusalem, e saili o Ia. Ua mavae aso e tolu ona la maua ai lea o ia i le malumalu, o nofo i totonu o le au a'oa'o, o loo faalogologo ma tau fesili ia te i latou. Ua matua ofo uma lava e na faalogologo ia te ia i lona poto ma ana upu e tali.

O le tagata na faia e le Atua i lona faatusa, ia maua le ola tapuai i le Agaga e tasi, ina ia tonu ma sao mea e fai i aso uma. Ua sefulu ma le lua ona tausaga o le taimi e tapena ai lona olaga, ina ia maua le Agaga e tasi e fesootai ai ma le Atua. Ia oo atu i le sefulu ma le tolu tausaga, ua fai ma talavou e ola ma mata'u i le Atua.

Ua saili mai e Iosefa ma Maria ia Iesu, ma ua maua atu o ia i le malumalu o nofo i totonu o le au a'oa'o, o loo faalogologo ia te i latou ma tau fesili ia te i latou. Ua matua ofo lava e na faalogo ia te ia i lona poto ma ana upu e tali. Ua la ofo ina ua iloa atu o ia e i laua.

Peitai, e lei aveesea ai lo la tiga i le la sailiga o Iesu, ma lo la atuavale. Ua fai atu ai Maria lona tina ia te ia, "La'u tama e, se a le mea ua e faapea mai ai ia te i maua? Faauta, o i ma'ua ma lou tamā sa ma saili lava ia te oe ma le tiga." Ona fai atu lea o ia i a te i la'ua, "Se a ea le mea na oulua saili mai ai ia te au? Lua te le iloa ea e tatau ona ou i le fale o lo'u Tama?"

O le fetalaiga lea a Iesu i lona tina o Maria, ua ia faamanatu atu ai, le afio ifo o le Atua ia te Ia, e ala i le agelu – Luka 1:30-32. A o le fetalaiga foi lea a Iesu, na toe faamanatu ai ia Maria, le feagaiga a le Atua ma le tupu o Solomona ina ua faaulufaleina le malumalu i Ierusalem. O lea o loo tomua ai, le faamatalaina o le tatou mataupu o lenei Aso Sa.

O le fetalaiga foi lea a Iesu, na ia toe fetalai ai ia i latou o loo faia faafetauaiga i le malumalu i Ierusalem – Ioane 2:16. O le uluai tausamiga lea o le paseka ua auai atu i ai Iesu, auā o lea ua atoa lona sefulu ma le lua o ona tausaga. O le avanoa ua maua e Iesu e ulufale ai i le malumalu i Ierusalem. O le fale na fetalai ai le Atua i

le tupu o Solomona ua ou faapaiaina lenei fale ua e faia e tuu ai lou goa e faavavau, e faasaga i ai o'u mata ma lo'u loto i aso uma.

Ua naunau Iesu ia ulufale i le malumalu o le fale o lona Tamā, e maua ai le la mafutaga, aua ua i ai lona suafa e faavavau, e faasaga ai ona fofoga ma lona finagalo i aso uma.

O le malumalu, o le fale e maua ai le poto ma le atamai. O le siosiomaga e maua ai le loto mama, le ola usitai, le ola faapaiaina ma maua ai le loto fuatia ifo lelei. O le fale foi e lava saunia ai ma lava tapena ai le tagata mo lana savaliga faalefaatuatua i lenei lalolagi o puapuaga.

O le feau lea a le tamaititi o Iesu mo i tatou uma tamaiti, ia fai le malumalu ma fale o lo tatou Tamā o i le lagi, tatou te fiafia e ulufale soo i ai, ina ia lava saunia i tatou e lona Agaga Paia, e tetea atu i faaososoga a le tiapolo.

O Iesu Keriso, o le fale lava o lona Tamā na lava tapenaina ai o ia, na atoatoa ai lo tatou faaolataga e ala i lona maliu ma lona ToeTu mamalu mai le oti ma le tuugamau. Ia manuia le Aso Sa.

Uiga o Upu ma Fuaitau:

- i) Paseka - o le tausamiga e faamanatu ai le o 'ese o Isaraelu mai le pologa i Aikupito, e ala i aao fai vavega o le Atua.
- ii) Saili ma le tiga - sue ma le loto mafatia
- iii) Fale o lo'u Tama - O le malumalu i Ierusalem.

GALUEGA FAATINO:

Ua tele lava faasalalaua ua tatou faalogo i ai. Ua faailoa lautele mai ai tamaiti le iloa.

Ta'u mai ni mafuaaga se tolu ua e iloa e ala ai ona le iloa nei tamaiti.

PESE: Sau ta o ma a'u, i le maota o lo'u Tama.

A’OA’OGA:

1. Ia fiafia e alu i le falesa.
2. Ia toaga e fesili i ou matua i mea o le Tusi Paia.
3. O Iesu Keriso o lo tatou faaitaiga sili.

.....

ASO SA : **06 MATI 2022**

MATAUPU : **O LE ATUA E AFIO IFO**
(*A God who comes down*)

SINI : Ia malamalama le vasega, o le Atua e afio ifo e faailoa mai o Ia lava o le Atua, e afio ifo e feiloai ma ona tagata, e aumai lona alofa mutimutivale, e laveai i o tatou tiga, ma faatupu le faamoemoe ola i loto ma agaga.

TUSI FAITAU: Luka 9: 37 – 50

FESOASOANI MO FAIAOGA:

O le Atua e afio ifo, e le o se mea fou. Na uluai afio ifo lava le Atua i le amataga o lana foafoaga ma tuu le tagata i le faatoaga i Etena e galue ai. Na afio ifo le Atua ina ua agasala Atamu ma Eva. Na afio ifo le Atua ia Mose i le mauga o Sinai, ma tuuina ia Mose papa maa o tulafono, ona alu ifo ai lea o Mose ma tulafono, ma tuu atu i tagata Isaraelu e ola ai.

O le tatou mataupu i lenei taeao, ua maluu ifo Iesu i le mauga, ina ua maea ona liliuina ona fofoga ma ona laei, ao tautala ma Ia, o Mose ma Elia, ua latou fetautalatala’ai i lona maluu o le a faataunuuna i Ierusalem, ua oo mai foi le siufofoga mai le ao ua faapea mai, O lo’u Atalii lena, o lē ua filifilia, ia outopu faalogo i ai.

O le maluu ifo la o Iesu i le mauga, o le Atua lava lea na afio ifo. Aua foi o Iesu o le Atalii pele e to’atasi o le Atua, ua maluu mai i lona tino tagata, ina ia faaolaina le lalolagi agasala ia te Ia.

Ina ua maluu ifo Iesu ai le mauga, ona fetaiiai lea ma Ia o le motu o tagata e toatele. Faauta foi ua alaga mai le tasi nai le motu o tagata, le aoao e, ou te aioi atu ia te oe, e te silasila mai i lo’u atalii e toatasi. Ua pulea e le agaga leaga ma le temoni. Ua le mafai e ou auso’o ona faamalolo ia te ia. Ona fetalai atu lea o Iesu i ona so’o, Le tupulaga le faatuatua ma faapiopio, ou te i ai ia te outou, ma onosai ia te outou se’ia afea? Ina aumai ia lou atalii iinei. O lo o sau ia ae lafotu ma faatafiti ia te ia e le temoni. Ona vavao lea e Iesu o le agaga leaga, ma ua faamalolo i le tama, ma toe tuu atu ia te ia I lona tamā. Ua matua ofo uma i le mana mamalu o le Atua.

Ua fa’aalia le le fiafia o Iesu i ona ausoo, aua ua leai so latou faatuatua, ma leai se lagona talitonu moni i lana galuega faaola. Ua manaomia ai e tagata lona auai, ao lei oo mai le mana ma le mamamlu o le Atua faaola. Ona tauina atu lea e Iesu lana fetalaiiga, ina latou matua faalogo i ai, e luitauina ai lo latou ola mulimuli mai ia te Ia. Aua o le a tuuina atu le Atalii o le tagata i lima o tagata. A ua latou le iloa lea upu, ua lilo ia te i latou, o lea na latou le lagona ai. Aua o le Atua ua afio ifo, ua liutino tagata, e ala ia Iesu Keriso o lona Alo pele e toatasi, ia faaolaina le lalolagi agasala ia te Ia. Faimai le tusitala o le tusi a Luka, ua leai se lagona filifiliga o le ausoo, e mafaufau loloto i le uiga o lea fetalaiiga a Iesu, ma lona afio ifo e faaola le lalolagi agasala.

E lua ni mea na tutupu i le auso’o ua faailoa mai ai mea o lo o faatauaina i o latou loto.

Muamua, ua latou fefinau ai po o ai o latou e sili. Ua silafia e Iesu, ona tago lea o ia i le tamaititi ua faatu i o latou luma. Ona fetalai atu lea, o le tagata e maua le loto maualalo, e na te taliaina ai lenei tamaititi, ua na talia o a’u ma lo’u Tama. Afai e i ai i tagata lea ituaiga loto maualalo, latou te le tau fesili foi po o ai e sili.

Lona lua, fai mai Ioane le isi so’o o Iesu. Le Alii e, na matou iloa le tasi na ia tulia temoni i lou suafa ona matou vavao lea ia te ia, aua

ua le mulimuli mai ia i tatou. A ua fetalai atu Iesu, aua tou te vaioa, aua o le le au ese ia te outou, e au faatasi lea ma outou. O le finagalo o le Atua e afio ifo, ia fai tagata uma ma perofeta. Ia latou iloa ona ola mafuta i le Atua.

O le tatou mataupu la i lenei taeao, ia tatou iloa la o le Atua e afio ifo, e faaola i tatou mai le agasala ina ia mafai ona tatou maua le ola solo lelei i aso uma o lenei olaga tumu i puapuaga ma faigata, ma ia tatou maua le alofa mutimutivale o le Atua, tatou te alolofa ai i isi o tatou tagata.

O Iesu Keriso, o le Atua e afio ifo ina ia tatou maua le faaolataga a le Atua e ala i lona maliu ma lona toetu mamalu.

Uiga o Upu ma Fuaitau:

- i) faatafiti - ta'avalevale, tauivi mo se filemu
- ii) tui fulifuli - tafiti ma ta'avalevale solo
- iii) lafotu - faapau ma solofa i lalo

GALUEGA FAATINO:

E fa parakalafa o le tusi faitau o le tatou mataupu. Faamatala mai faapuupuu, mea o loo tutupu i parakala taitasi e fa. Faataitaiga afai o le faamalologa tau mai le ituaiga ma'i o loo faamaloloina.

PESE: 123

A'OA'OGA:

1. E fa'asaoloto e le Atua i tatou mai saisaitiaga uma.
2. Ia maua le loto maulalo.
3. E afio ifo le Atua i tagata uma.

.....

ASO SA: 13 MATI 2022

MATAUPU: O'OTIA ONA O LE AGASALA
(Grief over sin)

SINI: Ia malamalama le vasega, na ootia lagona faanoanoa o Mose ona o le agasala ua faia e Isaraelu

TUSI FAITAU: Esoto 32: 19 – 35

FESOASOANI MO FAIAOGA:

E aiga tutusa le upu o'otia ma le upu ita (anger), faanoanoa (sadness), loto tigā (pain), ta'e le fatu (heartbreak), ma isi. O se uiga ma se lagona e lē fia 12ees ai le tagata. E masani lava le lagona lea, pe a motusia faafuase'i se mafutaga mafanafana ma faapelepele e ala i le maliu ma le oti, po o se isi foi mafuaaga.

O le lagona lea na tupu a'e mai le loto o le toeaina o Mose, ina ua foi mai ma papa maa e lua o le tulafono mai le Atua, mai le mauga o Sinai, ae faafeiloa'i e le tama'i povi auro ma tagata o le nuu o Isaraelu, o loo sisiva ma pepese i ai. O lea vaaiga, o le faailoga o le nuu ua atua i le tama'i povi auro, auā ua o latou 12ees12 ai. O lo o manino lava i le amataga o le mataupu lava lenei e 32, ina ua uma ona faia e Arona o le tama'i povi auro, ona ia tuuina atu lea i le nuu ma faapea atu, *“Isaraelu e, o lou atua lenei, o lē na aveina a'e oe nai le nuu o Aikupito”*.

Peita'i, a toe fo'i i tulafono na fetalai ai le Atua ia Isaraelu, e pei ona faamauina i le Esoto e 20, o lo o amata lava tulafono i le, *“aua ne'i e fai mo oe ni atua ese i o'u luma”*. Sosoo mai ai le lona lua, *“aua e te fai mo oe se tupua ua ta.....aua e te ifo i ai.....”*. O lo o atagia mai i le finagalo o le Atua silisiliese i tagata o lona nuu, e matuā sili lona tigā ma lona fuā, i le tagata e na te faia se faatusa (tupua) o le Atua i le lalolagi nei, ma ifo i ai. Ai lava foi o le ala lea na faamuamua ai lava i le lisi o tulafono na fetalai i ai le Atua ia Isaraelu, ina ia saga faamautuina ai lava le sootaga i le va o le

tagata ma le Atua, ina ia mausalī ma tumau e faavavau, auā ua mae'a ona osi feagaiga. I le ma lea, o le Atua lava lea na faamaite ma taulamua, aemaise lava i le aveeseina mai o le nuu mai Aikupito i le mea sa nofo pologa ai, ma vavega na faapupula i ai e le Atua, ua mafua ai le Esoto (exit/o ese mai).

O le mataupu o lenei aso Sa, o loo atagia mai ai le o'otia (grief) o Mose ina ua faia e nisi o tagata o le nuu le agasala ogaoga ma le matuiā, o le ifo lea i le tama'i povi auro, ma le o'otia (grief) o le Atua, ina ua soli e tagata o le nuu na o latou osi feagaiga, le tulafono na Ia fetalai i ai. Aemaise ai, ua gagana ai le nuu ma faapea ane i le tama'i povi auro, o lo latou lea na aveina a'e i latou mai Aikupito.

E mafai ona faamatalaina le o'otia o Mose, i lona tulaga faa-ta'ita'i o le nuu, a ua lē amanaia ma toe fia faalogo i ai le nuu. O'otia i lona tautiga ma lona malosi ua alu, na faafeagai ai ma le loto malosi o Fara'o le tupu o Aikupito, ma le tau ta'ita'iga o loto ma mafaufauga uma o le nuu, auā sa to'atele le au faitio, o le au lē mautonu, o le au faalogogātā, o le au faifai upu ma tala. E le gata i lea, a o le va feagai ai o le Atua ma le nuu, o Mose lava le sooupu. Talofa! Ua leai se faatali o le nuu i le fo'i mai o Mose. A ua fesili ia Arona le uso o Mose. O le faailoga ua leai se faatuatuaaina o Mose i lona tulaga faa-ta'ita'i o le nuu. E le gata i lea, a o se filifiliga ua faia e le nuu, ina ia fiafia ai e faia le agasala, nai lo le fiafia e faatali i le faasinoga a le Atua, e ala mai i lana auaua o Mose. Ua tatau le o'otia o Mose, auā ua ia vaai sa'o lava i le nuu agasala, ua soli le feagaiga, ma ua faaleaga i le olaga.

O le o'otia o le Atua, ona o le agasala ua faia e Isaraelu. Ua soli lava e le nuu ulua'i tulafono, e faavaeina ai le loto ma le mafaufau o le tagata i lona Atua. Tulafono o loo matuā manino mai ai i le finagalo o le Atua lona “**fuā**” pe a soli e le tagata. O lona uiga, ua sala lava i le o'otia ma le fuā o le Atua, auā ua agasala ma leaga le nuu, ina ua fai le atua ese i luma o le Atua soifua, ma ua 13ees13 le tupua. O le faailoga o le tagata ua lē iloa lona Atua.

Talofa i le Atua alofa, ua o'otia talu lona lava nuu. Lona naunau ina ia amio lelei ona tagata ma talitonuina o Ia e tagata, a'o lenei ua leai. O lagona foi ia e mafai ona tutupu i loto o matua, pe a fiafia le fanau e ola i le leaga ma le agasala. E o'otia, ona o le matua lava ia,

e naunau ina ia ola manuia, ola fiafia ma ola faapaiaina fanau. Ae afai e tuvale le naunau, ina ua leaga amio a fanau, e lē fesiligia le taunuuga ma le leaga e faafeagai i le lumana'i.

GALUEGA FAATINO: TA'UTINOGA

Tuu le avanoa i le vasega, ta'utino mai ai lava le tagata ia, i se mea na tupu ai lona o'otia po o lona loto tigā.

PESE: E lo'u Alii ua ou sese (Pese ma Viiga 136)

A'OA'OGA:

1. Tausi i tulafono a le Atua, ma tumau ai.
2. E o'otia le finagalo o le Atua, pe a faia e le tagata le agasala.
3. Aua tatou te faia ni mea e faatupu ai le o'otia o nai o tatou matua.

.....

ASO SA: 20 MATI 2022

MATAUPU: ATUATUVALE MA LE LOTO
(Anxiety and the heart)

SINI: Ia malamalama le vasega, o le atuatuvaile e faavaivai ai le loto.

TUSI FAITAU: Faataoto 12: 25

FESOASOANI MO FAIAOGA:

O le mataupu o lenei aso Sa, e taua tele i le soifua maloloina lelei o le tagata. I manatu o le tele o foma'i, aemaise lava i le vaega o le Soifua Maloloina o le Mafaufau (Mental Health), o le tino atoa o le tagata, e faatautaia (control) e le loto e ala mai i le mafaufau. A mafatia le loto ma le mafaufau o le tagata, e afaina le tino atoa o le tagata.

O loo faamamafa le mataupu o lenei aso Sa, i le “atuatuvale” ma le “loto”. O le atuatuvale e laina tutusa ma le upu popolevale. O se lagona e mafai ona tupu a’e i totonu o le loto o le tagata. Aemaise lava i taimi ua manatu ai le tagata, ua leai se avanoa e puipuia ma malutia ai lona ola, i se siosiomaga ua ia i ai. O le mea ua mautinoa, e eseese lava auala ma mafuaaaga, e mafua ai ona atuatuvale le loto o le tagata.

O le tusi o Faataoto, e manatu le to’atele o tagata, o le tupu o Solomona na tusiaina. O faataoto e faamatalaina ai le “poto” ma le sailiga a le tagata. E mafai ona faapea se tala, o le sailiga a le tagata po o fea e maua ai le “poto”, e mafai ona taliina, “O le Atua e maua ai”. E faatusaina le tagata poto, o le tagata ua ia mauaina le Atua. Le tagata lea ua mautinoa i le Atua, ua mata’u i le Atua, ua faalagolago foi i le Atua. Peita’i o le faitauga o lenei aso Sa, o loo atagia mai ai, a atuatuvale le loto o le tagata, o le tagata tigaina lenā. Ua faavaivai e ia o ia lava. O le uiga o le manatu, e lē tatau i le tagata ona atuatuvale pe popole vale. O le molimau lea a le tusitala o Faataoto, le tupu Poto o Solomona, i le loto o le tagata. E lē tatau ona atuatuvale. E pologa ai le tagata pe atuatuvale le loto. O loo atagia mai ai se feau i le tagata, e ao ona ia mauaina le Atua, o lē e tafieseina le atuatuvale ma le popolevale. O lē o loo i ai le mautinoa, o Ia foi e galo ai le atuatuvale. Ma o le tagata poto lena.

E masani lava i le olaga nei, e tausolomua lava i le tagata, ona faatupu le atuatuvale i le loto o le isi tagata. Ma e lē fesiligia foi le tele o soifua ua afaina ai. E manatu nisi, e leaga lea taumafaiga i le tagata, ina ia afaina ai le isi uso a tagata. Peita’i i si o’u taofi, “o lu’itau na o le olaga ma le soifua talitonu (trust) o le tagata i lona Atua o loo ia faalagolago i ai mo lona olaga. Poo a lava faitoto’a e auala mai ai le atuatuvale i le loto, e lē afaina lava.

Ae taua foi mo le tagata e na te ave le upu lelei mo le tagata ua atuatuvale le loto. Ina ia faatupuina le olioli i le loto mafatia ma le loto lē mautonu. O i latou na o atalii o le Atua, auā ua o latou faatupu le filemu i le loto o le tagata ua atuatuvale, e pei ona fetalai ai Iesu i lana lauga (Mataio 5:9).

O a’oa’oga a le poto, o le atuatuvale, e mafua ona ua leai le tagata ma le Atua. O se faama’i e mafai ona ma’i ai le loto o le tagata e lē talitonu i le alofa, le Silisiliese ma le mamalu o le Atua soifua. O le

atuatuvale foi, ua fai ma mailei a le tiapolo i le tagata ua manifinifi lona ola faatuatua, ina ia saga faavaivaia ma fano ai, e pei ona tele ai le pule i le ola, gaoi, talepe fale, aemaise o le fasioti tagata ma isi tu ma aga faa-solitulafono, e pei ona aafia ai le tele o tupulaga i nei vaitau.

O le “loto” o le tagata, ia sili lava ona puipuia nai lo se isi lava mea i le ola o le tagata. E afaina loa le loto, ua afaina foi le tino atoa. O le tagata e lelei lona loto, e ola fiala ma ola manuia. E lelei foi mea na te faia.

O le feau lelei lea mo i tatou uma lava i lenei aso Sa, ma lenei foi vaiatu o le ola. Tatou faamoemoe i le Atua, ma talitonu faamaoni ia te Ia, o le faatuatua lava lea, tatou te lē atuatuvale ai

GALUEGA FAATINO: FA’AALIGA O MANATU

Tuu le avanoa i le vasega, e faamauiina ai ni o latou manatu ma lagona, i ni mafuaaaga e atuatuvale ai le loto o le tagata, a’o a foi ni auala e mafai ona fofō si le loto ua atuatuvale pe popolevale.

PESE: A tumau ia Iesu. (When we trust in the Lord)

A’OA’OGA:

1. E ma’i le tagata pe a atuatuvale lona loto.
2. O le Atua e aveeseina le atuatuvale o le tagata.
3. Fiala e faatupu le olioli i le loto ua faapopoleina.

.....

ASO SA: 27 MATI 2022

**MATAUPU: “E LĒ O SE MEA MALIE”
(No laughing matter)**

SINI: Ia malamalama le vasega, e folafola e le Atua i le tagata mea moni o le a tutupu, ae lē o se mea malie.

TUSI FAITAU: Kenese 18:1 – 15

FESOASOANI MO FAIAOGA:

O le loto lē talitonu o le tagata, e mafuli lava lona faataunuaina i le faifai i ai o tala, faasolo ane ai ma le aamu, se ia oo ai lava ina avea o se mea mālīe i le mafaufau pe a manatuaina i se taimi.

O le tasi aso i le aoauli, a’o nofonofu le toeaina o Aperaaamo i lona fale, na ia iloa ai ni tagata se to’atolu o loo tutu mai ia te ia. Ona ia momo’e lea ma faaafē ia te’i latou i lona fale, e tusa o tu ma aga talimalo e masani ai e le au Sisifo (Easterns). O nei tagata, e mafai ona faamatalaina o ni tagata asiasi (visitors), peita’i e manatu le to’atele, o ni agelu a le Atua.

E lei silafia e Aperaaamo nei tagata ua afea lona aiga. Ae o le faafeiloa’i atu a Aperaaamo ia i latou e ala i lona ifo toele, ma lana augani ina ia mulumuluina e ia ma lona aiga o vae o i latou ia, faatasi ai ma se taumafataga e tapena e ia ma lona aiga mo nei tagata, ua lava lea e manino mai ai le manatu ma le lagona o le toeaina o Aperaaamo, ina ia faamanuia mai le Atua ia te ia ma lona aiga.

Sa faatino e Aperaaamo le talimalo lelei i nei tagata, ina ua ia tapena le meaai lelei ma aai ai ma nei tagata e to’atolu ua afea lo latou aiga.

O le mana’o ua taunuu o Aperaaamo, ina ia faatino se auaunaga a’o se talimalo i tagata ua afea lona aiga. O le faamatalaga o le taumafataga sa tapenaina e Aperaaamo, faapei o le tama’i povi mu’amu’a, o sea o falaoa mo ni potoi areto, faatasi ma suasusu i le taumafataga, ua na o le tupu e talisua ai. O loo atagia ai le maualuga o le faaaloalo a le toeaina o Aperaaamo, i tagata ua afea lona aiga. O le finagalo o le Atua, o ai lava ua e faia i ai se galuega lavea’i, poo se galuega alofa, o Ia lava lena ua e faia i ai. A tonu o le lagona lea sa ia Aperaaamo na faamaite ai le gaiōiga sa ia faia.

Na aai fiafia nei tagata, ma o latou faamanuia ia Aperaaamo ma lona aiga. Ua fesili foi nei tagata po o fea lana avā o Sara, ma ua faamanuia i ai, e ala i le fanauina lea e Sara o se tama tane mai i lona manava. Na lagona e Sara le tala ua aumai, ma o se faamanuiaga mo lo laua aiga. Peita’i, o le oo mai o le feau ia

Aperaaamo ma Sara, na tuufesili ai manatu ma lagona o Sara, ona ua matutua lo la soifua ma Aperaaamo. I le manatu o Sara, e lē toe mafai i le iloa o le tagata, ma le gasologa o le ola, ona ua te’a o ia ma le tulaga o se tama’ita’i, e mafai ai ona i lona manava se pepe. E oo foi ia Aperaaamo lona to’alua, ua pasi ma le tulaga faa-tama-tane, e mafai ai ona tupu mai ai ia te ia se tagata fou. Ma o le ala lea o le ataata ai o Sara, ona o le tulaga lē mautonu ua faateia ai o ia. Ua mālīe ia Sara le tala ua aumai, ona o loo taofi o ia i lagona faa-le-tagata, ma le natura o le soifuaga. Peita’i, e aunoa lava i le olomatua o Sara se lagona i le Atua fai vavega, ma le Atua folafola. E le’i lilo i le silafaga a le Atua le ataata a Sara. O le ala lea o le fesili atu o le Alii ia Aperaaamo, po o le a le mea ua ataata ai Sara. Ua galo ia Sara, e leai se mea e lilo i le silafaga a le Atua. O le Atua fai vavega, o le Atua silisiliese e pule aoao i mea uma lava e oo lava i le soifua ma le ola o le tagata. O le Atua lea, e leai lava se mea faigata i le lagi ma le lalolagi, e lē mafaia e le Atua. Po o le a lava le matutua o Aperaaamo ma Sara, e mafai lava ona o la fanauina se fanau, i le pule a le Atua. O le Atua foi lea o so o se mea lava e folafola e le Atua i le tagata, e taunuu lava, e lē faalavelaveina e se potu ma se malosī o le tagata po o se isi lava mea o le ola.

Sa faoa e le fefe le loto o Sara, ina ua faalogo atu i le fetalaiga a le Alii, o loo atagia ai le tala ua tuuina mai, e lē o se mea malie, ae o le tala i le mea mo’i o le a tupu. Sa mālīe i le faalogo a Sara, ona o le lē mautonu ma le galo. Sa mālīe foi i le mafaufau o le tagata, ona ua faamamafa le tala ua aumai, a ua lē faamamafa i lē e ana le tala ua ta’uina mai.

Ua toe fefe foi la ea? E lē o se mea mālīe o le mea mo’i

GALUEGA FAATINO: TAALOGA – “FAI MAI SIMONA”

O le agaga o le taaloga, ina ia siaki ai le faalogo ma le mafaufau o le tagata. E mafai foi ona faia se faatonuga e faigata i le tama/teine ona faatino. Po o se faatonuga e foliga e malie lona faatinoina, ae leai.

Faataitaiga: “Fai mai Simona e osooso i le vae e tasi”

PESE: Faalogo ma usita’i.

A’OA’OGA:

1. O mea ua folafola e le Atua, o mea mo’i, e lē o ni mea malie.
2. Talia ma le talitonu faamaoni i le Atua, e manuia ai.
3. Faalogo i le Atua, e faamanuia mai.

.....

ASO SA: 3 APERILA 2021

MATAUPU: O LE SAVALI O LE OLA
(The walk of life)

SINI: Ia malamalama le vasega o le savaliga a Iesu ma ona soo i Ierusalemā o le savaliga o le ola mo e na manaomia le fesoasoani.

TUSI FAITAU: Luka 18: 31 – 19: 10

FESOASOANI MO FAIAOGA:

O lea ua aga atu Iesu ma ona soo i Ierusalemā, ma ua Ia tautino foi le mea o le a tupu i Ierusalemā. O le savavali ai la o Iesu ma ona soo i Peteleema, o le savaliga e tau i puapuaga ma le maliu o Iesu. O le savaliga ua faatusa i le savaliga a tagata sulufai Eperu i le feagaiga tuai, lea e latou te savavali ai ma usu le pese o le o a’e i Ierusalemā. O lo o faamauina i le tusi o Salamo 25 - 30. O le faamoemoe o le au sulufai e fia maua le ola o lo o i Ierusalemā. O le savaliga la a Iesu ma ona soo, o le savaliga e tau i puapuaga ma le oti. Peitai, o le savaliga lea o le ola e le o iloa e le au so’o. Lea la e amata atu ina ua Ia faamalolo i le tauaso aemaise ai o le faaolataga mo le aiga o Sakaio le ao lafoga.

F35-43 – O le savaliga a Iesu na ui atu e latalata i Ieriko ae faalogo ane ai le tagata Tauaso o ta’uta’u le suafa o Iesu. Na vavao e soo lenei tauaso, peitai na atili ai ona tauvalaau lenei tagata. O le tauvalaau o le tagata faatuatua, ao le faatuatua na tupu ane i le na o le faalogo i mea na faia e Iesu. O le molimau o lenei tauaso sa nofonofo i le ala, ai lava o le musumusuga lea a le Agaga i lona faatuatua lea na alu ane ai nofo i le ala. Lea la ua talafeauga ma le savavali mai o Iesu ma ona soo. O le faailoga o le tagata ua saili ma le faamaoni i le Alii. Ae lei faigata foi ia Iesu ona ia iloa le faatuatua o lenei tauaso.

O Sakaio o le Iutaia maoli sa faigaluega i lalo o le malo o Roma, o se Ao Lafoga sinia. O se tagata e puupuu i ona foliga vaaia. O le tagata ua faalupe o le tagata mauoa. O Ieriko o le isi lea aai e tuta i ai vaa feoi i le vaitafe o Ioritana. So o se tagata fou a la e taunuu, e totogi lana lafoga ia Sakaio. E le gata o le lafoga ulufale ae faapea foi i le lafoga mo aso uma. Afai a la e faasili le lafoga ulufale ma lafoga i aso taitasi mo lea tagata fou, a ua le tasi foi ni tagata e autovaa atu ma nonofo i Iutaia. O lona uiga e fai a la si telē o le tupe o lo o alu i le taga a Sakaio.

Na a’e Sakaio i le sukamoru, ona o le fia maimoa i le tagata e suafa ia Iesu. O lona puupuu na leiloa atu ai e Iesu, ao le ata foi lea o le tagata Iutaia o lo o leiloa i le Tala Lelei. Faamoemoe lea o le tusi o Luka – o le Iesu na sau e saili ma faaola mamoe o le aiga o Isaraelu ua leiloloa.

O le a’e la a sakaio i le sukamoru, o le a’e a le tagata mauoa i le oa faaletino ae o lo o leiloa i le tala lelei. Ana le a’e Sakaio i le laau e le maua e Iesu le isi mamoe o Isaraelu o lo o leiloa faaleiloga ai a i totonu o Iutaia. O luga o le Sukamoru na iloa atu ai e Sakaio le faaolataga mo lona aiga. O luga foi o le sukamoru na toulu ese ai lona tamaoaiga faaletino, a ua faaofu e Iesu i le tamaoaiga faaleagaga.

Ioe tamaiti, mea ia na tutupu i le savaliga a Iesu ma ona soo e agai atu i Ierusalemā. O le savaliga na maua ai e le Tauaso le ola fou ina ua ia vaai i le lalolagi matagofie, ae le gata i lea o le savaliga na ola ai le aiga o Sakaio ina ua latou maua le faaolataga. Ia ma le ute o faigamea, o le savaliga lea na tau i Ierusalemā ma fasiotia ai ina ia ola le lalolagi agasala.

GALUEGA FAATINO:

TUSITUSIGA FAAPUUPUU (Summarising)

- Toe faamatala mai tala e lua o lo o i totonu o le tusi faitau sa faitauina, ma ni mea taua sa tutupu ai (ia i le va o le 500 – 600 upu)
- O lenei galuega faatino e tuliloa ai le faitau ma le faalogo a le fanau, aemaise o le aoaoina pea i le faapuupuuina o tala (summarising)

PESE: Sakaio le tagata puupuu sa’asa’a

Sakaio se tagata puupuu saasaa, le tagata puupuu saasaa
 Sa a’e o ia i le sukamoru, i tafatafa o le auuala
 O Iesu ua afio mai, tu loa ma fetalai
 Sakaio, alu ifo nei i lalo
 Sau ta o i lou fale
 Ua tele lou fia ulavale

A’OA’OGA:

1. Ua na’o Iesu tatou te maua ai le ola.
2. E tali Iesu i o tatou mafatiaga.
3. Talia Iesu i totonu o lou aiga.

.....

ASO SA: **10 APERILA 2021 (Aso Sa Laupama)**

MATAUPU: **E OO MAI LAVA LE UPU**
(His word will come to pass)

SINI:

Ia malamalama le vasega e taua le ola mataala ma tapenapena i le aso o le malo o le Atua aua e matinoa e oo mai lava.

TUSI FAITAU: Luka 21: 29 – 22:6

FESOASOANI MO FAIAOGA:

E le o ni upu e na ona tau ane ai upu a Iesu ua ia aumaia ai le mati. E ui ona o se gagana faa-faataoto o lo o faaaogaina e Iesu. Peitai o lo o manino lelei le mea moni o le a tupu. O le gasologa mautinoa lava lea o le Mati ma laau uma i ia ona po, a oo i tau vevela ona totogo mai lea o ona lau, ae a oo foi i le tau malulu ona toulou foi lea o ona lau. O lona uiga e pei ona molimauina i le gasologa o le mati, e faapena foi ona taunuu upu ua fetalai manino i ai Iesu. E i ai faailoga e iloa ai ua latalata mai le malo o le Atua

E mavae augatupulaga, peitai o le upu ua pau mai i le fofoga o Iesu e taunuu lava. O le Malo o le Atua o le iuga lava lea o le tagata. Lea ua muai fofola e Iesu e i ai le taunuuga ma le aso e faamasinoina ina ai le tagata. Faamoemoe ia tapena i ai soo se tagata Kerisiano, ina nei faatalanoa i manatu ma lagona faapea ailoga a taunuu lea aso.

E tele faafitauli ma vaivaiga o le soifuaga nei, o le olaga foi o lo o felavasa’i solo ai le lasi o gaioiga faa-le-tagata lava ia. O mea e ono fai ma faalavefau e faoa ai taimi e tatau ai ona tapena mo le taimi e oo mai ai le malo o le Atua. Le ala lea o le faamalosi o Iesu i ona soo ma le motu o tagata. *Ia outou nei mafatia o outou loto i le soona ulavale, ma le ona, ma le popole i mea a le olaga nei, nei faafuasei mai lea aso ia te outou e pei o se mailei.* O le faaaogaina o le upu mailei, o lona uiga o se mea e le iloa e le tagata, o se mea e tupu faafuasei e aunoa ma se manatu e tatau ona tupu.

Peitai lea ua uma ona fofola faa fala e Iesu le Malo o le Atua, o se taunuuga e mautinoa lava e tupu i soo se tagata soifua. Afai la ae le mataala ma tapenapena i ai le tagata. Ona pei lea le oo mai o le malo o le Atua e pei o se mailei. Ao le ata manino foi lea o le

taunuga o le tagata e le mataala ma tapena mo ituaso ia. O lona iuga e le sao i le Malo o le Atua.

O le maliu lava ia o Iesu ua leva foi ona Ia tautala ai i ona so'o ao faagasolo la latou galuega. E i ai le taimi e tuuina atu ai le Atalii o le Atua i lima o tagata. I le amataga o le mataupu e 22, lea ua pei ua oo i le taimi e taunuu ai upu ia a Iesu. Ua oo i le taimi o le tausamiga o le paseka, ona lamalama ai lea e le au ositaulaga. Ona faaaogaina ai lea e le tiapolo o le tagata sa militino ma vava lalata le latou mafutaga ma Iesu, e fai ma mailei e mailei ai le taupulega leaga mo le fasiotia o Iesu.

E ui i nei taupulega, peitai o upu lava a Iesu e le o ni upu e na ona tautala ai. O upu e oo mai lava le taimi e taunuu ai. Lea ua taunuu upu a Iesu ma ua tapena foi i ai le Alii Faaola e tali i ona puapuaga mamafa. Ao le taunuu foi lea ma le oo mai o le faaolataga tele mo le tagata faatuatua. O se luitau foi lea mo tagata uma, ia mataala ma tapenapena i le aso e oo mai ai le Malo o le Atua mo i tatou.

GALUEGA FAATINO:

Faamatala mai uiga o fuaitau nei:

1. Soona ulavale
2. ..lea aso ia te outou pei o se mailei..
3. Ua latalata le tau vevela
4. ...uluitino ai lea o Satani ia Iuta....

(NB: O lenei galuega faatino ua manatu e faatalanoa ai le fanau ina ia tatala ai o latou manatu ina ia atili ona malamalama i le mataupu tau le malo o le Atua.)

PESE: Pese 168 (Pese ma Viiga)
Omaia faamalosi, ia tatou laei au.....

A'OA'OGA:

1. Ia mataala ma tapenapena i taimi uma
2. Aua le soona ulavavale

3. Ia tumau le faatuatua i le faaolataga

.....

ASO SA: **17 APERILA 2021 (Aso Sa Toetu)**

MATAUPU: **E LE O LE MALOSI (*Not by power*)**

SINI: Ia malamalama le vasega e ui i le malosi o faiga a le malo o Roma, ma le agasala o tagata, ua tatala mea uma i le Alofa Tunoa o Keriso e ala i lona maliu.

TUSI FAITAU: Roma 6:1 – 14

FESOASOANI MO FAIAOGA:

E le o faigofie le galuega o le Tala Lelei o lo o feagai ma le Au Kerisiano i totonu o le Ekalesia i Roma. O le galuega e o faatasi ai le malosi faaletino ma le malosi faaleagaga.. O le matautia o le sauaina o Kerisiano o le isi lea ala, e tatau ai ona toa le loto o le Kerisiano ma ia malosi lona faatuatua. Ia toa le loto o le Kerisiano ina ia aua nei fefe i le oti. A ia malosi lona faatuatua i le tala lelei ia Iesu, aua o le manuia lea e faavavau o le Kerisiano faamaoni. O le ola sauaina o se tigā e mavae, ae tumau le manuia o le tagata pe a salamo mai agasala ona o le maliu o Keriso

O le uiga lea o le faamalosi atu a le Aposetolo i le Ekalesia. E ui i le pule malosi a Roma ma le matuia o le agasala. O mea malolosi ia ua mafai ona gafatia uma ma faatoilaloina e le maliu o Iesu ma lona alofa Tunoa. Fai mai le aposetolo – *Tatou te nonofo pea ea i le agasala ina ia faatele ai le alofa tunoa..* O le alofa tunoa o Keriso e leai se mea e gata ai, e le mafai e le agasala ona ausia pe taofia mai le tagata mai le alofa tunoa o Keriso. O le maliu o Keriso i manatu o Paulo o le tatanu faatasi lava foi lea ma o tatou agasala. O le taulaga ua sausauina uma ai le tagata Kerisiano ma le tagata agasala. Peitai o le naunau atu o le Aposetolo, ina ia salamo mai agasala ma talia le alofa tunoa o Keriso. E leai a se isi malosi e sili

atu nai lo le satauro o Keriso. O le toetu mai foi o Keriso o le ata lava foi lea o le faaolaina o le tagata mai le loloto o le agasala.

O le agasala lava ia o ala ia o le tiapolo, a ua uma ona tapena e Keriso le ala e soloia ese ai nei agasala uma. O le faamoemoe laualuga o le Aposetolo mo le Ekalesia i Roma. Ina ia salamo mai agasala, ua avea le satauro o Keriso ma lona alofa tunoa ma malosi sili e latou te tau ai le taua lelei o le Tala Lelei faaauau i totonu o sauaga ma puapuaga. E leai lava se isi malosi e tutusa ma le malosi o le satauro o Keriso.

O se a'oa'oga foi lea mo tatou le fanau, o upu a le Aposetolo e le pule le agasala ia tei tatou. Ioe e ui i le malosi o le fili e tau faaosooso mai pea, peitai e le mafai e lea malosi ona manumalo mai ai i le Alofa Tunoa o Keriso e ala i lona maliu. E pei ona tatou i lenei Aso Sa ma lona faamoemoe, e tatou te faamanatuina ai le Toetu manumalo mai o lo tatou Alii Faaola o Iesu Keriso. O lo tatou manumalo faatasi lava lea ma ia e faavavau. O lona uiga ua le toe pule le agasala ia i tatou, a ua agavaa uma i tatou i le ola e faavavau, e ala i le salamo mai agasala ma faatuatua pea ia Iesu.

Uiga o Upu:

i) Toe fuataina : toe faafou, suia atoatoa

GALUEGA FAATINO: Faafetaui upu i o latou uiga

1. Agasala - o le alofa le faatuaonia o le Atua e ala ia Iesu
2. Alofa tunoa - o manaoga leaga o le loto ma le mafaufau
3. Toefuataina - o gaioiga sese e le tusa ma tulafono ma le finagalo Iesu
4. Papatisoina - suiga atoatoa ona lelei
5. Tuinanau - o le sausuina i le vai ina ia faamaufaaailogaina mo le Atua

PESE: E alofa Iesu ia te oe

E alofa Iesu ia te oe
E alofa Iesu ia te a'u
E alofa Iesu ia i tatou uma
Le ala lea na maliu ai
I luga i Kalevalio
Ina ia ola tagata agasala
Se a ea lau vaai?
I lona tautau mai
Ua lava toto ona fofoga
Ua maumau si ona ola
E alofa Iesu ia te oe
E alofa Iesu ia te a'u
E alofa Iesu ia i tatou uma

A'OA'OGA:

1. O le maliu o Iesu ua fai lea ma o tatou faaolataga
2. Ia salamo mai ia tatou agasala
3. O le alofa tunoa o Keriso e mo tagata uma lava

.....

ASO SA: **24 APERILA 2022**

MATAUPU: **O MEAOLA UMA A LE ATUA
(All Gods Creatures)**

SINI: Ia malamalama le fanau i le taua o meaola uma na faia e le Atua, o ia o le sami, o manulele manu fetolofi ma manu vaefa.

TUSI FAITAU: Kenese 1: 20 – 25

FESOASOANI MO FAIAOGA:

“Ua silasila atu le Atua, ua lelei”

O le faaupuga lea e faatatau i mea uma na faia e le Atua. E oo lava i meaola uma, ua lelei. E ui ina manatu le tagata o nisi o meaola, e leai se aoga e faapea e manu faalafua (pest)

A o lea lava o lo o molimau le tusi o le foafoaga (Kenese) e leai se mea e le aoga na faia e le Atua. E fua mea uma na faia e le Atua i le taamilosaga o le ola (Life Cycle)

I le foafoaina o le lalolagi, na fegaoioiai ai le Agaga o le Atua i luga o le fogatai soona nunumi ma le pouliuli. O le faailoga e leai se ola. O le Agaga Paia o le Atua, o le Agaga ola. So o se mea lava e fegaoioiai ai le Agaga o le Atua, e tatau foi ona i ai ma le ola. O i’a uma o le sami, o meaola fetolofi ma laau o le sami, e faalagolago ai le faataunuaina o le ola i le sami. Le foafoaga lea a le Atua, ina ia avea ai le fogatai soona nunumi ma le pouliuli, ma fogatai e ia i le ola. Ae le gata i lea, ia avea foi le gatai fale e tua i ai le tagata mo ana meaai faapea lona tamaoiaiga.

E faapena foi i manufeleele i le vaninonimo, manu fetolofi o le laueleele ma manu vaefa. E i ai manufeleele e fai ma faailo, i se mala faalenatura o le a tupu, e pei o afa ma matagi malolosi. O manu feleele e faailoa ai ua oo mai le taeao fou. E i ai foi manu vaefa, e iloa ai ua feoai foi agaga leaga.

Ae o le sootaga lava o nei mea ola uma i le vanimonimo ma le laueleele, ia tumau pea le ola i luga o le laueleele. Ia faatumauina ai le matagofie o mea uma na faia e le Atua.

A o le aotelega lava o galuega mamana uma a le Atua. Na faia lava mo le manuia ma le lelei mo le tagata. Aua nei o tatou manatu, e leai se aoga o nisi o mea na faia e le Atua. Tatou te fiu e taumafai e faaumatia meaola, tatou te manatu e leaga, e mafai ona mau ai pe le toe vaai. E pei o namu, lago, mogamoga, o sisi, atoloa, anufe, o nisi o i’a o le sami ma laau. E faatumauina pea, aua na mafua ona feola uma nei meaola, o le Atua. E le mafia ona oo le tatou potu ma lo tatou malamalama i tala atu i le Silisiliese o le malamalama o le Atua, na ia faia ai meaola uma.

“Le paie e, ina alu ia e vaai i le loi” Tasi lea upu a le Tusi Paia, e iloa ai le taua o meaola faatauvaa i le vaai a le tagata.

‘Aua le ola paie, e le maua ai se mea lelei. O meaola uma na fai e le Atua, ua silasila atu i ai le Alii ua lelei.

GALUEGA FAATINO:

Lisi mai meaola e tai sefulu mai i le ituaiga. Meaola o le sami, manufeleele, laau, meaola fetolofi ma manuvaefa e maua i Samoa.

Faataitaiga:

	<u>Sami</u>	<u>manulele</u>	<u>manufetolofi</u>
1.	poge	fuia	anufe

Ia tai lua mai i vaega nei meaola, e lisi mai ma faamatala mai lona aoga.

PESE: Na faia e le Atua meaola uma
(fati - MAK)

A’OA’OGA

1. E aoga meaola uma na faia e le Atua.
2. So o se mea e i ai le ola, na faia e le Atua.

.....

ASO SA: 1 ME 2022

MATAUPU: O LAGOMELI (Bees)

SINI: Ia malamalama le fanau i le uiga o le tala ia Samasoni ma le faamoega lagomeli i totonu o ivi o le leona mate.

TUSI FAITAU: Faamasino 14: 8 – 14

FESOASOANI MO FAIAOGA:

E silia ma le 50,000 lagomeli e feleleai solo i le laueleele. E taua tele nei meaola i le feaveaina o fua o laau (pollens) mo le toe tutupu mai, aemise le fuga mai o laau. E galulue faatasi aua le puipuiina o le faamoega lagomeli. E tele le aoga o lagomeli. E maua mai ai foi le suauu suamalie i le meli (honey), lea e fa'aaoga e fai ai vai. A o le tala sa faitauina, e faigata ona tatou malamalama i le olaga o le lagomeli, pe a fua i le nofoaga lea, ua ofaga ai. Ua ofaga i totonu o ivi o le leona. E mafai ona faapea, o Isaraelu o le faamoega lagomeli ua nonofo i totonu, o Filisitia (Leoner). A o ponaiivi o le leona, o le faailoga lea, e i ai le taimi, e faaumatia ai le malosi o Filisitia e le Alii.

E ui ina soli e Samasoni lana tautoga fa-Naseri, e sa ona pai atu i tino o manu mamate, lea na ia aumai ai le 'meli' (honey). Ae na onā foi o ia i le uaina i le aiga o le faaipoipoga lea na auai ai. Na ai e Samasoni, le meli ma avatu i ona matua, ae na te lei tauina atu le mea na ia aumai ai le meli. Ua aai faatasi o ia ma ona matua i meaai le faamamaina.

Ae mafua ona tupu lea tulaga ona o le manao o Solomona i le fafine Filisitia. Ua avea lona manao, ua galo ai lana tautoga mo le Atua. E suamalie le manao, ae mafai ona tiga e pei o le tutui a le lagomeli. Ua fai e Samasoni le tupua, ma lona manatua e manumalo ai i fitafita Filisitia e toa 30. Ae na mateia e fitafita le tupua ina ua latou faafefe i le ava a Samasoni.

“Se a se mea e sili ona suamalie i le meli. Se a foi se mea e sili ona malosi le leona.”

Ua ita tele Samasoni, ona o le mea na fiaa e fitafita, ona osofia ai lea o ia i le Agaga o le Atua. Le Agaga o le Atua e sili atu lona malosi i lo o le leona. Ua fasitua e Samasoni, fitafita Filisitia ma avea ofu, e totogi ai lana 'ofu' ina ua mateia lana tupua. O le malosi mai le Atua, e suamalie ai le manumalo pe a oo ina fetai ai ma faigata.

GALUEGA FAATINO:

Fesili ma Tali.

1. Na alu atu foi le mea suamalie mai le maosi” O le a le uiga o lea faaupuga?

Tali: O le meli, na maua mai totonu o ivi o le leona.”
Meli – suamalie
Leona – malosi

2. O le a le malosi e sili atu i mea uma?

Tali: Agaga o leAtua.

3. O a tapu o le Naseri?

Tali: E sa ona inu i le uaina
E faatutupu lona lauulu
E sa ona pai i tino oti.

4. O le a le Naseri?

Tali: O le tagata ua faapaiaina e auauna mo le Atua.

5. E faapefea ona mateia e fitafita le tupua a Samasoni?

Tali: Na tau ai e le ava a Samasoni.

6. O fea le nuu o le ava a Samasoni?

Tali: O Filisitia.

7. Se me lelei le faiava o Samasoni i fafine o nuu ese?

Tali: E leai.

PESE: O le Atua e malosi ma matautia”

A’OA’OGA:

1. E suamalie le manumalo mai le Atua.

2. E leai se malosi e sili atu i le Agaga Paia o le Atua.

ASO SA: 8 ME 2022

MATAUPU: **MOLIMAU MA LE LOTOGATASI**
(Witnessing s a Solidarity)

SINI: Ia malamalama le fanau i le matagofie o le avefa ai o le tagata ma molimau ma ola i le malamalama o Iesu Keriso.

TUSI FAITAU: Fa'aaliga 1: 1 – 3

FESOASOANI MO FAIAOGA:

O le avefa ai ma molimau o lona uiga ia ola le tagata i le malamalama o le Alii. O le Alii o Ia na avefa ma molimau sili i le faatuatua ma iu ina maliu ai i luga o le satauro. I le tusi a Fa'aaliga, o le molimau o le faalogo i le leo o e ua taufaatauvaaina ona pulega faaletagata o malo o le lalolagi. O le leo o e matitiva ma e ua sauaina ona o le Talalelei ia Iesu Keriso.

O le tusi lenei o Fa'aaliga na tusia e le Aposetolo o Ioane ao fa'aaumau ai i le motu o Patamo. E mafua ona faaigoa o le tusi o Fa'aaliga, ona o mea na fa'aali e le Alii ia Ioane i le motu. Lea ua avefa ai Ioane ma molimau i mea o le a latalata ona oo mai.

A o Ioane foi, o ia o le so'o o Iesu, a o i ai le Alii i le lalolagi. Sa mulmuli, faalogo ma vaai i mea uma na faia e le Alii. O vavega, o faamalologa o a'oa'oga a le Alii. E le gata o Ioane sa molimau i le soifua galue o le Alii i le lalolagi, a o molimau i fa'aaliga, o mea ua latalata ona oo mai.

Ua tatou faakerisianoina e ala i le Talalelei a Iesu Keriso. E oo foi i lona alofa ina ua faaolaina i tatou mai le agasala. A o le fesili – O moni ea le avefa o tatou ma molimau? Ia moni le tatou molimau e ala i lo tatou faalogo ma usitai i a'oa'oga ua a'oa'o mai ai le Alii, e pei ona molimau ai le Tusi Paia. Ona faamanuia mai lea o le Alii i lo tatou ola.

GALUEGA FAATINO:

Faaliliu mai le parakalafa i le gagana faa-Peretania
“O le fa'aaliga a Iesu Keriso, na tuuina atu e le Atua ia te ia, ina ia fa'aali mai i ana auauna o mea tusa ona vave oo mai, ua auina mai foi e isi lana agelu e faailoa mai ai i lana auauna o Ioane, o le na molimau i le afioga a le Atua ma le mau ia Iesu Keriso o mea uma foi na ia vaaia. Amuia le faitau, atoa ma e faalogologo i upu o lenei valoaga, ma tausi i mea ua tusia ai, aua ua latalata ona po.”

PESE: Faalogo ma usita'i

A'OA'OGA:

1. Avefa ma molimau faamaoni i le alofa o le Alii.
2. Molimau ma le taltionu atoatoa.

.....

ASO SA : 15 ME 2022.

MATAUPU : **ALA MANUMALO MO LE EKALESLIA**
(Unmarked by the beast)

SINI : A'oa'o fanau ia malamalama, ia aua nei taitaiina gofie i ala taufaasese a le tiapolo, a ia tutumau i le lototele ma faatuatua i le Alii.

TUSI FAITAU : Fa'aaliga 13: 1 – 18.

FESOASOANI MO FAIAOGA :

O le mataupu o lenei aso o lo o faailoa mai ai se vaaiga i manu poo meaola e lua e pei ona molimau mai ai le Aposetolo o Ioane. O le manu muamua e tupu mai le sami, lea na faamatalaina mai e fitu ona ulu ma ona nifo e sefulu, e faailoa mai ai lona matautia ma lona malosi, faatasi ai ma le manao-tele, tamaoaiga, ma lana pule i le

tele o mea e pei ona naunau i ai tagata i lenei olaga, ae le o taula'i i le soifuaga faa - Keriso. E ia te ia foi le malosi faapolokiki. O le manu lona lua e sau mai le fogaeleele, na te faia talaiga sese e faasese ai tagata faatuatua i le Atua. Na te faia foi vavega matautia. O se isi ona vaaiga e tusia i le lima taumatau le faailoga o lea manu, ia po o le muaulu le igoa o lea manu o le 666. E i ai se manatu o lea lava ua salalau i le lalolagi, ma ua faaogaina e nisi ia fuainumera i luga o upega tafailagi i le soifuaga i aso nei.

Peitai ua faamanatu mai le manatu taiala o lenei vaiaso o le "O le lagi fou ma le lalolagi fou". E manaomia ai e'i tatou ona tatou faamamafaina lo tatou tutumau ia Keriso ma le tatou talitonuga atoatoa i le Tala lelei ia Iesu ma ana a'oa'oga, e faafouina ai pea i tatou i le mafutaga faatasi ma lo tatou Alii. E taua ai lo tatou tutu faatasi e tetee atu ia faiga taufaamata'u ma le taufaasese a nei manu poo nei meaola matautia, ina nei taitaiina sese ma faavaivaia ai i tatou o fanau a le Atua.

O le mea e ao ona o tatou manatua pea, poo a sauaga ma faatosina a nei meaola e tau-faamata'u ai i tatou ina ia fai i tatou ma ana au, ia aua lava nei o tatou talia ia faailoga po o fuainumera. Ia aua nei o tatou vaivai ai, pe tatou te fefefe ai. Ia tatou tutumau pea ma le mautinoa o Iesu na manumalo i faaososoga uma a Satani. Ia tatou tutumau pea i la tatou molimau i lea manumalo, tatou te mafai ai ona manumalo faatasi ma Ia. Ua maea foi ona faamaufaaailogaina i tatou ma faatauina i tatou i le toto o Iesu le ao o le Ekalesia, o lo tatou avanoa foi lea i le ola e faavavau. Ia fai lava foi lea ma ala manumalo mo le Ekalesia, ma avea ai i tatou ma sulii i le lagi fou ma le lalolagi fou.

GALUEGA FAATINO: Fetufaaiga

Tuu le avanoa i fanau e toe faamatatala mai ai so latou iloa e faatatau i le fesootaiga o le Tusi faitau ma le mataupu. "ALA MANUMALO O LE EKALEZIA" (faaopopo ma toe faalautele e lau susuga a le faiaoga le fefaasoaiga)

PESE: Uso e talavou o le Feagaiga Fou...

A'OA'OGA:

1. Ua na'o Iesu le ala, i le ola e faavavau.
2. Aua tatou te taliaina faiga taufaafefe ma a'oa'oga taufaasese a le tiapolo.
3. Ia manumalo pea le Ekalesia a Keriso i o tatou olaga.

.....

ASO SA: 22 ME 2022.

MATAUPU: **FAAFOUINA LE LALOLAGI**
(Renewing the earth)

SINI: A'oa'o fanau ia malamalama e i ai le faamoemoe o Keriso na te toe faafouina le lagi ma le lalolagi mo'i tatou o lana fanau.

TUSI FAITAU: Salamo 104: 24 – 30.

FESOASOANI MO FAIAOGA:

E le o manino lelei poo ai tonu le tusitala na tusia le Salamo lenei e 104, ae i le faitau atu i ai i lenei Salamo, ua tatou iloa ai o lo o vivii ma faamanu le fai salamo i le Atua. O le faailoga o le loto faafetai o le fai salamo i le mamana ma le silisiliese o galuega ia poo le mataisau na faia ai e le Atua le foafoaga o le lalolagi. O le faailoga o le mana e mafai e le Atua foafoa ona faia mea uma, e oo lava i le tagata, lea ua fausia i lona faatusa Paia atoa ma lona finagalo ia foliga ia te Ia. Na ia tuu foi le pule i le tagata e avea ai o ia ma tausi mea o lana foafoaga. (Kenese 1: 26 - 28)

O lo o taua foi le saunia ma le tausia lelei e le Atua o mea uma e ala i le faamafola mai o ona aao alofa i le lalolagi. O le Atua e aumai ai le manava ola, ae le gata i lea o faamanuiaga eseese e tausia ai le tagata ma meaola uma o le foafoaga. O le Atua foi o loo i ai le pule o mea uma e oo a i le ola o le tagata. O le Atua e mafaia ona fai o so o se mea i lugā atoa ma lalo nei.

E tele a'oa'oga ma feau taua ua tatou maua mai le faitauaga o lenei aso. O lea foi o lo o ta'ua i le fuaiupu e 29, "Ua alo ona fofoga, ona atuatuvaile ai lea oi latou, ua e aveeseina a latou manava, ona mamate ai lea, ua toe liu efuefu". O lona uiga e ao ona o tatou auauna ma le faamaoni ma faia le finagalo o le Atua, ina ia finagalo malie ma viia ai le Atua, ina ia aua nei alo ona fofoga ia te i tatou, aua o Ia na aumaia i tatou, o Ia foi na te aveese i tatou, ia tatou faamanu i lona Suafa Paia.

Ia tatou iloa ma le mautinoa, faapei ona fai mai le fuaiupu e 30, "E te auina atu lou Agaga, ua faia ai i latou, e te toe fuataiina foi le fogaeelele". O i ua tatou iloa ai, e i ai le taimi ma le ituaso e toe fuataiina ai e le Atua mea uma ma na toe faia ai le lagi fou ma le lalolagi fou. Lea foi e molimau mai ai le Perofeta o Isaia i le Isaia 65, ma le Fa'aaliga e 21. E taua ai la le fai o so tatou sao, o tatou o fanau a le Atua mo le lalolagi matagofie na faia ma foafoaina e le Atua mo'i tatou. Ia tatou fesoasoani e faalelei ma atiinaae le siosiomaga ma faia lona finagalo, ae le o le faatamaia ma faaleagaina, aua e lelei ona finagalo malie mai le Atua ia i tatou, ona sa'o ai lea o le fuaitau "amuia lea auauna ua valaau mai lona matai a o lo o faapea ona fai".(Mataio 24:46). Ia tatou naunau ia faafouina o tatou tagata tuai, e ala i le fultua i le agasala ma mea lē aogā, ina ia mafai ona avea i tatou ma tagata o le lagi fou ma le lalolagi fou ua saunia e le Atua mo'i tatou o lana fanau.

GALUEGA FAATINO : FA'AALIGA O MANATU

Tuu le avanoa i fanau e faasoa mai ai i ni auala e ao ona tatou faia e fesoasoani ai i le faaleleia o itu ua afaina o le siosiomaga. Ia po o le a foi so tatou sao e fesoasoani ai i le faaleleia o le siosiomaga na faia e le Atua moi tatou?

PESE: Fai mea tonu (Pese ma Viiga 368)

A'OA'OGA:

1. Ia galulue ma le filiga e atiae le malo o le Atua.
2. Ia faamaoni i tiute ua valaauina ai.

3. Aua tatou te faaleagaina lo tatou siosiomaga.

.....

ASO SA: 29 ME 2022

MATAUPU: UA TUMU LE LALOLAGI I LAEI O LE ATUA. (God's robe fills the earth)

SINI: Ia malamalama le fanau e i ai le Atua i mea uma, ma ua tumu ai le lalolagi i lona mamalu ma lona Silisiliese.

TUSI FAITAU: Isaia 6: 1 – 5

FESOASOANI MO FAIAOGA:

O le Atua lava ia e ao ona viia e tagata ola uma, aua o le Atua e mamalu ma Paia. O le Atua o le ola ma le puna o faamanuiaga. O le Atua Silisiliese e tumau e leai sona gataaga. O le Atua e la'ei i le mamalu ma le viiga.

O le vaega o le Tusi na faitauina o lo o tauina mai ai ni vaaiga matautia na vaai i ai le perofeta o Isaia. Ua mavae atu le tupu o Usia talu lona mai lepela ina ua ia taumafai e faoa le tulaga o le ositaulaga. (2 Nofoaiga a Tupu 26: 18-21). Ae o se vaaiga uigaese ma le matautia na iloa e Isaia i totonu o le malumalu, lea na tautino ai e Isaia lona faatauvaa i luma o le Atua. Na vaaia e Isaia le Atua i lona nofoalii mamalu, faatasi ai ma agelu ia poo serafi, o lo o vivii ma fapea ane e paia, e paia, e paia le Alii o 'au, ua tumu le lagi ma le lalolagi i lona mamalu, faatasi ai la ma le asu ua faatumuina atoa ai totonu o le malumalu. O le faailoga ua tumu le malumalu i le paia ma le mamalu o le Atua.

E matua maoae le vaaiga na iloa e Isaia, a o lona foi lea valaauina e fai ma ave feau poo le Perofeta a le Atua, e faailoa lona finagalo i lona nuu. O le alu ane ai la o le agelu ma le malala ola ma tuu i laugutu o Isaia, o le faailoga o le faapaiaina lava lea ma le faamamaina o agasala a le perofeta aua le sauni atu mo le galuega a

le Atua. E ui i se faatauva'a o le tagata, ae na maua le malosi ma le to'a mai le Atua e faatino ai le galuega e pei ona valaauina ai o ia e le Atua. O le ala lea na ia fai atu ai e auina atu o ia i le feau ma le galuega a le Atua.

Ioe, le fanau e, o 'i foi lea ua aoaoina ai i tatou, e leai leai lava se isi ala tatou te maua ai le to'amalie ma le malosi, ua na'o le Atua lava e toatasi tatou te maua ai mea lelei uma. O lo tatou tiute o le faia lea o le finagalo o le Atua, a'o le Atua na te faa tamaoaigaina ma faa aupegaina i tatou mo feau eseese ma tiute ua valaauina ai tatou e Ia. Ia tatou fiafia pea e ola vivii ma tapuai i le Atua, aua o le upu moni, ua tumu le lalolagi i le mamalu ma le paia o le Atua. E pale foi ma laei o Ia i viiga.

GALUEGA FAATINO:

Tuu le avanoa i tamaiti e taumafai e toe faamatala mai po o le a le uiga o le mataupu "Ua tumu le lalolagi i laei o le Atua"?

PESE: O ai ea lo tatou ola (Pese ma Viiga 385)

A'OA'OGA:

1. Ia fiafia e auauna ma vivii i le Atua.
2. E i ai le Atua i so o se mea.
3. O le alofa o le Atua e faasafua mo tagata uma.

.....

ASO SA **5 IUNI 2021**

MATAUPU: **FA'ATALITALI (Waiting)**

SINI: Ia malamalama tamaiti i le taua o le fa'atalitali i fa'amanuiaga a le Agaga Paia, e ta'ita'iina ai lo latou ola.

TUSI FAITAU: Galuega 2:1-13

FESOASOANI MO FAIAOGA:

Fa'atalofa atu ia te outou le fanau i leni fo'i taeao. O le ulua'i Aso Sa leni o le masina o Iuni. Ae o le tatou mata'upu o leni taeao, o le "Fa'atalitali". Ua tatou iloa ma malamalama i le uiga o le upu fa'atalitali. O le upu fa'atalitali e sau mai le upu o le fa'atali.

O le tala leni i le Aso Penetekoso, po'o le aso o le afio ifo o le Agaga Paia. E pei ona ta'ua i le Galuega 1:8, le folafolaga a Iesu i ona so'o, e maua e i latou le mana, pe a afio ifo le Agaga Paia i luga ia te i latou, e fai ai i latou ma molimau ia Iesu Keriso, pe a tu'ua e Iesu la latou mafutaga.

Lea la ua amata lava le mataupu leni e 2 o le tusi i Galuega, i le fa'apea mai o le tusitala, "Ua o'o foi i le aso Penetekoso, sa i ai uma i latou i le mea e tasi ma le loto gatasi". O lona uiga, o lea ua potopoto fa'atasi le auso'o ma isi tagata i le mea e tasi ma le loto gatasi, e fa'atalitali le meaalofa lea na folafola atu e Iesu ia te i latou.

O le a le meaalofa? Ioe, o le Agaga Paia o le Atua. E ui lava ina ua tu'ua e Iesu le latou mafutaga ma ona so'o, ae ua talia lava e le auso'o i o latou loto le fetalaiga a Iesu, e fa'atali mo le afio ifo o le Agaga Paia. Ia lea la e pei ona i ai o le mea na tupu i lea aso. Faimai o le matagi ua agi tele mai ma ua tumu ai le fale uma sa i ai i latou.

O le upu matagi tamaiti i lona fa'aliliuina mai le gagana Eperu, e tutusa ma le upu Agaga. O lona uiga o le matagi lea na agi malosi mai ma fa'atumuina ai le fale sa i ai le auso'o, o le Agaga Paia lava lena o le Atua, e pei ona folafolaina mai e Iesu.

Ua iloa foi e i latou sa i ai i lea taimi ma latou molimau i le mea na tupu, o laulaufaiva ua peiseai o le afi, ua vaevaeina i luga o le auso'o, ma ua latou fa'alogu atu foi, ua tautatala mai le auso'o i gagana 'ese'ese, e ui o i latou uma o Iutaia. O lona uiga o le matagi, o le Agaga Paia lea o le Atua, ae o laulaufaiva afi, o gagana ia a le lalolagi ua tu'uina atu i le auso'o, latou te talai ai le Talalelei ia Iesu Keriso.

O le vavega ua tupu, ina ua faatalitali ma le onosai le auso'o i le Agaga Paia o le Atua. Le fanau, e ese le taua o le ola fa'atalitali i le Atua. O le tele o taimi tatou te faia ai fa'ai'uga sese, ma tatou pau'u

atu ai i le agasala, ona ua tatou le lavatia ona onosai. Manatua e outou le fanau, o le Agaga Paia o le Atua, e le sau fa'anatinati, ae e malosi ma mata'utia lona pai mai i le loto o le tagata pe a o'o ina sau.

Ae a afio mai foi le Agaga Paia o le Atua e fa'atumu i tatou, tatou te lagonaina lava lo tatou mafanafana, ma e tutupu foi vavega i o tatou olaga. O le upu moni lava lea. E mafua ona le tutupu ni vavega i o tatou olaga, ona ua tatou fa'amoemoe i lo tatou lava malosi ma le poto, ae ua tatou le tapā se fesoasoani mai o le Agaga Paia o le Atua, ma tatou fa'atalitali i ai ma le onosai.

Na mafaia lava e la tatou uo o Iesu ona fa'atino mea uma lava na afio mai e fa'atino, e o'o lava i lona maliu. Na mafaia e Iesu ia mea, aua sa fa'amoemoe tasi ma fa'atalitali pea i le fa'atonu mai o le Agaga Paia o le Atua. O le Agaga Paia lea na ia maua ai le malosi, e fa'ataunu'u le fa'aolataga mo le lalolagi agasala.

GALUEGA FA'ATINO.

**Li'o mai upu o lo'o i lalo, i totonu o le paso.*

L	O	S	O	K	E	T	E	N	E	P
F	A	A	T	A	L	I	T	A	L	I
A	A	U	S	O	L	I	P	U	A	A
I	T	S	L	S	E	I	P	N	K	T
A	M	O	I	A	A	L	P	I	L	E
P	G	O	N	S	U	U	K	F	I	M
A	I	K	U	R	E	F	A	T	P	O
G	E	L	A	M	A	A	A	S	I	A
A	L	U	N	I	E	P	E	I	G	A
G	O	P	U	V	F	L	I	F	V	M
A	I	E	R	U	S	A	L	E	M	A

Fa'atalitali, agi, Agaga Paia, Penetekoso, Metai, Ierusalema, auso'o, Elama, Pafulia, Asia, Lauaufaiva, Ferukia, Lipua, Afi.

PESE: (fati: Misiluki Su'a. "A,E,I,O,U,F.... ma le V.

1. O le aso Penetekoso, fa'atali ai o le auso'o
I le afio ifo o le Agaga Paia, e pei ona fetalai le Mesia
E afio a'e i le lagi, auina ifo le fesoasoani
Le auso'o ua potopoto ma fa'atalitali ma le loto e tasi
2. Le matagi ua malosi mai, le fale ua fa'atumulia ai
Ma laulaufaiva ua pei ose afi ua latou tofusua ai.
Tautala i gagana 'ese'ese, ua ofo ai o le to'atele
Pe le o Iutaia ea ua tautala mai i gagana e tele.

A'OA'OGA:

1. Tatalo mo le fesoasoani a le Agaga Paia e sa'o ai au fa'aiuga.
2. E tutupu vavega i o tatou olaga pe a fa'atalitali i le Agaga Paia o le Atua
3. E faia e le Atua mea sili mo i tatou pe a tatou onosai.

.....

ASO SA 12 IUNI 2021

MATAUPU: O LE EKALLESIA, O TAGATA
(The church is people)

SINI: Ia malamalama tamaiti i le taua o le amana'ia o tagata uma i totonu o le Ekalesia a Keriso.

TUSI FAITAU: Roma 16:1-16

FESOASOANI MO FAIAOGA.

Fa'atalofa atu i le tatou vasega i lenei foi Aso Sa. O le tatou mata'upu fou o le aso lenei e fa'apea, **“O le Ekalesia, o tagata”**. O le Ekalesia, e mafai foi ona ta'u o le aulotu. O le Ekalesia o le fa'apotopotoga o ni tagata o e ua latou loto fa'atasi, e fa'atu pe atia'e le galuega a Iesu.

E pei foi ona i ai le tatou Ekalesia nei i totonu o lo tatou nu'u. E ui foi ina tele Ekalesia ma o latou igoa ua fa'aigoaina ai e tagata, ae auga uma lava i le fa'amoemoe e tasi, o le mafutaga ia mafanafana i le va o tagata, e tusa ma le finagalo o le Ali'i o Iesu

O le Ekalesia i Roma, e le i fa'atuina e Paulo, ma e le i o'o lava foi i ai Paulo i le Ekalesia lea. Peita'i o i latou o ē na malaga mai i Korinito ma feiloa'i ai ma Paulo, o i latou la ia na fa'atuina le aulotu po o le Ekalesia lea i Roma.

E pei ona ta'ua e Paulo suafa o i latou o ē na fesoasoani ia Paulo i le galuega o le tala'iina lea o le suafa o Iesu i tagata. O le tusi a Paulo i le Ekalesia i Roma, na tusia mai i Korinito i le tausaga 57 TA.

O le ulugali'i o Pisila ma Akula, na fa'ate'a ese mai Roma, ona omai lea o le ulugali'i lea ma nonofo i Korinito, ona fetau ai lea ma Paulo. E faapea le tala o le ulugali'i foi lea, sa i ai i le taimi na afio ifo ai le Agaga Pa'ia i luga o le auso'o, i le aso Penetekoso.

Lea la ua feiloa'i i la'ua ia ma Paulo, ma la fa'alogo foi i a'oa'oga a le aposetolo, ma saga fa'atupu atili ai lo la'ua fa'atuatua i le Ali'i o Iesu. O le ulugali'i la lea e manatu nisi o le ausu'esu'e o le Tusi Pa'ia, o i la'ua ia na fa'atuina le Ekalesia lea, ina ua toe fo'i i la'ua i Roma.

O le mata'upu la lea o le tusi lenei a Paulo i Roma, o lo'o fa'ailoa ai e le aposetolo lona Agaga fa'afetai i tagata o le Ekalesia. E ui e le'i feiloa'i Paulo ma le toatele o i latou, ae ua lava lava le feso'ota'iga ma Pisila ma Akula, e fai ma molimau i le aposetolo, o le fa'atuatua o tagata o le Ekalesia.

O nisi o tagata o lo'o ta'ua e Paulo o latou igoa, e fa'apea o ni pologa i totonu o le malo o Roma. E ui o ni pologa, ae na o'o lava i ai le fa'afetai a le aposetolo ma ta'ua ai o latou igoa, o le fa'ailoga o lona amana'iaina o i latou. Ae ose fa'atupu fiafia foi lea i loto o

tagata, ma saga tupu atili ai pea lo latou fiafia i le Talalelei ia Iesu Keriso.

E le gata i lea, ae o le fa'amausaliina ai o le agaga galulue fa'atasi i tagata o le Ekalesia. E taua lo tatou amana'iaina o tagata uma i totonu o le tatou Ekalesia. Tusa lava po'o le a le ituaiga tagata, o le finagalo o le Ali'i, ia tatou alolofa ma fa'ataua tagata uma.

E pei lava ona fai e le aposetolo. E ui e le i feiloa'i i le to'atele o tagata o le Ekalesia i Roma, ae ua avea lava lona tolaulauina o suafa uma o tagata o le Ekalesia i lana tusi, e fai ma ala e fa'atupuina ai le olioli i loto o tagata.

GALUEGA FA'ATINO:

Taliga Fesili:

1. O fea lea na tusia ai le tusi lenei i Roma?
Tali: *Korinito
2. O le a le tausaga na tusia ai?
Tali: * 57 TA
3. Aisea na ta'ua ai e Paulo igoa o tagata o lo'o ta'ua i le tala?
Tali: *Fa'ailoga o lona amana'iaina o i latou.
4. E toafia tagata o lo'o ta'ua e Paulo o latou igoa i le tusi faitau?
Tali: *26

PESE: 74 (Pese ma Viiga)

A'OA'OGA:

1. Ia tatou alolofa i so'o se tagata.
2. Ia amana'ia galuega lelei ua faia e nisi tagata.
3. O Iesu Keriso le ao o le Ekalesia.

.....

ASO SA **19 IUNI 2021.**

MATAUPU: **FA’AALIGA O LE ATUA**
(Vision of God)

SINI: Ia malamalama le vasega e ‘ese’ese lava auala e fa’aali mai ai le Atua i tagata ua ia filifilia, e fa’ailoa ai lona mamalu.

TUSI FAITAU: Esekielu 1:1-14

FESOASOANI MO FAIAOGA:

E tali tutusa lava le vala’auina o Esekielu ma le vala’auina o Isaia ma Ieremia. O Esekielu o ia o le ositaulaga. Ae na filifilia pe na vala’auina o ia e le Atua, e fai ma perofeta mo lona nu’u o Isaraelu, a’o i ai le nu’u o Isaraelu i le vaitau mulimuli o le tafeaga.

O le fa’aaliga na iloa e Esekielu, o le fa’aaliga foi lea na iloa e Ioane le papatiso, ina o papatisoina Iesu. O le lagi ua avanoa, ma va’aia ai le mamalu o le Atua. O le fa’aaliga na iloa e Esekielu, o le lagi ua avanoa, ona agi mai lea o le afa mai i le itu i matu.

O le agi mai o le matagi tele po o le afa, o le fa’aaliga lea na iloa e le auso’o, a’o nonofo ai i latou i Ierusalem e fa’atali ai le afio ifo o le Agaga Paia, e pei ona folafolaina i ai e Iesu. O le upu matagi i lona fa’aliliuina mai le gagana Eperu, e tutusa ma le upu Agaga.

O lona uiga o le matagi e pei ona va’ai i ai Esekielu ma fa’alogoina lona agi malosi mai, o le Agaga lea o le Atua, ua taia ai lana auauna o Esekielu. O le ao tele ma le afi, o le fa’aailoga lea o le Atua auai, e pei foi ona i ai le ao fa’aniutu i le ao ma le afi fa’aniutu i le po, a’o savavali le fanauga a Isaraelu i le sami ulaula.

O lona uiga o le ao ma le afi e pei ona va’aia e le perofeta, o le fa’aailoga lava o le auai o le Atua i lana auauna, ao tapena ai o ia mo le fe’au o le fa’aolataga mo Isaraelu.

Mai totonu o le afi, na alu a’e ai le fa’atusa o mea ola e fa, ma ua tino mai i le tino o le tagata i latou. O le fa’atusa o manu e fa, o agelu ia e toafa o lo’o auauna i le Atua Silisili Ese. Ua foliga i latou

i manu mata’utia, e pei o le leona, o le fa’aailoga o le paoa ma le malosi. O le povi o le fa’aailoga o le atamai ma le onosai, fa’atasi ai ma le lē mafai ona solomuli i se galuega e tu’uina atu i ai.

O le aeto, o le fa’aailoga o le silasila mamao ma le televave. O lona uiga o agelu a le Atua e pei ona iloa e Esekielu i le fa’aaliga, o i latou lava o avefeau a le Atua, e mamao la latou silasila, e tele vavave foi i feau uma e finagalo ai le Atua, ae o i latou foi o lo’o i ai le malosi ma le paoa e faataunu’u ai le finagalo o le Atua.

Ae o le mea pito sili ona taua i lenei fa’aaliga, o le auai o le Atua i ana agelu i taimi uma, e fa’amalosi ma fa’alototele ia i latou, ina ia latou faia le finagalo o le Atua ma le lē fefefe.

O le uiga atoa o lenei fa’aaliga mo le Perofeta, o se fa’alototele ma se fa’amalosi’au mo Esekielu, ao sauni atu e fai le finagalo o le Atua, po o le avea o ia ma Perofeta e ta’u atu le finagalo o le Atua i lona nu’u.

Mo tatou lava ia le fanau, e ese le taua o lo tatou malamalama lelei i le finagalo o le Atua. O le mea ia aua ne’i galo ia i tatou, e ‘ese’ese lava auala e fa’aali mai ai le Atua ia i tatou o lana fanau. Aua nei o tatou manatu o tatou o tamaiti, ona tatou fa’apea lea e le fa’aali mai le Atua ia i tatou.

Mo tatou lava ia le fanau, e mafai ona fa’aali mai le Atua ia i tatou, e ala mai i isi tagata. Mo se fa’ata’ita’iga, a fai e te mataala ma e atamai, e mafai lava ona a’oa’oina oe mai lou va’ai i le faiaoga, ma e mafaufau, aisea ua mafai ai e le la tagata ona faiaoga, ma a’oa’o mai ia te au?

O le tali la o lena fesili, o oe. E avea la lena mea, e mafai ai ona fa’amalosi oe, e te to’aga e fai au meaaoga ma tinou e su’esu’e, ina ia tau lau o lou fa’amoemoe. E mafai foi ona fa’amalosi i tatou e fai galuega lelei, ina ua tatou va’ava’ai i galuega lelei o fai e isi tagata.

Nei o tatou manatu mama i mea ia, ae o nisi foi ia o auala e mafai ai ona fa’aali mai le Atua ia i tatou ma filifilia ai i tatou e fai ma ana mea faigaluega.

GALUEGA FA'ATINO: Tusiga solo

Tusi mai sau solo e fa'atatau i le fa'aaliga na iloa e Esekielu. Lua fuai'upu o le solo, ae ono laina i le fuai'upu.

PESE: 5 (Pese ma Viiga)

A'OA'OGA:

1. Ia fai i tatou ma ave feau lelei o le Talalelei a Iesu.
2. O le usita'i ma fa'alogo, tatou te lagonaina ai le fa'aali mai o le Atua.

.....

ASO SA 26 IUNI 2021.

MATAUPU: FA'ATINOINA O TIUTE TAU'AVE
(*Taking responsibility*)

SINI: Ia malamalama le fanau, o le fa'amasinoga amiotonu a le Atua, e fa'asino tonu lava i le tagata ma lana fa'atinoga, pe lelei pe le lelei foi.

TUSI FAITAU: Esekielu 18:1-17

FESOASOANI MO FAIAOGA:

Fa'atalofa atu ia te outou le fanau i lenei foi taeao fou. Vi'ia ai le alofa ma le agalelei o le Atua, aua o lea ua tatou toe feiloai i lenei taeao i lona alofa. Ae o le tatou mata'upu o le taeao lenei e fa'apea, "FA'ATINOINA O TIUTE TAU'AVE". O le upu tiute, o matafaioi ma galuega fa'atino ia e patino i le tagata lava ia.

Fa'ata'ita'iga, o matua, ia po o le tama ma le tina. O o la tiute tau'ave, o le tausia ma le va'aia o le fanau. A'oa'o ma fa'atonu le

fanau i ala o le Atua, ma ia fa'amaoni i la la'ua tautoga na faia i luma o le Atua.

O le faife'au, e ao ona fa'amaoni e folafola atu le Talalelei a le Atua, ma ta'ita'i tagata uma i le Atua, e aunoa ma le fa'aitu'au pe i ai foi nisi amioga e le tusa ai ma le finagalo o le Atua.

E o'o foi i faiaoga, pe faiaoga o le aoga Aso Sa, pe faiaoga foi i aoga palagi, e ao lava ona fa'atino ona foi tiute, e tusa ma aiaiga o lona vala'auina. Ia faia ma le fa'amaoni ma ia fa'alogo pea i le fa'atonu mai o le Agaga o le Atua.

O tatou foi le fanau, e i ai foi o tatou tiute fa'afanau e ao ona fa'atino. O lo tatou tiute o le fa'alogo ma usitai. Ia ava ma mata'u i le Atua, ma ia fiafia i le aoga Aso Sa ma le lotu. Ia fa'amaoni i le faiga o a tatou meaa'oga, ma fa'amaoni i le fa'atinoina o feau e fa'atonuina ai i tatou e o tatou matua.

Aua, pei o le feau lea (o lea) e folafola atu e le Perofeta o Esekielu, i tagata o le nu'u o le Atua, po'o tagata o Isaraelu, a'o i ai i latou i Papelonua ona o le tafeaga.

O lea ua amata lava le mata'upu e 18, i le fesili a le Atua e ala atu i lana auauna, mo tagata o lona nu'u. Po'o ai na fai atu a ai e matua le vine moto, ona magiagia ai lea o nifo o le fanau.

Aua o le talitonuga lea o Isaraelu ma o latou manatu ane ai, ua mafua ona fa'atafea ma ola pologa Isaraelu po'o ituaiga e 10, ona o le agasala a Reopoamo. Ae ua mafua ona tigaina ma pologa Iuta, ona ole agasala a Iuta ma Peniamina. O le manatu lea o lea ua afua ai ona fesili le Atua. I le finagalo o le Atua, o ia e faia le fa'amasinoga, ma o lana fa'amasinoga foi e amiotonu lava.

Ae o lea ua foliga 29ag i lenei fa'a'upuga, ua tu'umau laloina ai lona tulaga Atua ma lana fa'amasinoga amiotonu. Ma ua foliga mai ai o ia o se Atua sau ma le le alofa.

Lea la ua fofola atu ele Atua le fala e tauala atu i lana perofeta ma fa'ailo i lona nu'u le sese o lea manatu. E pei ona ta'ua i le fuai'upu e 4-13, ua fetalai mai le Atua, "Fa'auta o agaga uma, o o'u lava i latou; e pei o le agaga o le tama ona fai mo'u, e fa'apea foi le agaga o le atali'i; o le tagata e agasala, e oti ia. Ae afai e amiotonu le tagata ma ua faia le amio e tatau ma le amiotonu; e ola lava ia".

O lea ua fa'amanino mai e le Atua, e leai se mea o le a afaina ai fua le isi tagata, ona o le agasala a le isi tagata. O le uiga o le manatu,

afai lava e amio leaga le tama ma le fa'alogo i le Atua, e i luga lava o ia ona leaga. Ae afai e fa'alogo ma usita'i le atali'i, ma mata'u i le Atua, e i luga foi o ia ona manuia.

O lona uiga la, o le fa'atinoina o o tatou tiute tau'ave, e ao ona faia ma le fa'amaoni ma usitai i le fa'atonu mai o le agaga o le Atua. Aua o le mea ua mautinoa e tusa ma le tusi faitau o lenei aso, e le mafai ona galulue o tatou matua, ae manuia ai tatou le fanau. E fua lo tatou manuia, ina ua fa'atino fa'atasi o tatou tiute ma o tatou matua.

O le uiga o le manatu, e mafai ona manuia a tatou taumafaiga ma i'u lelei a tatou aoga, ina ua fa'atino la tatou pito la'au, o le to'a'aga e fai a tatou meaa'oga, ma to'a'aga e tatalo ma le fa'atauanau i le Atua. Ia fa'amaoni foi ona tatou saili atu i le Atua i taimi uma. Afai tatou te faia fa'apea, ona le taumate lea o le i'uga manuia o o tatou olaga.

Aua e fiu lava le tama ma le tina e tatalo ma totogi lou pili ma ave oe i le aoga ma 30ag ii le Atua i le ao ma le po, ina ia manuia lou olaga, ae afai na o le tafao lava ma faifai telefoni, ma le moe lau mea e fai, e le mafai lava ona i'u manuia lou taumafai.

E pei foi ona faimai o le aposetolo o Paulo, "O outou le fanau, ia outou fa'alogo i o outou matua i le Ali'i". O lona uiga ia tatou fa'alogo ma usitai i o tatou matua, aua o le finagalo lea o le Ali'i le Atua. Manatua o le fa'atinoga o o tataou tiute tau'ave fa'afanau, e fa'amoemoe i le fa'atonu mai o le agaga o le Atua.

GALUEGA FA'ATINO.

Taliga Fesili:

1. O le a foi le muagagana fa'a-lutaia lea ua fa'asese e le Atua?

Tali: E 'ai e le tama le vine moto, ae magiagia ai nifo o le atali'i.

2. O le a le finagalo o le Atua i lea mau e pei ona ta'ua i le mata'upu?

Tali: E i luga lava o le tagata lona tau e tusa ma le fa'atinoina o ona tiute tau'ave.

3. O a o tatou tiute fa'afanau e pei ona fa'amatalaina i le tala?
Tali: O le usita'i ma fa'alogo, to'aga i le aoga, alofa i matua ma alofa i le Atua.

4. Tauloto fa'atasi mai le tulafono e lima.

PESE: (380: Pese ma Viiga)

A'OA'OGA:

1. Ia fa'amaoni i le faiga o meaa'oga.
2. Ia tatou alolofa o tatou matua.
3. E tau mai I tatou e le Atua, e tusa ma a tatou faatinoga.

.....

ASO SA: 3 IULAI 2022

MATAUPU: **O LE ATAMAI E LE'I MAFAUFAUINA MAI LE TAGATA ESE.**
(Unexpected wisdom from the stranger)

SINI: Ia malamalama le vasega, o le mea e lilo i le tagata, o lo o taoto ai le atamai silisili ese o le Atua.

TUSI FAITAU: Faamasino 13: 2 – 20

FESOASOANI MO FAIAOGA:

O le a'oa'oga ua masani ai matua i fanau ma le toatele lava o tagata, e leai lava se isi tagata e maua mai ai fautuaga lelei mo le olaga manuia nai lo matua ma tagata e alolofa moni. Ia talanoa foi ma faasoa i tagata talafeagai ina ia mafai ona maua ai ni faaiuga tatau mo le soifua manuia o aso uma. E faapea foi i le gasologa o le soifuaga o aso uma, tatou te faasoa ma tagata masani ma e tatou te

iloa lelei aua ua mautinoa; ua malamalama le isi i le tasi. O lona uiga, e le mafai ona tatou mafaufauina se faasoaga ma se tagata ese tatou te le iloa. E oo foi i le gasologa o mea o le soifuaga o aso uma, tatou te le mafaufauina lava ni mea matautia e tutupu e ese mai i mea ua mafai e le agavaa ma le tomai ua tatou maua. E pei o mea e tutupu ona o natura o mea, o mea ua mafai ona taulimaina ma le faagasologa masani lava tiute tauave o aso uma. E le mafai la e se tasi ona toe suia pe toe faaopopo i ai nisi foliga fou i lona tino mai. Na o le pau le atamai tatou te faalagolago iai, ua na o le silisili ese o le Atua e mafai ai.

O le tala i le aiga o Manoa ma lona toalua, o se ulugalii mai le nuu o Soraa i le ituaiga o Tanu, a o i ai pea Isaraelu i lalo o le puleaga a Filisitia i tausaga e fasefulu. E leai sa laua fanau aua e pa le fafine. Ua talia foi e lenei aiga le tulaga lea i lo la aiga. O foliga lava la ia o lo la aiga ua soifua ai i aso uma. E le o i ai se faamoemoe ia te i laua, e i ai se suiga fou i lo la aiga, aua ua la talia lava lea tulaga. O le oo mai la o le agelu a le Alii ma faailoa atu i le fafine le feau o le a fanaua e ia se tama tane e fai ma faaola ia Isaraelu ai lima o Filisitia. Ai lava o le manatunatu o le fafine i lona le fanau, na ala ai ona ia faaupua le tagata lea i lona ta'u atu ia Manoa; o le tagata o le Atua i lona ulua'i fa'aali mai i le fafine. E ui lava la i le faamatalalaina o le tagata lenei e le fafine, peita'i o lea ua iloa ai, o le tagata o le Atua po o le agelu; o le tagata ese lea. Na iloa i lana gagana, o lana feau foi, e le o se atamai e ausia e le faatauvaava o le tagata. E i ai le lagona na mateia lava e le fafine i le aumai o le faaaliga mo ia, ua amanaia ai e le Atua lo la aiga ma foaiina se tama tane mo i laua. Atonu o le ala foi lea o le manatu o Manoa e ta'u mai ia te ia pe a toe fa'aali mai le agelu ina seia faamautinoa foi mo ia. E ui foi ina ua uma ona faailoa mai ia te i laua le faaaliga ae na manatu lava i se faailoga e iloa ai o lenei tagata o le agelu mai le Atua. O lea lava na faia ai e le agelu le auala e ala i le taulaga ma auala e alu a'e ai i le lagi.

O se mea e le i mafaufauina e Manoa ma lona toalua e i ai se avanoa e ono suia ai lo la aiga mai le mea masani sa i ai, i le leai o sa laua fanau. Ua faia ai e le Atua le vavega i lenei aiga, aemaise o le fa'aaogaina o lenei aiga e auala mai ai le faaolataga mo Isaraelu. Atonu foi o Manoa ma lana ava, o ni tagata sa tumau o la faatuatua

i le Atua ua afua ai lenei manuia tele mo i laua. O se a'oa'oga foi lea mo i tatou, o le a lo tatou faatauvaava, e faailoa mai lava e le Atua le auala e fa'aaogaina ai lo outou soifua ma lo tatou ola ina ia viia ai lona suafa. E i ai foi taimi tatou te manatu ai ua uma lo tatou iloa, ae faailoa ai le silisili ese o le Atua.

GALUEGA FAATINO: Tusiga Solo.

Tusi sau solo faatatau i le ulutala; "**O le atamai e lei mafaufauina mai le tagata ese.**" Ia le silia ma le lua fuaiupu, ae taifa laina i le fuaiupu. Fa'aali ou manatu faatatau lava i le faamatalaina e le faiaoga o le mataupu.

PESE: O le Atua silisili ese, malosi ofoofogia.

A'OA'OGA:

1. E auala eseese mai lava le finagalo o le Atua mo i tatou.
2. O le atamai silisili ese o le Atua e tutupu ai vavega i le ola o le tagata.

.....

ASO SA: 10 IULAI 2022

MATAUPU: O A'U O SE LEOLEO O LO'U USO?
(*Brother's keeper?*)

SINI: Ia malamalama le vasega i le finagalo o le Atua ina ia tatou ola ma tumau i lana amiotonu; ma ia tatou fealofani.

TUSI FAITAU: Kenese 4: 1 – 16

FESOASOANI MO FAIAOGA.

Ua a'oa'oina i tatou i totonu o tatou aiga i le tatau lea ona faia o le mea tonu ma le sa'o. Ia faapea foi ona tatou maua le ola galulue faatasi, fetausia'i, felagolagoma'i ma fe'oe'oea'i, ina ia mafai ona maua le maopopoga; aemaise le nonofo fealofani o aiga, nuu, malo faapea foi i Ekalesia. O se anavatau ua leva ona tu'u gutu ma tu'u ta'iga mai e tuaā ua mavae seia o'o mai lava i o tatou taimi. Peitai, ua manino foi au o fala i le tulaga e o'o i ai mafutaga, pe a le mafuta i le anavatau lea. E le gata i le malepelepe ona o le felotoa'i, ae ua iloga ai foi le manatu faapito o le tagata e manatu e tutoatasi lava o ia i ona manatu. Ua fa'aalia ai foi ma le tele o isi mau uiga le lelei o le tagata, ona e le o mafai ona tuu aunoa i tatou e le fili; ina ia talepe mafutaga ua lelei. A o le upu masani, e leai lava se isi e tu faamauga. O uiga le lelei ia o lo o faailoa mai i le ulutala o le tatou mataupu i lenei taeao tamaiti. O a'u se leoleo o lo'u uso? O se fesili po o se fuaitau ua matua aliali ai le ola fia tutoatasi o le tagata. O ni upu ua tetee ai e le isi uso le tasi ma ua fefulituaa'i. O ni upu faamaualuga ma le faasausili, ua faailoa mai ai le leai o se alofa i le va faale-uso; aemaise ai, ua leai se fealofaniga i totonu o se aiga.

O vaaiga ia o lo o atagia mai lea fesili. O lona uiga, i se vaai faale-maufaufau i ai i le tusi faitau; ma le tali a Kaino le ulumatua a Atamu ma Eva ina ua fesiligia e le Atua; po o fea lona uso o Apelu. E le o se tulaga lelei ua oo i le au uso lea ma lo latou aiga. Manatua foi, o le ulua'i aiga lava lea i le lalolagi i lona amataga, e pei ona faamatala mai ai i le amataga o le tusi faitau. E le o matua'i manino mai i le tusi faitau, po o le a le ituaiga aiga; e i ai le aiga o Atamu ma Eva, ma le la fanau o Kaino ma Apelu. Pau le mea ua mautinoa i le tala i le faiga taulaga a tama nei e toalua, ma le iuga na oo iai. Na fasiotia e Kaino o Apelu lona uso ina ua pulea e le ita lona loto ona ua le silasila le Atua i lana taulaga. O lea na fesiligia ai e le Atua po o fea lona uso o Apelu; ae tali Kaino: "Ou te le iloa, o a'u ea le leoleo o lo'u uso?" Ua manino ai le leai o se felagolagoma'i, e le o i ai foi se galulue faatasi, aemaise ai, ua tineia le fealofaniga i le va o le uso, ma ua talepe ai le sootaga faaleuso. Peita'i, ua faailoa ai foi le silafia e le Atua o mea uma, o lana faamasinoga amiotonu; aemaise o lona alofa e tuu avanoa ai i

le tagata. E ui i le ogaoga o lenei agasala ua faia e Kaino, ae ua faailoa ai e le Atua tu'utu'uga o lana faaiuga. E fai ma maumausolo ma faasevasevaloina, e le oti foi ia ina ua ia lagona le salamo; e pei ona ia fai mai; ua ia le lavatia lana agasala ua faia i luma o le Atua.

O se a'oa'oga foi lea mo i tatou le fanau, ia maua lo tatou nonofo fealofani ma le fetausia'i. E le mafai foi ona tatou nana pe sosola ese mai le silafaga a le Atua, aemaise ia mafai ona tatou lagona le salamo faamaoni i luma o le Atua ma faailoa le mea moni; ona mautinoa lea le faasaoina o i tatou.

Uiga o Upu.

- i) maumausolo - tagata e le mau/nofo I se nofoaga se tasi, ae nofonofo solo.
- ii) faasevasevaloina - olaga le mautonu/ tagata ua ola ma le lē mautinoa lona taunuuga.

GALUEGA FAATINO: Tusiga Parakalafa.

Toe faamatala mai le tala i au lava upu e faailoa ai lou malamalamaaga i le tala sa faamatalaina, ia lava ni parakalafa se lua.

PESE: Pese ma Viiga – 147.

A'OA'OGA:

1. Ia toa e ta'u le mea moni.
2. Ia tumau i le fealofani.
3. E silafia e le Atua mea uma tatou te fai.

.....

ASO SA: 17 IULAI 2022

MATAUPU: **MALOSI I TOTONU O LE VAIVAI**
(*Power in weakness*)

SINI: A’oa’o le vasega ia malamalama e ui ina tatou vaivai, tatou te malolosi pea ona o le faatasi mai o le Atua ia te i tatou e ala i lona Agaga Paia ua fai ma o tatou fesoasoani sili.

TUSI FAITAU: 2 Korinito 12: 1 – 10

FESOASOANI MO FAIAOGA.

O le malosi ma le vaivai, o ni upu e fete’ena’i uiga. A vaivai le tagata, o lona uiga; ua uma atu lona malosi. E masani foi ona faamatalaina ai le faatauvaava o le tagata. A o le malosi, o le tagata ua atoa i ai mea uma; o le tomai, o le tamaoiga, ma le tele lava o mea ua faamatalaina ai le tagata malosi. E le mafai la ona o faatasi upu nei e lua. Peita’i o lea ua fai mai le tatou mataupu; malosi i totonu o le vaivai.

O Korinito, o se tasi o aai i totonu o Asia itiiti i ia taimi a o i ai le lalolagi i puleaga a le malo o Roma. O se aai e tele le tamaoiga sa i ai auā o le tasi lenei o aai sa faaogatonu i ai fefaatauaiga o oloa. O lona uiga, e tatau foi ona tele puapuaga ma faafitauli e feagai pea ma le Ekalesia aemaise o lona tau amata ai. O le ala lea o le faailoa pea e le Aposetolo o le tasi lenei o ana filosofia, e pei ona i ai le mataupu; I le tele o ana tusitusiga o lo o i ai. Na te aumaia ai le ata lea o le tagata faatauvaava ma le vaivai, ae faalagolago i le galue mai o le Aua e ala i lona Agaga e faamalosi i le tagata. Na te aumaia lava lona tagata e faamatala mai ai se feau taumomoli a le Aposetolo mo Ekalesia e tusi i ai, ina ia fai o ia ma faataitaiga i tagata. O lea foi e i ai le mataupu lenei, o lo o talanoa ai lava Paulo i ona lava puapuaga. O ona puapuaga i le feagai ai ma lana galuega tala’i i le Talalelei. O lo o ia toe faamatala ai Iesu, le na valaauina o ia ina ia fai ma Aposetolo. O le ala lea o le mitamita o Paulo i ona

puapuaga ona o Keriso ma lana Talalelei, aua o lona malosi lea. E pei lava o ana upu, “e le o toe ola a’u, a o Keriso ua ola i totonu ia te a’u.” Ua iloa lelei foi e Paulo lona faatauvaava, o le uiga ia o ana upu, “...Aua pe a ou vaivai, ona ou malosi ai lea.” Ua mautinoa e Paulo e leai sona malosi po o se atamai, o ia o le tagata vaivai. Ua na o le pau lea o le malosi o lo o faasaoina mai ai o ia i le tele o faigata o le galuega latou fetaiiai. Ua faamaulalo lava o ia ia te ia, a ua tuu tasi lona faamoemoe i le Alii ina ia tumau ai i ona luga le mana o Keriso; o le malosi lea na faatino ai lana galuega. Ua tuu lava i le Atua lona faatuatuaga na te faatumu mai lona vaivai i le tino, mafaufau ma le agaga, ina ia atoa tino o le tama i le faatinoina o le galuega ma tele ai le viiga o le Atua.

Ua a’oa’o mai foi lenei tala mo i tatou, ina ia tatou lagona lo tatou faatauvaava i luma o le Atua ma lo tatou talitonuga e faatumu mai I tatou e le tumu o le Atua i le tino, mafaufau ma le agaga; aua faiva ma tiute eseese o lo o tatou galulue ma faaogaina ai lo tatou ola. Aua foi ne’i o tatou mitamita i se malosi ma se potu tatou te maua, a ia tatou mitamita i le Alii aua o Ia lea o le pogai o le potu ma le malosi uma lava. Ia manatua, e ui ina tatou vaivai, ae tatou te malolosi pea pe afai e tumau lo tatou faatuatua i le Atua.

GALUEGA FAATINO: Taliga fesili.

Tali mai i fesili nei e uiga i le mataupu o lenei Aso Sa.

1. Aisea e mitamita ai Paulo i le Alii?
2. Faamatala mai i se parakalafa i au lava upu le uiga o le autu o le mataupu.
3. O le a le uiga o upu a Paulo; “aua pe a ou vaivai, ona ou malosi ai lea.”
4. O fea le mea e tu ai le aai lenei o Korinito?

PESE: Tumau mai oe lo’u nei matai.

A’OA’OGA:

1. Ia fai i tatou ma faataitaiga lelei mo isi.

2. Ia tatou galulue mo le viiga o le Atua ae le o tatou.
3. Ia tatou mitamita i le Alii, o le pogai o lo tatou malosi.

.....

ASO SA: 24 IULAI 2022

MATAUPU: SAPASAPAIA E AGELU
(Supported by angels)

SINI: A’oa’o le vasega ia malamalama, e leai lava se isi mana ma se isi malosi e mafai ona tatou faalagolago i ai i taimi uma; ua na o le Atua lava.

TUSI FAITAU: Mareko 1: 12 – 13

FESOASOANI MO FAIAOGA.

O le sapesapaia e agelu, o le tautoaluaina lea e agelu po o le mafutaina e agelu. O agelu foi, ua tatou masani i lona faamatalaina, o avefeau ia a le Atua. A o se tasi lenei o latou matafaioi o lo o atagia i le tatou mataupu I lenei taeao, aemaise le tele o tala o lo o ta’ua ai foi i le Tusi Paia. O le lagolagosua lea i tagata vaivai, e puipui ma tau tata’i le tagata I le ala tonu, aemaise o se auala e saili mai ai le Atua i le tagata, e faamafanafana ma toe fuataina le malosi o le tagata.

O lea ua mavae atu le papatisoina o Iesu e Ioane i le vai o Ioritana ma le siufofoga mai le lagi; na faailoa ai o Iesu, o le Alo pele lenei o le Atua. O lona uiga, e pei ona iai mafutaga a matua ma fanau; e le mafai ona tuulafoaina e matua fanau. E le mafai foi e le Atua ona tuulafoa’i ia Iesu, aua e le o se galuega faigofie ua afio mai ai o Ia. Fai mai ua ave e le Agaga i le vao, ina ia faaososoina e Satani i po e fasefulu. Ioe, e le toe tau faailoa pe toe faamatala auiliili Iesu i o outou finagalo ma o tatou faamoemoe, aua ua silafia ma tatou iloa uma. O Iesu o le Alo o le Atua, o lona uiga; o loo ia te Ia foi le mana ma le pule o mea uma. Peita’i, ua le o lea le finagalo o le

Atua mo lona Alo. Fai mai le upu a Mareko, “sa auauna foi agelu ia te Ia.” O lona uiga, e le i tuulafoaiina lava e le Atua lona Alo. E ui tatou te manatu e faigofie lava ia Iesu le fefaasagaiga ma Satani, peita’i e le o finagalo lea o le Atua. Ua faailoa mai ai Iesu ua faamaulalo o Ia i lona loto ae faalagolago i lona Tamā e faalua mai lona malosi. O le ata lea o le auauna o agelu mo Iesu aua o Ia o le Aloalii I le lagi. O le ata foi o le Atua e saili mai i le tagata ina mafuta ma Ia ma ia faaolaina.

O se a’oa’oga foi lea mo i tatou le fanau, e galo lava ia i tatou le Atua i taimi e sologa manuia ai lo tatou ola, ae faatoa manatua lava i taimi e taia ai i tatou e faafitauli. Peita’i, ia tatou manatua, e le o mafai lava ona tuulafoai i tatou e le Atua i se taimi o lenei soifuaga. Ua auina mai foi lona Agaga Paia e fai ma o tatou fesoasoani. O le sapesapaia lava lea e le Atua o i tatou ina ia aua ne’i o tatou faiaina I faiga a le fili ma ana au.

GALUEGA FAATINO: Tusiga Pese

Tusi ma fati sau pese i autu o le mataupu o lenei Aso Sa. Ia lua fuaiupu ma le tali e faamatala ai ou manatu i le sapesapaia e le Atua o lo tatou ola mai le tele o faafitauli.

PESE: Pese ma Viiga – 72.

A’OA’OGA:

1. E le tuulafoaiina i tatou e le Atua.
2. E saili mai le Atua ina ia tatou maua lona mafanafana sili, e
3. tautoaluaina ai la tatou savaliga i lenei olaga.

.....

ASO SA: 31 IULAI 2022

MATAUPU: UA FAIA SAMI *(The seas are formed)*

SINI: Ia a’oa’oina le fanau, na faia e le Atua le sami, mai i faapotopotoga o vai ma tuu faatasi.

TUSI FAITAU: Kenese 1: 6 – 9

FESOASOANI MO FAIAOGA:

O le tala a le tusi o Kenese, na faia e le Atua le va nimonimo i le aso lua, e va ai vai i le lalo o le va nimonimo, ma vai i luga o le va nimonimo. Ona faatoa Ia faia ai lea o sami, i le aso lona tolu o lana foafoaga, ina ua Ia tuu faatasi faapotopotoga o vai, e fai ai sami. A o le finagalo lea o le Atua, sei muai faia le va nimonimo, o le lagi lea, ona faatoa faia ai lea o sami. O le ta’ua o le va nimonimo, e va ai sami i lalo nei, ma vai o i luga, lea e maua mai ai le timu. E pei foi ona i ai i le taimi o Noa, i le vai na maligi mai le lagi (lolo) lea na faaumatia ai le lalolagi tuai. E ta’ua le sami, o lo o folau ai tagata mai lea atunuu i lea atunuu, e fesootai eleele matutu, ae faamoemoe ai foi le tagata i tamaoaiga e maua mai ai, aua tausiga o aso taitasi. A o le sami, foi o lo o ola ai meaola fetolofi, o i’a ma figota o mea uma na faia e le Atua, mo le tausiga o le tagata. O le va nimonimo foi o lo o i ai fetu ma le masina o mea ia o le natura na faia e le Atua, e taialaina ai le tagata folau i luga o le sami i taimi o le po, o lo o faasino mai ai foliga o le po ma le itulagi e tatau ona agai i ai le tagata folau, ina ia taunuu manuia i le nofoaga o lo o ua faamoemoe e fia malaga i ai. E i ai taimi e siisii peau o le sami i le ao ma le po, ae o i foi tatou te iloa ai le tautai matapalapala. Aua a le to’a le tautai po o le kapeteni i aso faigata e siisii ai le gataifale, ona tua lea i faafitauli le faigamalaga i luga o le sami. Ae a to’a ma lototele le tautai po o le kapeteni, ona folau manuia lava lea o lona sa i luga o le sami. Auā e ui a i ni peau lagavale o le sami, e i ai lava le taimi e to’a ai ma malū ai.

Le fanau e, o le feau ua fia momoli mai mo tatou i lenei Aso Sa, e tofu lava mea uma o le foafoaga na faia e le Atua ma lo latou aoga. E i ai foi taimi e tutupu ai faafitauli o le ola, ae tatou te fa’aa’oa’o pea i le taua ma le aoga o mea na faia e le Atua. E i ai faalavelave e tutupu i luga o le sami aemaise i le po, a’o o lo o faasino ala mai

fetu ma le masina, e faamalamalama le ala tatau ona alu i ai le tagata (itulagi). O le Atua, o Ia lava na te lavea’iina i tatou, aua a tatou vaai i sami ma le va nimonimo, o ata lafoia lava lena o le Atua alofa, o lo o silasila mai ma tausi mai i tatou.

GALUEGA FAATINO: Taliga Fesili

1. O le aso fia na faia ai e le Atua le va nimonimo?
Tali: O le aso lua.
2. O le a le ta’ua o le va nimonimo na faia ai e le Atua?
Tali: E va ai vai i luga ma vai i lalo nei.
3. Na faapefea ona faia e le Atua le sami?
Tali: Na tuu faatasi faapotopotoga o vai, ona maua ai lea o sami.
4. O le a se taua o le sami mo tatou?
Tali: Maua ai meaai, feoi ai vaa etc.

PESE: 8 (Pese maViiga)

A’OA’OGA:

1. E taua mea uma o le foafoaga na faia e le Atua.
2. Tatou faamoemoe i le Atua, pe a oo mai aso faigata.
3. O lo o silasila mai lava fofoga alofa o le Atua ia i tatou.

.....

ASO SA : 7 AOKUSO 2022

MATAUPU: O LE FAATUATUA O LE SEILA
(*A sailor’s faith*)

SINI: Ia a’oa’oina le fanau o le faatuatua i le Atua, e taunuu manuia ai la tatou folauga

TUSI FAITAU: Salamo 107: 23 - 30

FESOASOANI MO FAIAOGA:

O le Salamo lenei e 107, o lo o faaulutalaina “O le alofa ma le agalelei o le Atua i tagata”. O le natura masani lava lea o le Atua i tagata, e le liliu ae tumau e faavavau. Ae ala ona le maua e le tagata ia meaalofo a le Atua, o lona alofa ma lona agalelei, ona ua taumamao le tagata ma le Atua, ona ua agasala le tagata, ma ua le savali i ala o le Atua. Ae peitai, e ui a i ia vaivaiga faale-tagata, a o le Atua, na te saili mai lava le tagata ua leiloa ma ua faatoilaloina e le pule a le agasala, ina ia faaolaina ma faasaolotoina.

O le vaega sa faitauina, Salamo 107: 23 - 30 o lo o aumai ai le ata o le tagata o lo o folau i luga o le vasa. O i latou o lo o molimauina le mamana o galuega a le Silisili Ese, i luga o le vasa tele, i taimi e folau manuia ai pe a malu peau o le vasa. Ae peitai, e le to’amalie pe a malu peau o le sami i le tele o taimi, e i ai taimi e oso ai peau lagavale o le vasa, ona lagona lea e le tagata folau le vaivai ma le mafaia o se mea. E leai se faamoemoe ma ua pei ua tuulafoaiina. E pei ona fai mai upu a le fai-Salamo, e liu suavai le loto i le atuatuvaile, e tautevateva pei o se tagata onā, ma ua faaumatia foi lo latou atamamai. Ioe, o lagona e oo i le tagata e folau faasamasamanoa i luga o le vasa, le tagata e galo ifo ia te ia le Atua, a ua manatu i lona poto ma lona malosi, e folau ai i le vasa. Aua a oo ina siisii peau o le vasa, ona uma loa lea o le iloa, e mou le malosi, ma ua oo mai foi le fefe ma le atuatuvaile, ona faatoa manatua lea o le Atua. E mu loa le lima tapa loa i le iofi, ua vave a ona alaga i le fiaola. E pei foi ona i ai tala i soo a Iesu ma le latou vaa na afatia ma fesouaina i peau o le sami, sa fefefe ma le mautonu, ona latou fafagu lea ia Iesu ao tofa o Ia. (Mataio 8:23-27). Na tulai le Alii ma fetalai atu i le matagi ma le vai, ona malu ai lea. Fai mai le autu o leni aso “O le faatuatua o le Seila” o lona uiga o le seila e faatuatua. A faatuatua le Seila i le Atua, e folau manuia pea lona sa, ma taunuu manuia i le nofoaga o lo o fia agai atu i ai. E ui a i afa matautia ma peau laga vale o le vasa, e le mafai ona malepe lona vaa pe goto foi, aua o lo o faatuatua i le Atua. O lona faatuatua o lo o faamatalaina ai lona loto e pipii pea i le Atua, o lona malosi

ma lona atamai, e faalagolago i le mana lilo o le Atua, na te faatautaia lona sa i luga o le vasa.

O le feau foi lea mo tatou le fanau i lenei Aso Sa. E nao le pau lava lea o le tatou tali pupuni, e malutia ai i tatou mai faafitauli o le ola, o le faatuatua i le Atua. E maua loa lo tatou faatuatua, e le mafai e puapuaga ma faalavelave o le ola ona faavaivaia i tatou, aua o loo taoto i aao agalelei o le Atua, lo tatou saolotoga o lo o malutia ai le tatou ola ma faaolaina ai i tatou mai mea e tutupu faafuasei o lenei olaga. Ia fai i tatou ma seila faatuatua, ona mafai lea ona tatou taunuu manuia i nofoaga o lo o tatou naunau e fia laasia e ala i manuia ua tuuina mai e le Atua.

Uiga o Upu:

- i) peau – aga o le sami
- ii) loto ua liu suavai – fefe/fememea’i
- iii) tautevateva – lelavā, vaivai

GALUEGA FAATINO: FA’AALIGA MANATU

Faamatala mai, po o a ni eseese o nei ituaiga tagata, ae o lea foi lo latou taunuuga.

- 1. TAGATA E FAAMOEMOE I LE ATUA
- 2. TAGATA E FAAMOEMOE I LONA POTO MA LE MALOSI

Faaitaitaiga:

<u>Tagata (Atua)</u>	<u>Tagata (lona poto & malosi)</u>
Lototele	popole
Malosi	fefe
Onasai	vaivai
Manuia	malaia

PESE: Pe tumau lou taula i taimi o afa
A'o gasolo, ao faatupu mala
O peau o le sami ua tau falo
Poo ua motusia lou taula, poo ua e malo

Lou nei taula ia tutumau
Ia mausali i taimi o peau
Tumau i lou papa lea ua mautu
Faamaoni i le alofa o Iesu

(pese: Au a Tama (Vii) Boys Brigade)

A'OA'OGA:

1. Faatuatua i le Atua i taimi faigata.
2. Aua tatou te faavaivai i faafitauli o le ola.
3. Tatalo I le Atua pe'a manaomia se fesoasoani.

.....

ASO SA: 14 AOKUSO 2022

MATAUPU: FAATAUVAA MEA UMA
(*Vanity of vanities*)

SINI: Ia a'oa'oina le fanau, e faatauvaa mea uma,
pe a aunoa ma le Atua.

TUSI FAITAU: Failauga 1: 1 – 15

FESOASOANI MO FAIAOGA:

O Solomona le tupu i Ierusalema, le Failauga o lo o talanoa mai i lona malamalamaaga i le soifuaga o le tagata, ma le siosiomaga i mea o lo o ola ai. E pei o le va o le isi augatupulaga i le isi augatupulaga, o le la, o le sami, o vaitafe, ae le gata i lea, o galuega o lo o faia e tagata i aso taitasi. E mavae atu lea augatupulaga ma a

latou galuega, o le a le toe manatua foi e ni isi o augatupulaga o lo o mulimuli mai. E leai se mea fou i lalo o le la, aua e faasolo mai tupulaga, ona latou le manatua lea. O le poto o Solomona ma lona mataala, na foai i ai e le Atua, o mea ia ua fai ma fesoasoani ia Solomona, ua mafai ai ona ia malamalama i le taunuuga e oo i ai galuega a le tagata. O lona manatu, e faatauvaa mea uma i lalo o le la, ma e leai se mea fou aua o mea uma e faasolo ina tuai ma le toe manatuaina. Silafia lelei e Solomona, o mea uma na faia e le Atua ina ia lelei ma atoatoa, ma e leai foi se mea e mafai ona toe faaopoopo i ai pe toese mai foi. E le mafaia e ni galuega lelei e faia e tagata i lona malosi ma lona poto ona faaopoopo i mea uma na faia e le Atua i le amataga. Aua o le foafoaina o le lagi ma le lalolagi ma mea uma ua tumu ai, na faia lava e le Atua i lona mataisau poto ma lona tumu atoatoa.

Peitai, o le manatu o Solomona, ua na o le tagata ua ola i ala o le Atua, ma mulimuli i faamasinoga amiotonu a le Atua, na te mafai ona iloa ma malamalama i galuega na faia i aao o le Atua. Fai mai Solomona, e leai se mea fou i lalo o le la, aua o mea uma e faatauvaa ma le 'ai a le matagi. Ae fai mai le Aposetolo o Paulo, e tasi le mea e fou i lalo o le la, ua na o le tagata e ola ia Keriso, e faafouina lona olaga, o lona malosi ma mea uma ua ia te ia.

Ioe le fanau, o le a le aoga tatou te maua ai le tele o mea ae aunoa i tatou ma le ola mo le Atua. Aua o mea uma i lenei lalolagi e pei ona fai mai le Failauga, e faatauvaa ma le 'ai a le matagi, e lelea ese ma mou atu ma tatou. Ua na o le tagata e tumau ma faalagolago i le Atua, i lona malosi o lona loto ma lona mafaufau faatasi ai ma ana galuega, e le faatauvaa pe 'ai foi a le matagi, ae ave ma mea fou ma galuega lelei mo le Atua, ma e faamanuiaina foi ma fia silasila i ai le Atua. A lelei a tatou amio fanau, ma tatou faalogo ma usitai i le Atua, ona le faatauvaa lea o o tatou tagata i luma o le silafaga a le Atua.

GALUEGA FAATINO:

Faafetaui upu i o latou uiga sa'o

1. faatauvaa - le famai ona toe faasa'o

- | | | | |
|----|-----------------|---|---------------------------|
| 2. | ‘ai a le matagi | - | saute |
| 3. | itu i toga | - | lē taulia/le faita’ua |
| 4. | le mafaasa’oina | - | lē amanaia |
| 5. | le mafaitaulia | - | o mea e lelea i le matagi |

Tali:

- | | | | |
|----|-----------------|---|--------------------------|
| 1. | faatauva | - | le amanaia |
| 2. | ‘ai a le matagi | - | `o mea lelea i le matagi |
| 3. | itu i toga | - | saute |
| 4. | le ma faasaoina | - | lē mafia ona toe faasao |
| 5. | le mafai taulia | - | lē taulia/le faita’ua |

PESE: 143 (Pese ma Viiga)

A’OA’OGA:

1. O se ua ia Keriso, o le tagata fou ia.
2. Faamoemoe ma faalagolago i le Atua, e manuia ai o tatou aiga.
3. E silasila le Atua, i le tagata e faatuatua ia te Ia.

.....

ASO SA: **21 AOKUSO 2022**

MATAUPU: **AVEA MA TAGATA (*Being human*)**

SINI: Ia a’oa’oina le vasega, o le avea ma tagata, e le faalagolago i ni mea lelei ua tatou maua, ae o lo tatou faamoemoe i le Atua, na te faamanuia mai i tatou.

TUSI FAITAU: Failauga 6: 1 – 12

FESOASOANI MO FAIAOGA:

O Solomona o le Failauga poto, o le tupu loto matala, na te silafia lelei le gasologa o mea o le soifuaga. Aua o le tagata e lei ole i le Atua i se tamaoaiga, se mamalu po o le faaeaina, ae ua na o le loto matala na te faamasino ai lona nuu. Peitai na faaopoopo i ai e le Atua le mamalu ma le tamaoaiga, aua o le tupu ua silasila i ai le Atua i lona loto. Le loto matala ma le poto lea o Solomona, ua na iloa lelei ai le gasologa o le soifuaga o lona nuu o Isaraelu. Ua vaai Solomona, i le tele o tamaoaiga, o oloa e tele ma le mamalu ua maua e tagata o lona nuu, a o le faafitauli, e le o faamalieina ai loto o ona tagata. O le vaai a leni tupu poto, o le toatele o lona nuu ua fai galuega mo le lelei o le tagata lava ia, e faamalieina ai ona mana’o. A ua leai se ola alofa atu i isi tagata aemaise ai o le ola ofoina atu i le Atua, e fai taulaga i le Atua. Ua faasili e tagata le oa ma le tamaoaiga, le pule ma le mamalu, ma ua galo ai, o le avea ma tagata, e ao ona faamuamua. Ia faamuamua le faatauaina o lou lava tagata. Ia lelei le lotoifale faale-tagata, aua o le tagata na faia i le faatusa paia o le Atua. O le manatu o Solomona, e leai se aoga o le maua o le tamaoaiga ma le oa ma le mamalu, ae leai se fiafia e maua ai. E le faamalieina ai le loto. Fai mai ana upu, ua sili atu ai le na fanau le au, aua na sau o ia ma le faatauva, e lei iloa foi e ia le la. Ua sili atu le filemu o lona nai lo le tagata e tele mea, ae le maua ai sona fiafia pe faamalieina ai foi lona loto.

Ioe, e le faamalieina ai o tatou manao i ni mea ua tatou maua, aua o mea uma o le ‘ai a le matagi. Na ona maua i o tatou lima ae toe mou atu. A o le tagata ua na maua le Atua, e faamoemoe ma tumau i le Atua, o le tagata lena e faamalieina pea lona ola i aso uma. Aua ua na o le Atua e malie ai o tatou manao i mea lelei uma. E taua le tamaoaiga, e taua le mamalu, ae le o mea ia e tatau ona faamuamua. Ia faamuamua lava le Atua ona faamalieina lea o o tatou mana’o i mea ua tatou maua.

GALUEGA FAATINO: PASO

Saili mai upu nei i le paso: **MATIVA, FAATAUVAA, POULIULI, MAMALU, POTO, GALUEGA.**

G	A	L	U	E	G	A	V	S
A	T	A	T	O	U	S	M	A
F	E	M	P	S	I	F	M	M
A	M	A	M	A	L	U	V	T
S	O	T	I	N	U	S	A	A
O	V	I	L	E	I	T	A	V
I	O	V	N	E	L	A	U	N
F	A	A	T	A	U	V	A	A
A	S	T	O	N	O	T	U	E
O	F	I	S	A	P	O	N	I

PESE: Le alofa o le Atua
E ofoofogia x 2
Le alofa silisili lea mo a'u.

A'OA'OGA:

1. Ua na o le Atua e malie ai o tatou manao i mea lelei uma.
2. Faamuamua le Atua i o tatou ola.
3. Alofa i le Atua ma o tatou loto atoa.

.....

ASO SA: 28 AUKUSO 2022

MATAUPU: FANAU MAI MA LE TAUIVIGA O LE A I AI (*Birth and the struggle to be*)

SINI: Ia a'oa'oina tamaiti ina ia malamalama, o le soifuaga nei e le pine le tele o le mau lu'itau e feagai pea.

TUSI FAITAU: Kenese 25: 19 – 28

FESOASOANI MO LE FAIAOGA:

A o'o ina tala mea faasolo le foafoaga ma fuafuaga a le Atua, ona ofo a lea o le loto i le Atua ma ana faiga. A o'o foi la ina tutupu ni faafitauli o'gaoga i totonu o le va nonofo ai, ona fesiligia loa laia e le tagata le Paia Silisili Ese o le Atua. E pei foi la o le faitauga o lenei taeao, e matua'i maofa lava faiga a le Atua pe a fua atu i le tala. O le mea moni lava ia, i le va nonofo ai o Esau ma Iakopo, e fananau mai lava tama ua iloga le tagata ia ma lona faasinomaga. E le o ni tofiga fa'ato'a tofofi, na tofofi lava a'o i totonu o le manava o lo laua tinā.

Fai mai le autu o lenei aso, "*Fanau mai ma le tauiviga o le a i ai*". E fananau mai lava le auuso masaga lenei o lea lava e fai le la tauiviga po'o le la finauga. Fai mai le manatu autu, tauiviga o le a i ai, o lona uiga e foliga mai e le na o se tasi se tauiviga pe a fua i le autu. O se finauga sa fai a'o le'i fananau mai, peita'i lea ua fananau mai le auuso, e le taumate la le tele o nisi tauiviga lea o le a fesaga'i nei ma i laua. Auā a fua atu i le tau fa'ai'ui'uga o le manatu autu, tauiviga o le a i ai; o le taimi lumana'i, o lona uiga o le vaai mamao lea a le Atua i le lumana'i o le fananau mai o tama nei.

Lea foi e atagia mai i le manatu o lenei aso, le uiga o le igoa o Iakopo ina ua suia ia Isaraelu, finau i le Atua atoa ma tagata. O lona uiga o le natura lava ia o Iakopo o se tagata e finau, o se tagata e tauivi faatasi mo le manumālō. E atagia lea vaaiga i le fuaiupu e 26 "Mulimuli ane ua fanau mai ai lona uso, ua u'u atu foi lona lima i le mulivae o Esau..." O le faailoga e iloa ai le tagata e finau ma tauivi mo manuia o le Atua. E tele nisi faauigaga e mafai ona faamatalaina ai le u'uina e Iakopo o le mulivae o Esau. E i ai nisi faauigaga, fai mai o le fia muamua o Iakopo, o le fai togafiti, o le mana'o tele. E i ai nisi faauigaga, o i e iloa ai le finau ma le tauivi o le tagata lenei o Iakopo, e ui o lea e i totonu o le manava o lona tinā. Peita'i o i tonu o lo'o taoto ai le finagalo o le Atua e le iloa e le tagata.

Faatusaina nu'u po'o mālō e lua i totonu i le manava o Repeka ia Esau ma Iakopo. E le'i sesē le folafolaga a le Atua ia Repeka, na taunu'u lava pe a fua atu i le tala. Fai mai e sili ona malosi o le tasi nuu i le tasi, e nofo pologa foi le ulumatua i le ui'i. Le taunu'uga

lea o le folafolaga a le Atua ia Repeka mo Iakopo. Lea na tupuga mai ai te ia o ituaiga e sefulu male lua o Isaraelu, ma ua suia ai fo'i lona igoa ia Isaraelu, o lona uiga, o le tagata finau ma le tauivi ia manumālō. O le malosi ua faatusaina ia Iakopo, o ia e taunuu ai le folafolaga a le Atua, o i foi e taunuu ai le tautoga a le Atua ia Aperamo, "Ou te fai oe ma nu'u tele, o lau fanau e pei o fetu o le lagi ma oneone o le sami..."

O Isaraelu o le nu'u na osi feagaiaga ma le Atua, na tupuga mai ai tagata popoto ma tagata atamamai. O le nu'u na au lona gafa ia Iesu Keriso, o le Alo o le Atua, o lē na ala mai ai le faaolataga i le lalolagi. O lona uiga, o le gafa o Iakope e tau ia Iesu, o le malosi Silisili Ese o le lalolagi.

Manatu foi o se feau taua foi lea mo i tatou le fanau, e le taumate le tele o tauiviga eseese o le ola e feagai pea ma i tatou. O tauiviga e tau au ai lava ina tutupu ai lava le femisaa'i ma i'u atu ai i le malaia. Peita'i o le galue fesoasoani mai pea o le Agaga o le Atua, e na te faamalosi 'au ma saga fa'amausalīina pea lo tatou fa'atuatua. E iai taimi e vā ai le fogatai i le va o aiga, o uso ma tuafafine. E le taumate fo'i le tutupu ai pea o faafitauli masani o le ola, peita'i tatou te faalagolago pea i le Atua e maua ai lo tatou malosi ato'atoa e faaauau ai feau ma tiute.

Uiga o Upu:

- i) Gafa - so'otaga, fa'asinomaga, laau o le aiga (*family tree*)
- ii) Pā - le mafai ona fanau
- iii) Feu'ua'i - fusu, tauiviga, finauga (*struggled, jostled, leaped*)
- iv) Masaga - o le auuso tama po'o le teine e tutusa aso fanau, ae e i ai lava le mea eseese ai
- v) Liloia - pupuni
- vi) Faatoga - aioi, valaau.
- vii) Agamalū - filemu, le gaoiā, amio lelei

GALUEGA FAATINO: Taligā fesili

1. O ai e tupuga mai ai Isaako?
Tali: O Aperamo
2. O le fia o tausaga o Isaako na fananau ai lana fanau?
Tali: E 60
3. E to'afia le fanau a Isaako?
Tali: E to'a 2
4. Aisea na faatoga ai Isaako i le Atua?
Tali: Na faatoga Isaako i le Atua mo lana avā o Repeka, ina ia maua so laua sulii.
5. Faamatala se tauiviga o lo'o taua i le tala
Tali: O lo'o atagia i le fuaiupu e 22 ma le 26, fai mai le tala na feuuai ai le tama o Iakopo ma Esau i totonu o le manava o lo laua tinā. Lea na u'u ai e Iakopo le mulivae o Esau ina ua mua'i fanau mai. O le faailoga lena o le finauga a tama nei pei ona aumai i le tala.

PESE: O mai ia faamalosi (168)

A'OA'OGA:

1. Ia tatou tauivi i le manuia ae le o le malaia
2. Finau ma taumafai, ia faapaleina i manuia o le Atua
3. 'Aua tatou te fa'avaivai pe a o'o ina feagai i tatou ma puapuaga.

.....

ASO SA: 4 SETEMA 2022

MATAUPU: LU'ITAU MALOSI (A strong challenge)

SINI: Ia a'oa'oina le fanau ia malamalama i auala e mafai ai ona tali atu i le mau lu'itau eseese o le ola; e ono aafia ai le ola tautua i le Atua.

TUSI FAITAU: Luka 12: 1 – 21

FESOASOANI MO LE FAIAOGA:

O le tala mo i tatou le fanau i lenei taeao, e tolu ni vaega taua o lo o vaevaeina ai le Tusi Faitau.

Fuaiupu 1-3: Lapata'iga i le fa'aletonu o feagai ma le 'au faresaio.

Fuaiupu 4-12: O le faamalosi i le au so'o ina ia 'aia le fefefe e fa'ailoa atu lona Suafa.

Fuaiupu 13-21: O le fa'ataoto i le tagata mauoa ma lona vaivaiga.

O le tala na o tatou faitauina o apoapoa'iga a le Alii Faaola i lona au so'o, na lava e amata mai ai le tatou tusi faitau. O lo o faatusa ai e Iesu le 'au faresaio o le mea faafefete. Le ala lea o le apoapoa'i atu o Iesu, ina ia o latou silafia lelei auala tau faaleaga a le 'au faresaio e ono aafia ai la latou faatino. Faatusa e Iesu le 'au faresaio o le mea faafefete, o lona uiga o le agasala. Ne'i meane ua pisia le 'au so'o i amioga a le 'au faresaio ona fai lea ma ala e pispisia ai lo latou ola tautua mo le Atua.

A o le tasi lea o lu'itau malosia lea o le a feagai nei ma le 'au so'o aemaise o le galuega tala'i a Iesu Keriso, o tagata faresaio. Auā foi e ese la latou molimau e uiga i le afio mai o Iesu i le lalolagi. Ma e le pine lo latou teena foi o a'oa'oga a Iesu. O le faaletonu lea o le 'au faresaio lea o lo'o lapata'i mai ai le Faaola ina ia manino ma malamalama iai le 'au so'o auā e le faigofie le galuega o le a latou feagai ai nei, pe a o'o ina faataunu'uina uma le finagalo o lona Tamā.

O le fuaiupu e 4 – 12 o lo o faamalosi mai ai Iesu e 'aia le fefefe, e ta'uta'u atu lona Suafa. E i ai taimi e feagai ai le tagata ma faigata o le ola, ona tupu ai lea o le fefe ma le palaai. O a mea e tutupu i le

soifua o le tagata, lea e a'oa'o mai Iesu; "Aua tou te matata'u". E le gata i lea 'aia nei fefefe e tala'i atu lona finagalo, 'aia le fefefe e ta'uta'u ma faailoa le finagalo o le Atua i nu'u ese. Auā tasi lona vaega lea e faamamafa mai e Iesu, "O se ta'ua au i luma o tagata, e ta'ua foi o ia e le Atalii o le tagata i luma o agelu a le Atua" O lona uiga, o le tagata e fiafia e tala'i ma talanoa i le finagalo o le Atua ua ta'ua foi o ia i luma o agelu a le Atua.

E o'o mai i le vaega mulimuli o le tatou tusi faitau fuaiupu e 13 – 21, o lea ua talanoa le tusitala i le faataoto. O le upu moni lava, e le leaga le tele o tupe, e le leaga foi le tele o fale, tele faatoaga ma lafu manu, e le leaga foi le fau ma soloi o le tamaoaiga e maua e se tagata, aia foi, o mea alofa ia a le Atua ua foaiina mai e atiae ai le soifua ma le ola o le tagata. O le mea foi ua faia e le mauoa, e le o se mea leaga, auā foi, e ao lava ina tatou faia faalelei ma fa'aaogā tatau manuia e tele ua foaiina mai e le Atua mo i tatou.

O le upu moni lava, o se matuā faavalevalea le faataugā ma le faamaumau o fua o fa'aeleeleaga e aunoa ma se galuega lelei e faia i ai. O le fausiaina la e le mauoa o le anoanoa'i o fale tetele e teu i ai ia faamanuiaga o se mea lelei tele, "O lenei le mea ou te faia; ou te sa'ena o'u fale saito, ae faia ia tele; ou te faaputu i ai au fua ma au mea lelei uma." O le fausiaina ma le faatetelēina o fale saito, o se mea ua matuā alagā tatau ona fai, auā foi, o lea ua matua le faatoaga ma ua tele le seleselega, ua fau ma soloi foi le tamāoaiga e ala mai fua o ana faaeleeleaga, o lona uiga, e tatau ona lelei ma tetele fale e tuu ai.

O le lelei lea o le manatu o le mauoa, peitai, ua toe sasi lava lana faaiuga ina ua maea lana galuega. Ioe, ua ia le faaputu ma teu malu le tamaoaiga e faatino ai le alofa ma le agalelei i isi, a ua ia faaputupu ma teu mo ia lava. "Ou te fai ifo foi i lo'u agaga, "Lo'u agaga e, ua ia te oe mea lelei e tele ua teuina mo tausaga e tele; ina nofonofo filemu ia, ina ai ia, ma inu ma ia e olioli." Talofa i le tagata mauoa ma lona vaivaiga ua avea le tele o faamanuiaga ua maua, ma le tamaoaiga ua i ona lima ma ala ua galo ai ia te ia le alofa. Aisea? Aia foi ua manumalo le matape'ape'a, ua malosia le tulei a le tuinanau ma le manatu faapito, ae silisili ai, ua matua eeva lava le faatuatua ma le faamaoni. O le a le iuga? "O oe na le vale, e aamiina atu lou agaga nai ia te oe i le po nanei; ae fai ma ai mea ia

ua e saunia?" O le iuga lena o le tagata ua ola mo ia lava, ae le faasoa le tamaoaiga.

O le 'oa e pala, ma e mavae lea, a maliu lē e ana le 'oa ona alu lava lea i le lagi ae tuua uma lona tamaoaiga.

Talitonu foi o le uiga lea o le mataupu mo i tatou le fanau, luitau malosi. O le matua'i fau ma soloi o luitau malosi e faaosoosoina ai i tatou. Ae tasi lava lea luitau ua fai ma faalavelave, o le 'oa ma le tamaoaiga. Ua fai ma ala e mavaevae ai aiga, ua le lelei ai le va feso'ota'i i totonu o le sosaiete. A o mea nei o lo o talanoa mai ai Iesu, e ao i le tagata ona ia silafia lelei. O le 'oa ma le tamaoaiga o le mea e pala, a o le uiga o le manatu, ia faasoa atu mo nisi tagata o lo o manaomia le fesoasoani, ae 'aua tatou naunau ia faia na o tatou lava. A ia fai, ia ola se isi ou uso a tagata o lo o mana'omia le fesoasoani.

Uiga o Upu:

- i) manomano - o lo o faatusa i le to'atele o le fuainumera o tagata, po o faitau afe o tagata.
- ii) mea faafefete - o lo'o faatusa i le 'au faresaio, o lona uiga o le agasala.
- iii) Kēna - o le Upu Eleni o le Hell o lona uiga o Kēna. O lo'o faatusa i le vanu o Hinoma, fai mai le tala e i fafo atu o Ierusalema. O le nofoga e faatama'ia ai lapisi, ma susunuina ai i fafo atu o Ierusalema. Lea la e faatusa ia Kena o le afi, o lona uiga o le nofoaga o faasalaga.

GALUEGA FAATINO: Tusigā parakalafa

Faamatala mai ni lu'itau malolosi sa feagai ma oe le tama ma le teine talavou. O ni mea sa fai ma fa'afatiatama'i i lau folauga, aemaise o le feagai ai ma a'oa'oga, totonu o lou aiga, o le va ma au uo, ae faapea totonu o le Ekalesia.

PESE: O mai ia Soma e, (166)

A'OA'OGA:

1. 'Aua tatou te fa'avaivai pe a fegai ma lu'itau malolosi o le ola.
2. E aogā lu'itau e toe fatufatu ai nei ma a taeao
3. Ia manino lau vaai i auala a le fili e ono lepeti ai le ola talavou o i tatou le fanau.

.....

ASO SA: 11 SETEMA 2022

MATAUPU: UPU O LE OLA (*Words of life*)

SINI: Ia a'oa'oina tamaiti ia malamalama, o le upu o le ola e faaolaina ai le tagata.

TUSI FAITAU: Luka 15: 1 – 10

FESOASOANI MO LE FAIAOGA:

O le vaega o le tusi lea na tatou faitauina, o le tali lea a Iesu e tusa ai ma le faaseā mai o le 'au faresaio. “ Ua talia e lenei tagata o e agasala, ua aai faatasi foi o ia ma i latou. O le mea moni lava, i le vaaiga lava ia faa Iutaia, e le mafai ona aai faatasi i latou ma ni tagata agasala. A o le afio mai o Iesu, na afio mai mo le tagata agsala.

O ai ea so outou e ana mamoe e selau, afai e leiloa le tasi, e le tuua e ia le ivagafulu ma le iva i le vao ae alu ma saili i le ua leiloa, seia maua. E ese le taua i le leoleo mamoe Isaraelu lana lafu mamoe. E le mafai le mafai ona faatamala i le vaaiga o ana mamoe, poo fea lava e agai i ai i le vao, e faapena foi ona mulimuli atu ai ma le lafu. Ma o le upu moni, e leai se mamoe o le lafu mamoe e le iloa e le leoleo mamoe, e pei o le ao lana vaai i lea manu ma lea mamoe.

O le ala foi lea e le mafai ai ona nofonofa le leoleo mamoe pe afai ua leiloa se mamoe. Poo le a le faigata, o le a foi le gaoā, pe maualuluga mauga po’o le maualalo o le vanu, e ausulusulu lava le leoleo e saili seia maua le mamoe ua leiloa. A o’o ina manuia le sailiga ma ua maua le manu, fai mai le molimau a Luka, e faafuata ma le olioli. E faapotopoto uo ma tuaoi, e fai le fiafia tele, auā foi, ua manuia lana sailiga.

E faapena le uiga o le Atua. Na te faatauaina le tagata i lona finagalo, na te saili mai i lē ua leiloa. E le’i saili mai le Atua i le tagata o lo o ola mālōlōina, e lei afio mai Keriso mo ē amiotonu, e lei, auā ana faapea e afio mai Iesu ona o le tagata amiotonu, o lona uiga o se galuega fai fua lana faaolataga. Auā foi, o le ā le aogā o le faaolataga pe afai e lei se agasala? O le a le aoga o le sailiga pe afai e lei ni tagata leiloloa?

Ae ona o le toatele o i tatou o lo o leiloloa i totonu o le lalolagi a le Atua, ae le gata i lea, a’o le agasala foi ia ua mumū fa’aafi, o le ala lea o lona afio mai, se’i saili le tagata leiloa ia maua, sei faafuata ma le olioli. Po’o le a le to’atele o tagata amiotonu i le lalolagi pe afai e maua, e sili atu lava le fiafia o le Alii i le tagata e to’atasi e salamo.

E faapena foi i le fafine ma le tupe na leiloa. Na saili faamaoni na su’e lava seiloga lava ua maua. E ui lava i le na o le tasi le tupe na leiloa, peita’i o le naunauta’iga, e saili lava ia maua. O le uiga foi na o le faataoto a Iesu, o lona afio mai, na Ia saili mai ia i tatou. O lana faataoto na ia tali atu ai i le lotoleaga ma le eleelea o loto o le au faresaio. Lea mafua ai ona ia faamatala le faataoto lenei, se’i ta’u atu e Iesu le uiga moni o lona afio mai. Aemaise o le Upu Moni ma le Upu o le Ola ina ia faaolaina ai le tagata agasala.

Tatou le vasega matutua i lenei taeao, o se faamanatu puupuu lea mo lou soifua ma lo tatou ola. E olioli le lagi i le tagata agasala e toatasi e salamō. Auā fo’i, o le tagata salamō lea, o le tagata na leiloa a ua toe maua. E faapena le manatu o lenei taeao, o le lalolagi o lo’o tatou iai, o se lalolagi ua tumu i le anoanoa’i o tagata ua leiloloa ai. Ao le faaeteetega ma le atugaluga o le manatu, pe le o tatou ea isi tagata o lo o leiloloa i totonu o le galuega a le Atua?

Fai mai le faamamafa o lenei aso mo, “Upu o le Ola”, o le a le Upu o le Ola; o afioga paia a le Atua e tomatauina ai le faatuatua o i

tatou. Faapena le Upu na Ola ai le tagata agasala ua leiloa, ina ua afio mai Iesu. Tigā lava tulafono ma talitonuga faa Feagaiga Tuai, peita’i e le’i fo’i ai lava Iesu. E le’i fo’i ai le Upu o le Ola ina ia faaolaina le tagata agasala, ma faasaoina le tagata ua leiloa.

O Iesu Keriso lava ia o le ala na saunia e le Atua e fai ma faasino ala i le tagata ua leiloa, ina ia mafai ai ona toe foi mai ia te ia i le mafutaga o le olioli ma le fiafia e faavavau.

GALUEGA FAATINO:

Fai se fa’asoa po’o se faatalatalanoaga, e mafai ai ona tatala ai mafaufauga o le fanau, e uiga i le manatu autu. Tapena e lau susuga le faiaoga ni fesili ta’iala e mafai ai ona fa’alaua’itele le tatou mataupu. F.t O le a le Upu o le Ola? E faapefea ona faaolaina le tagata i le Upu o le Ola? O le a le feso’otaiga o le faataoto ma le galuega tala’i a Iesu? O nai fesili faatupu manatu ia, e fesoasoani atili ai i le tau faapupulaina o le tatou mataupu.

PESE: Laulau mai pea ia te i matou (Pese 371)

A’OA’OGA:

1. O le Atua o Ia lava o le Ola tatou te malu ai i taimi i faigatā.
2. Tatou ofo atu le fesoasoani mo e o mana’omia le fesoasoani.
3. E taua tagata uma i le silafaga ati a le Atua.

.....

ASO SA: **18 SETEMA 2022**

MATAUPU: **O LE MAMANU (1)**
(The pattern [1])

SINI: Ia malamalama le vasega o le mamanu lea e taoto i totonu o le tala, o loo agai tonu lea i a'oa'oga a Iesu Keriso, e faatatau i le ola auauna o le tagata.

TUSI FAITAU: Mareko 10: 41 – 45

FESOASOANI MO FAIAOGA:

E tatou te talanoa loa i mamanu, ua tatou talanoa i mea teuteu. O mea e toe suia ai le vaai mai i foliga tuai i ni foliga fou. O lona uiga, o mamanu, o ni faatinoga e toe teuteu ma toe faamatagofieina atili ni mea tuai ua le o toe aoga pe ua uma foi lona tāua (expire).

E foliga faapea lagona o loo alia'e i le tala sa faitauina. O a'oa'oga a lo tatou Alii Faaola, o loo ia aoao ma toe faamanatu ai i le au so'o, i le ituaiga tagata e tatau o i ai o latou tagata. Aua o totonu o le lotoifale o tagata Iutaia; ua mae'a lelei ona maioio le faatulagaina o tagata i totonu o le sosaiete. E peiseai o lo o manino mai ai lava le ola faapito ma le tusitusi lima o tagata, aemaise ai lava i le va feagai ai o tagata tauaola ma tagata lima vaivai.

E i ai taimi e manatu ane ai le tagata maualuga lona tulaga i le sosaiete, poo le tagata mauoa, e sili atu o ia nai o tagata uma. Aua e le gata i lea, o ia ua maua le oa ma le tamaoaiga, ua ia te ia foi ma le pule uma lava (*authority*).

Atonu ai o i lagona faapea sa lilifa i ai mafaufauga o le au soo, ua fai ma auala o le le fiafia ai soo e toasefulu o Iesu, i isi so'o e toalua o Iapoko ma Ioane. Peiseai o le manatu o le au so'o nei e toasefulu, ua manatu ane Iakopo ma Ioane, ua sili atu i laua nai loo latou. Peitai o lea ua faataoto e Iesu Keriso se mamanu matagofie e toe mamanu ma toe teuteu mai le aga'iga o le soifua auauna o le au soo. I le finagalo o le Alii Faaola, o le tagata e sili, o le tagata lea e faatinoina le ola auauna mo soo se tagata. E le ola faapito foi, ae tutusa lava tagata uma i lona manatu.

Fetalai Iesu, “.....a o se fia sili ia te outou, ia fai o ia ma a outou auauna; o se fia muamua foi ia te outou, ia fai o ia ma tautua a outou uma.”

O lea lava ua manino mai, ua feliiua'ina e Iesu Keriso mafaufauga o le au soo mai le fia avea ma sili, e avea ma auauna. E pei foi ona ia toe faamanatu ai le auala na afio mai Iesu Keriso i le lalolagi. “Na ia le sau ina ia auauna tagata ia te ia, ae peitai na ia sau ina ia auauna o ia, ma foaiina atu lona ola e togiola ai tagata e toatele.”

Le fanau i lenei taeao, o le aoaoga taua foi lea ua tatou maua mai la tatou mataupu. O le ola auauna e faamanuiaina ai; a o le fia sili e ta'u faatauvaaina ai o ia. Ia o tatou ola ma ia o tatou mautinoa, o tatou e tua i ai Aiga, Nuu ma Ekalesia. O lo tatou faalupega o tatou e vae ma lima ai le galuega molimau a le Ekalesia.

Uiga o Upu:

i) aliita'i - taulamua, fai ma faataitaiga

GALUEGA FAATINO: Tusiga Solo

Tusi mai sau solo e faatatau i le Tāua o le ola auauna i le Atua. Ia lua fuaiupu ae tai fa laina i le fuaiupu

PESE: 177 (Pese ma Viiga)

A'OA'OGA:

1. O tupulaga e tua i ai Aiga, Nuu ma Ekalesia.
2. 'Aua le fia mata muamua.
3. O le ola auauna ma le ola tautua i le Atua, e faamanuiaina ai.

.....

ASO SA: 25 SETEMA 2022

MATAUPU: **FAATUMAUINA LE ALOFA O LE TASI I LE ISI.**
(Maintaining constant love for one another)

SINI: Ia malamalama tamaiti, o le alofa e mafai ai ona tatou faia soo se mea lava; o a foi faafitauli ma faigata e tutupu i la tatou savaliga. O le alofa lava e fofoina ina faafitauli uma.

TUSI FAITAU: 1 Peteru 4: 8 – 11

FESOASOANI MO FAIAOGA:

O le alofa lava ia pe a faamatalaina, o ni lagona e tutupu a'e i loto o le tagata e mafua ai ona maua le nofo lelei ma le filemu. A o se upu foi e eseese lava lona faauigaina ma lona faamatalaina. Aua e tatou te talanoa loa i le alofa, ua tatou talanoa i le alofa e faamatala a'i le va o matua ma fanau, o le alofa i le va o faigauo, o le alofa i le va o ulugalii, ma le alofa i le va o le tagata ma le Atua.

A o le alofa lava ia, o le fatu lea o soo se mafutaga, aua a leai se alofa ua mautinoa foi le maua ai lea o se piitaga lelei o le isi tagata i le isi. O le alofa e mafua ai ona tumau le fealofani i taimi sololelei ma taimi e fesouaina ai le folauga e matagi vale o le ola. Ao le alofa foi lea o lea e talanoa ai le Aposetolo o Paulo i lana tusi i le ekalesia i Korinito. O le alofa o le sili lea i mea uma.

E foliga faapea se feau faamalosi o loo taumafai Peteru e toe faamanatu i le au Kerisiano faatuatua i lona taimi. O le molimau a Peteru, o lea ua latalata le afio mai o le Alii, peitai e leai se isi e iloa ma mautinoa le taimi e afio mai ai. Pau le fagufagu, e mautinoa le taunuu, ae mo le tagata faatuatua lava ia, ia ola tapenapena ma tumau i le Atua.

A o tapenapenaga la a le tagata faatuatua, e aofia ai le alofa lea e faamatala e Peteru. Fai mai ia alofa i le Atua i le ituaiga alofa e sili atu i loo se isi lava alofa. O lona uiga, ia loloto le Atua i le Atua. Ia 'aia lava nei pei o le alofa faaletagata. Aua o le alofa le na e le umi (last). O le faamanatu a Peteru, o le alofa e te alofa ai i le Atua, ia e alofa atu ai foi i lou uso a tagata.

A o lona tino mai, e tino mai i a tatou faatinoga. Lea e pei ona faamatala e le fuaiupu e 9 "ia outou talia malaga o outou ma le le muimui." O le a lona uiga, o le tali malo lelei e faavae mai le alofa

e lanutasia uma ai tagata uma o le alofa e tatou te faaali atu e ala i le talia ma faaulufale ia te i latou i o tatou aiga. O se tu ma se aga ua masagi ai la tatou auaunaga, aua o aoaoga ia a lo tatou Alii Faaola i ai tatou.

Le fanau e, o le faamanatu foi lea mo i tatou. Ia o tatou alolofa atu i isi o tatou uso a tagata. O aoaoga lava ia a lo tatou Alii i ai tatou e ala mai ai ana faamanuiaga i lo tatou ola. A ia 'aia foi tatou te alolofa ia tau o le upu ma le gutu; a ia tuu i ai ma faatinoga, e pei foi o le feau momoli a Peteru i le au Kerisiano uma lava. Ia tatou alolofa i o tatou matua, o e matutua atu i ai tatou, a ia faasilisiliina ona tatou alolofa i le Atua, o le faapogai lea o manuia uma lava.

Uiga o Upu:

- i) talia malaga - tali malo lelei, faaulufale se tagata i lou fale.
- ii) le muimui - le tomumu

GALUEGA FAATINO: Taliga Fesili

1. O le a le faamoemoe o le tusi a Peteru sa faitauina?
Tali: O se toe faamanatu i le au kerisiano i le taua o le alofa faale-Atua.
2. O ai Peteru lea na tusia le tusi?
Tali: O le tasi o le au so'o o Iesu Keriso.
3. O le a le taua o le alofa ia te oe?
Tali: E mafai ai ona e faia ni faaiuga lelei ma le talafeagai e te manuia ai.

PESE: O le alofa o le Atua, e silisili ese.

A'OA'OGA:

1. O le alofa e lāvatia mea uma ma fai ai faaiuga sa'o.
2. E silisili ese le alofa o le Atua.

3. O le alofa o le Atua e maua ai le fealofaniga.

.....

ASO SA: 2 OKETOPA 2022

**MATAUPU: UA TAUMAFAI ATONIA INA IA AVEA
O IA MA TUPU
(Adonijah sets himself up as king)**

SINI: Ia malamalama tamaiti, o le naunau i tofiga
maualuluga e aunoa ma le faalagolago i le
faasinoga a le Atua, e faalumaina ai le tagata.

TUSI FAITAU: 1 Tupu 1: 1 – 18

FESOASOANI MO FAIAOGA:

Fai mai upu ua masani ai la tatou faalogo. “E lelei togafiti, ae le umi.” O lona uiga, e mafai ona manuia ni taumafaiga e fa’aaogaina ai faiga faatogafiti, ia poo ni faiga faapiopio ma le lē kerisiano. A lona tulaga faaletonu, e le tumau lona lelei mo se taimi umi. Aisea? Ona foi o ni faatinoga sa faia i luga o le fao malo. Sa faavale i luga o le faasili-au-pule; ina ua manumalo ia te ia lagona faasausili. O lagona faamaualuga; ma ua avea ma ala ua pogisa ai manatu ma lagona, i le mea talafeauga ma talafeagai ona fai.

E foliga faapea se lagona o loo alia’e i totonu o le tala lea sa faitauina. O le naunau o Atonia ina ia avea o ia ma tupu. Ao le naunau foi ua avea ma ala o le pu-moomoo ai o le vaai, i le faaiuga tonu ma le sa’o.

O lea lava ua manino ma malamalama mai le tala le tulaga ua oo i ai le ma’i o le tupu. O le mea mautinoa lava, ua le mafai ona toe foi le tupu e fa’aaau lana taitaina, pe a fua i gaioiga lea ua faatinoina e ana auauna, ina ua siliga foi a latou taumafaiga e faamafanafana ia te ia e leai lava.

Atonu o i lea na tupu a’e ai ni lagona ia Atonia le tama tane Akita, o ia lea o le a fai ma tupu, pe a mavae atu le tupu o Tavita. Ua ia manatu ane ai, o mea uma lava sa ia Tavita, o le pule o le mamalu, o le tamaoiga o auauna ma isi mea uma; o ana mea ia pe a mavae atu Tavita.

O ni mafauauga e lē faavaea lona fuafuaina. Ua faia i luga o manatu faamaualuga. Ua leai se alofa ma se onosai, e faatalitali ai i tofia a le tupu, poo ai e soso’oa lana nofoaiga. Lea lava ua manino mai le fuaiupu e 9 faatinoga le mataofiofia o Atonia.

“*Ua fafasi foi e Atonia o mamoe, ma povi, ma manu pepeti e lata ane i le maa o Soelete, e lata ane i Enerokehu, ua ia tala’i atu ai ona uso uma, o atalii o le tupu, ma tagata o Iuta uma lava, o auauna a le tupu;*”

E ui la i ia faiga uma ua faia e Atonia, e faoa faamalosi ai le tulaga tau tupu mai ia Solomona. Peitai, o lea lava e manino mai le tala, e i ai foi i latou o lo o tetee pea i le avea ai o Atonia ma tupu. Le lava e manino i se vaega o le tusi sa faitauina.

O le fautuaina ai e Natano ia Patesepa le tina o Solomona ina ia vave ona faailoa atu ia Tavita le mea ua tulai mai. “*Alu ia oe, ma e ulufale atu i le tupu o Tavita, ma e fai atu i ai, Le alii e, le tupu, na e le tauto mai ea ia te au lau auauna fafine, ua fapea mai, E moni, e fail au tam o Solomona ma tupu e a mavae atu a’u, e tietie foi o ia i lo’u nofoalii; se a foi le mea ua fai ai Atonia ma tupu?*”

O se fautuaga e faavae mai luga o le loto ua ootia, ona o le pule faamalosi ua faoa ai le amiotonu e tataua ona faatino.

A faaauau le tala i lona taunuuga, o lea lava o loo manino mai ai, a toe lagona lava e Atonia lona sese ma lona faatauvaa; ina ua faaali le amiotonu ma le mea talafeagai, ma seei ane ai Solomona e avea ma tupu.

Le fanau e, o le faamanatu foi lea mo i tatou le fanau. O le pule faamalosi e faavae mai luga o le ola faamaualuga; e leai sona taunuuga lelei e oo i ai. E le gata e inosia ma le fiafia i ai nisi, ae faalumaina ma tau faatauvaaaina ai i tatou. O le faamanatu, i tatou maua le feāvata’i ma le faaaloalo e amanaia ai ma fa’aaloogia ai tatou e tagata.

Uiga o Upu:

- i) tautalatala - talanoa
- ii) mona - mo ia
- iii) fafasi - tape, faaumatia

GALUEGA FAATINO: Fa'aaliga manatu

Fa'aali sou manatu po o le a se auala e tatau ona fo'ia ai le faafitauli o lo o ali'ae totonu o le tala.

PESE: 82 (Pese ma Viiga)

A'OA'OGA:

- 1. 'Aua le ola faasausili ma le faamaualuga
- 2. Ia ava ma faaaloalo i so o se tagata
- 3. Ia maua le loto salamō pe afai ua lape se faatinoga.

.....

ASO SA: 16 OKETOPA 2022

MATAUPU: FA'AALIGA O LE FILEMU
(*Vision of peace*)

SINI: Ia malamalama le vasega e leai lava se isi e maua ai le filemu na o le Atua lava.

TUSI FAITAU: Isaia 2: 1 – 5

FESOASOANI MO FAIAOGA:

O lea lava o loo fa'auau le faamatalaina e Isaia o le fa'aaliga na ia iloaina e uiga i le nuu filifilia o le Atua. O le ta'ua e le Perofeta o Iuta ma Ierusalem, e le faapea ua i ai sona eseese peita'i o le

taimi o Isaia ua faatafunaina le aai o Ierusalem, ae o le ogatotonugalemu lea o le soifua tapua'i o so o se Isaraelu o le aai e afio ai le Atua. Petia'i ua faaleagaina le aai ona ua sese le faamamafa a Iuta, ua mimita ona o le aai ma le igoa Ierusalem ae ua lē mitamita i le Atua o le ua afua ai ona mamalu Ierusalem. O le mafua'aga lea o le lē maua o se filemu i le aai, ona ua see ese le tagata i ala o le Atua.

O le ta'ua e le Perofeta o aso e gata ai, o lo o faatatau i le faamasinoga a le Atua mo ona tagata, peita'i o le faamasinoga e i ai le faamoemoe mo le tagata ona o le alofa tunoa o le Atua. O le alofa tunoa lea o le Atua e aua ai ona omai o nuu e tele ma o a'e i le mauga o Siona. O le faailoga ua le toe i ai ni tagata o nuu ese ae ua tasi tagata uma. O le mauga o Siona o lo o faasino i le afioaga o le Atua. O pelu ma tao sa tau ai taua ua liuaina e avea ma mea faigaluega e atina'eina ai fanua mo se manuia. O lona e le toe i ai ni taua ma misa, ua tasi tagata uma. O le fa'aaliga lea o le filemu o le Atua. O le faailoga o le lē toe i ai o ni taua ma fevaevaeina ae ua mafuta faatasi le fanau o le Atua e galulue ma savavali i le malamlama o ala o le Atua.

O le filemu lava lea o le Atua, na ala ai ona afio mai Iesu i le lalolagi, o le lalolagi ua le maua se filemu ona faiga faaletagata aemaise ua pa'u maualalo le tagata i le loloto o le agasala. O lona maliu ma le toe tu manumalo mai le oti ma le tuugamau, o le faaolataga mo i tatou uma ae o le filemu ua tatou maua ina ia magalo i tatou o tagata agasala.

GALUEGA FAATINO: Faasoa manatu

Ia tuu le avanoa i le fanau e faasoa mai ai o latou manatu e uiga i le upu **FILEMU**

PESE: 190 (Pese ma Viiga)

A'OA'OGA:

- 1. Ua na o le Atua e maua ai le filemu.
- 2. E finagalo le Atua ia mafuta faatasi lana fanau.

ASO SA: 23 OKETOPA 2022

MATAUPU: TOFIA MO MALO
(*Appointed over nations*)

SINI: Ia malamalama le vasega, e pule aoao lava le Atua i ana tofiga mo e faia lona finagalo.

TUSI FAITAU: Ieremia 1: 4 – 10

FESOASOANI MO FAIAOGA:

E le i faigofie le i ai o Samoa i lana faiga filifiliga e ala i le faiga palota 2021. O le sailia ma tofia ni sui o le a tula'i mai e faafoe le sa folau o Samoa ma ana upu fai o Malo mo le isi 5 tausaga. O le sailiga ua oia ai le va nonofo. Ua fa'aaoga le atamai faaletagata ae ua le faalagolago i le musumusuga lilo o le Agaga Paia e ala i le filifiliga a tagata o le atunuu. Ua manatu le tagata o tiga, o le mea e patino i le tagata ae leai, o le soifua fa'aaogaina ma le tofiaina e pule ai lava le Atua. Ae o tofiga a le Atua e tulituliloa e ana faamanuiaga ma e auai faatasi ma Ia i mea uma.

O le tofia o Ieremia, o le valaauina ua uma ona tapena e le Atua, lea e ta'ua na ia iloa ia ae le'i i ai i le manava o lona tinā. Na ia faapaiaina fo'i o ia ae le'i fanau mai, na ia tofia fo'i o ia e fai ma Perofeta. O le avea ma Perofeta o se galuega e le faigofie mo Ieremia, auā ua le faigofie le tulaga ua oo i ai Iuta i ia ona po, ona o le pule saua a le malo o Papelonia. O le ala lea o le faatutugata o le Perofeta ona ua popole ma fefe vale. Ae o lagona lava ia faaletagata ua masani ai le ola. E faigata ona tatou onosaia puapuaga o le ola valaauina. Peita'i o le valaauina o lo o i ai faatasi ma le Atua. E le tuulafoa'iina e le Atua i so o se mea, o upu fo'i e tautala i ai le Perofeta, o upu lava mai le fofoga o le Atua. O le uiga lea o le tatou autu o lenei taeao. Tofia mo malo, o le tofiana o Ieremia e ta'ita'i ma tala'i le finagalo o le Atua mo le malo o le Atua.

Mo tatou foi le fanau, e eseese uma lava tofiga e tofofi i ai tatou e le Atua, ia tatou faamalolosi ma onosa'i e le tuulafoa'iina i tatou e le

Atua, ia faia lava mea uma i le loto maualalo ma ia galulue pea ma le mautinoa o tofiga ma le fa'aaogaina o le soifua, o mea lava ua maea tapena e le Atua mo lana fanau faatuatua.

O le faaolataga na afio mai ai Iesu. O le tapenaga ua leva ona sauni e le Atua, na tofia ai e Ia lona lava Alo pele e toatasi ina ia faaola le lalolagi ua pologa ma saisaitia talu le agasala. Na maluu ae na toe tu manumalo mai le oti ma le tuugamau, o lona lava finagalo ia fai ma o tatou tofi le malo o le Atua i le lagi.

GALUEGA FAATINO: Faasoa manatu

Ia faasoa le vaega i le eseese o tofiga faaletagata, ma tofiga faa-le-Atua.

PESE: 146 (Pese ma Viiga)

A'OA'OGA:

1. E pule aoao le Atua i ana tofiga.
2. E silafia e le Atua mea uma.

.....

ASO SA: 30 OKETOPA 2022

MATAUPU: NA VALAAU E AVEA MA TAGATA PAIA
(*Called to be saints*)

TUSI FAITAU: 1 Korinito 1: 1 – 19

FESOASOANI MO FAIAOGA:

O le valaauina o Paulo e avea ma Aposetolo e tala'i le finagalo o le Atua, o se faaitaiga lelei lea o le tagata ua valaau e avea ma tagata paia. Aua a fua i le soifuaga na ola ai Paulo o se tagata sa sili fo'i ona saua i Kerisiano. Peita'i ina ua taia e le malamalama pupula mai o le Atua i le ala i Tamaseko, o iina na valaauina ai loa Paulo

ma avea ai o ia ma tagata paia ina ua talia le Keriso manumalo. O le na Toe Tu manumlo mai le oti ma le tuugamau.

O le tusi a le Aposetolo o Paulo mo le Ekalesia i Korinito, o se tusi faamalosi au mo le Ekalesia. O le Ekalesia ua tupu ma ola, ua toatele fo'i e ua faapaiaina, peita'i ua i ai le faafitauli o lo o tupu i totonu o le lotoifale o le Ekalesia. Ua feeseesea'i tagata, ua faailoga ta'ita'i fo'i tagata o le Ekalesia, ua manatu isi e sili talaiga ma a'oa'oga a le isi i lo le isi, o ia vaivaiga ua foliga ai ua fevaevaea'i le Ekalesia. O le faamoemoe lea o le tusi a le Aposetolo, ia ta'u atu i tagata o le Ekalesia i Korinito, o outou o le Ekalesia ua faapaiaina ia Keriso Iesu, e le tatau ona fevaevaea'i. Ia tasi la latou mau, ia maopoopo ma galulue faatasi. Aua e tasi lava le suafa na papatisoina ai outou, o le suafa o Keriso Iesu. E ui lava la ina eseese tagata o e a'oa'o le talalelei ae tasi lava le faamoemoe o le talia e tagata uma le faaolataga na saunia e Iesu ma ia fealofani le Ekalesia. O le feau faamalosi fo'i a Paulo mo e o lo o tala'i le talalelei, ia soia le taumafai ia viia e tagata ae ia galulue faatasi. E toto e le isi, e faasusu e le tasi ae o le Atua o ia lava na te faatupuina. O lona uiga o a lava faiga faaletagata ae le seanoa ma le mana o le Atua, e le ola ma tupu le Ekalesia. Ua valaau fo'i le Ekalesia e avea ma tagata paia, o lona uiga, ia mulimuli i ala o Iesu, ia fealofani ma mafuta faatasi ma ia tumau le faatuatua.

Mo tatou le fanau, o le avea o i tatou ma Kerisiano, aemaise o le avea ma tama ma teine aoga Aso Sa, e le so tatou loto, ae o le valaau paia a le Atua ina ia ta'u paiaina i tatou. Ia tatou galulue faatasi, ia fealofani ma fefaasoa'i manuia o le Atua.

GALUEGA FAATINO: Tusitusiga

Tusi se solo e fa'aautu i le tatou autu o lenei taeao (**Valaau e avea ma tagata paia**) 2 fuaiupu, 4 laina i le fuaiupu.

PESE: 166 (Pese maViiga)

A'OA'OGA:

1. O le Atua e paia lava ia.

2. E finagalo le Atua ina ta'u paiaina lana fanau.

.....

ASO SA: 6 NOVEMA 2022

MATAUPU: TULĀFONO PO'O LE FAIĀ?
(*Rules or relationship?*)

SINI: Ia malamalama le vaega i le tāua o tulāfono e atagia ai le faiā ma le Atua.

TUSI FAITAU: 1 Korinito 7: 1 – 9

FESOASOANI MO FAIAOGA:

O lo'o molimau le au fai-evagelia, e le'i fa'aleaogaina e Iesu le tulāfono a Mose ma le au perofeta, ae sa Ia fa'alauteleina ma fa'ataunu'uina. E fa'apena fo'i se manatu o lo'o au mai i le tatou matāupu o lenei Aso Sa. E le o fa'aleaogaina le tāua o tulafono i le soifuaga o le tagata, ae ia fai le tulāfono ma ala e fa'aleleia atili ai le faiā o le tagata ma le Atua.

A'o sauni Paulo e tusi le tusi lenei ua tā'ua o le tusi muamua i le Ekalesia i Korinito, e fo'ia ai fa'afitauli ua tutupu i totonu o le aulotu, ae o'o mai fo'i ma lē isi feau mai Korinito, e fesiligia ai le Aposetolo i sana tali e uiga i se manatu ua latou faia; 'A o mea na outou tusi mai ai, e lelei ona lē tago se tagata i se fafine.' (fuaiupu 1). O le uiga o lo latou manatu, e lelei ona nofo to'atasi le tane, e lē tatau fo'i ona fa'aipoipo atu i se fafine. O le tusi faitau la o le tatou matāupu, o le tali lea a Paulo e uiga i lea fesili a kerisiano Korinito. O lo o ia tā'ua ai le mafua'aga e tatau ai ona fa'aipoipo atu le tane i lana āva. 'A ona o le faita'aga,' (fuaiupu 2a). E foliga mai, ua fau e Paulo se tulāfono e tatau ai ona fa'aipoipo (fuaiupu 3-5). O se tulāfono ina ia 'alo ese mai ai le tagata i le agasala o le faita'aga. Auā o le agasala, na te fa'aleaogaina le faiā o le tagata ma lona Atua. E le'o le manatu o le Aposetolo, ia tatau ona fa'aipoipo uma tagata. O lou lava faitalia e fai ai. Ia fai lau filifiliga sa'oloto pe sili ia te oe

ona nofo fua pe fa'aipoipo. A'o le mea tāua, ia iloa ona ola e pei o se tagata ua mae'a fa'aipoipo. E ola mamā, e ola fa'apa'iaina, e alofa. E agalelei (fuaiupu 3), e tasi le loto (fuaiupu 5), e fa'amausalī atili ai lo la faiā ma le Atua. O le tāua lea o le tulafono e pei ona fa'atu e Paulo.

Mo tatou le fanau, e tāua tulafono e lima ta'ita'iina i tatou i se olaga e tonu i le silafaga a le Atua. Ae ia tatou mataala i tulafono eseese ua tumu ai lo tatou lalolagi. Ua lē gata o tulāfono a le Ali'i e ao ona tatou tausia, ae ua i ai fo'i ma tulafono ua fau i mafauauga o le tagata. A tonu tulafono tatou te tausia ma savavali ai, e tumau pea le lelei o lo tatou so'otaga ma le Atua.

Uiga o Upu ma Fuaitau:

- i) tu'ufaitalia - saolotoga,
- ii) mu i le mana'o - agasala ai le loto.

GALUEGA FA'ATINO: Fa'aaliga Manatu

Ia ta'ito'atasi le tamaitiiti ma fa'asoa po'o se mea tatau le nofo to'atasi pe fa'aipoipo fo'i. Aumai ni mau mai le tusi pa'ia e lagolagoina ai le manatu.

PESE: Ua 'ou filifilia, e mulimuli ia Iesu.

A'OA'OGA:

1. Ia tausii i tulafono a le Ali'i e saga fa'aleleia ai pea lo tatou faiā ma Ia.
2. Usita'i i le tulafono ona o le alofa i le Atua, ae lē o le va'aiga a tagata.
3. Fai le filifiliga sa'o.

.....

ASO SA: 13 NOVEMA 2022

MATĀUPU: O LE TINO E TASI (*One body*)

SINI: Ia malamalama le vasega, e eseese taleni ma agava'a, ae tasi lava le fa'amoemoe, ia vi'ia ai le Suafa o Iesu.

TUSI FAITAU: 1 Korinito 12: 12 – 31

FESOASOANI MO FAIAOGA:

O lē tasi lea fa'afitauli i totonu o le Ekalesia i Korinito. Ua fe'ese'esea'i tagata lolotu po'o ai so latou e sili i a latou taleni ma agava'a. A'o taleni ma agava'a o lo'o tā'ua e Paulo, o meaalofa mai le Atua, e pei ona tā'ua i le fuaiupu e 4 i le fuaiupu 11. O lē tasi e potu e tautala i upu i luma o tagata; o lē tasi e i ai le meaalofa o le fa'amālōlō ma'i; o lē tasi o le fai vavega; o lē tasi o le Perofeta ma isi. Ua pa'u le Ekalesia i le vaivaiga o le ola fa'atusatusa, po'o ai e sili atu lona aogā i totonu o le lotu.

O le tusi faitau o le tatou matāupu i lenei Asio Sa, o lo'o aumai ai e Paulo se fofō mo lea fa'afitauli (fuaiupu 12- 31). Ua ia fa'aaogaina ai le ata fa'atusa o le tino o le tagata. E ese le aoga o vae, ese le aoga o lima, ese le aoga o taliga, ese le aoga o mata, i le tino atoa o le tagata. E lē atoatoa le tino pe afai e lē o i ai ni vae, po'o lima po'o mata foi. E ui lava la ina eseese o latou aogā, ae tasi lava le tino. A o'o ina afaina se vaega o le tino, e logo le tino atoa i le tiga.

O le uiga la o le tala a le Aposetolo, o tagata lotu ta'ito'atasi o le aulotu i Korinito, o itu tino ia o Keriso. E tofu lava le tagata ma lana taleni ma ona agava'a mai le Atua, a'o le fa'amoemoe, ia fa'aaogaina mo lana galuega. Tamaiti fai mai Paulo i le fuaiupu 26, *'Pe afai e tīgā lē tasi itu tino, ia tīgā fa'atasi ai itu tino uma lava; pe vi'ia le tasi itu tino, ia olioli fa'atasi atu ai itu tino uma lava.'* O lona uiga, ia tatou galulue fa'atasi ma isi o tatou uso. A tigaina lou uso, ia tatou tigaina fa'atasi, a fai fo'i e lou uso se mea lelei, e ta'uleleia uma ai foi tatou uma. Se a le aoga o a tatou taleni ma agava'a pe'a aunoa ma le alofa? Se a le aoga o le potu ma le

atamai, ae tatou te le fealofani? Afai o meaalofo mai le Atua, ia tatou fa'aaogaina mo lana galuega.

GALUEGA FA'ATINO:

Tu'u le avanoa i tamaiti o le vasega, ia ta'ito'atasi ma tula'i e fa'asoa po'o a ni taleni ma agava'a, o lo'o fa'aaoga mo le galuega a le Atua.

Fa'ata'ita'iga: O le taleni pese. O se tasi o sui o le aufaipese a le lotu. O lo'o ofoina le leo e lagi ai vi'iga o le Atua i ona Sauniga Pa'ia.

PESE: Pese ma Vi'iga 74. (To'atasi le ua sili)

A'OA'OGA:

1. 'Aua le ola fa'atusatusa.
2. E tasi i tatou uma ia Keriso.
3. Ia fa'aaogaina i tatou mo le galuega a le Atua.

.....

ASO SA: 20 NOVEMA 2022

MATAUPU: O LE FEAGAIGA FELANULANUA'I
(*A colourful covenant*)

SINI: Ia malamalama le vasega, i le alofa fa'asoa mai o le Atua i lo tatou ola i aso uma, o lo'o atagia ai le feagaiga felanulanua'i.

TUSI FAITAU: Kenese 9: 8 – 17

FESOASOANI MO LE FAIAOGA:

O le feagaiga felanulanua'i, o lo'o fa'asino tonu i le nuanua na tu'uina mai e le Atua e fai ma fa'ailoga o le feagaiga a le lalolagi ma Ia. O se fa'amanatu i le Atua i lana feagaiga ua osia ma le lalolagi (fuaiupu 16). Ua tatou iloa uma lava, o le nuanua, e tele ona lanu, e felanulanua'i. Lea ua fai ma fa'ailoga o le feagaiga a le Atua ma le lalolagi. O lona felanulanua'i ua fa'amatalaina ai le ituaiga feagaiga e i ai lea feagaiga.

Fai mai o le feagaiga na amata ma afua mai i le Atua. O le mafua'aga lea e le tasi ai se lanu o lona alofa, ae felanulanua'i. E fou i taeao ma aso uma. E saunia fo'i e Ia fa'amanuiaga mo le lalolagi uma. O fa'amanuiaga e felanulanua'i. Ua tele naua. O tagata, atoa ai ma manua uma ua ulufafo mai ma le va'a. O le feagaiga fo'i e le fa'alagolago i le tali mai a le tagata i le Atua. O lona uiga o le feagaiga e fa'avavau. E le tau sa'ilia e le tagata sona lelei i le Atua, pe ne'i masei fo'i le tagata ona muta lea. Leai. E autupulaga. O lo'o atagia ai, o le Atua alofa, o le Atua fa'amagalo, e tu'u avanoa i ona tagata. Fai mai le fuaiupu e 11, '*Ou te fa'atumauina lava la'u feagaiga ma outou, e le toe fa'aumatia lava mea ola uma i le vai o se lolo; e leai fo'i se toe lolo e fa'aumatia ai le lalolagi.*'

O le mea moni tamaiti, o lo'o silafia lelei e le Atua tatou te agasala pea, ae o lona lava alofa tunoa tele, ua le mafai ai ona toe tupu le lolo. Ona o le Atua e tasi feagaiga. A'o le fesili, o le a sa tatou tali i le alofa o le Atua? O le nuanua, o le faailoga ua faailoa mai e le Atua i ona tagata, e inosia e ona fofoga le agasala, e pei ona mafua ai le oo mai o le lolo. E ao ina manatua pea e tagata lona alofa pe a vaai i le nuanua.

Uiga o Upu:

- i) feagaiga - malilie
- ii) autupulaga - e fa'avavau

GALUEGA FA'ATINO:

Fa'amatala e le tamaitiiti le felanulanua'i o le alofa o le Atua ia te ia ma lona olaga a'oa'oina, ina ia iloa ai e le faiaoga, o lo o malamalama le vasega i le matāupu.

PESE: Le alofa o le Atua, pei o se li'o tele.

A'OA'OGA:

1. Ia fai i tatou ma feagaiga felanulanua'i a le Atua.
2. Ia alofa atu i le Atua pei ona mua'i alofa mai.
3. Ia amata mea le Atua i o tatou olaga, ona manuia lea.

.....

ASO SA: 27 NOVEMA 2022

MATAUPU: **IA FAUSIA SE NOFOAGA O
SULUFAIGA** (*Make a Sanctuary*)

SINI: Ia malamalama tamaiti, i se nofoaga poo se vaega e mapu iai pe a oo mai taimi o le lēlava ma le faalogologotiga.

TUSI FAITAU: Esoto 24: 15 – 25: 9

FESOASOANI MO FAIAOGA:

Aisea ua toatele ai tagata sulufai i le lalolagi? E mafua ona o faalavelave matautia e ala i le malolosi o mea o le foafoaga. E mafua foi ona o feeseeseaiga ma taua i le lotoifale lava ia o le atunuu. Ua le maua se saogalemu, ae le gata i lea, ua lamatia le soifua ma le ola, ma ua aiaina le saolotoga o tagata ma le aiatatau e soifua ai i se olaga toamalie ma le sololelei.

O le taunuu mai o le savaliga a tagata Eperu i le auvae mauga o le mauga o Sinai, o le laasaga muamua lea o la latou malaga

faaumiumi agai atu i Kanana. E ui a o le ō a tagata sosola, peitai na maitauina lava le saogalemu. Aua o mea uma ua maea tapena faalelei e le Atua moi latou.

Peitai, e ui i ia tapenaga a le Atua, ae na tauaso pea le vaai a le Isaraelu i le pupula o le Alii o lo o taitaiina i latou. Faimai, e alu alu lava le savaliga tomumu ma faasea i le Atua.

O le taunuu mai la o le savaliga i le auvae mauga o le mauga o Sinai, o se avanoa lelei lea ma le taua ua faia e le Atua e tapenaina ai le lotoifale o le Eperu, e le gata mo le malaga faaauau, ae faapena foi mo lona valaauina, atoa ai la ma le faamautuina o le mafutaga vavalalata ma le Atua e ala i le feagaiga ua osia.

Atonu o le mafuaaga lea o le tusia ma le faamauina e le Atua o ana faatonuga ma ana tulafono i papamaa, ina ia aua lava nei galo, aua nei faanenefu i le vaai ma le faalogo a le tagata, a ia fai ma logo e tagitagi leotele i tami uma ma aso uma, e faamanatu ma faailoa atili mai ai le pupula, le mamalu ma le silisili ese o le Atua, lea o lo o foeliina le malaga a le nuu mo le nofoaga o sulufaiga.

O le tuuina ifo la ia Mose poloaiga uma a le Atua, atoa ai ma le ufitia o le mauga i le ao, ma lona pupula ua pei o se afi maamaai, o le faailoga lea o le faamaoni o le Atua. Na te le tuulafoaiina ai ona tagata, ae afio mai e tautai le malaga ma le savaliga a le nuu ua uma ona folafolaina mai e le Atua 52a i latou.

O lea foi ua tatou taunuu 52a ii toe masina o lenei tausaga, peitai, a tomanatu ma tepa taulai i le ala umi na tatou savalia, O le upu moni, e ofo le loto. Aua foi e le itiiti fita ma faigata, o le anoanoai foi o tiga ma puapuaga, o faalavelave matautia ma faafitauli ogaoga sa luitauina ai le soifua faatuatua o le tagata i le Atua.

Peitai, ua sao ma uli lo tatou faamoemoe ona o le tausiga a le Atua. O lona pupula ma lona malamalama, o le fetu taimalaga lea sa na foeliina la tatou malaga. O le pupula foi lea ua na aumaia le manuia ma le fiafia i le tagata faatuatua ma le faamaoni i le Atua.

O le faaolataga na saunia e Keriso, o le fetu tai malaga lea ua na faasusulu mai le pupula o le Alii, e faamalamalamaina ai le ala e foi atu ai le tagata i le nofoaga mafanafana e mafuta faatasi ma le Atua e ala i le salamo ma le faatuatua faamaoni.

GALUEGA FAATINO: Fefaasoaiga.

E mafai ona faasoa ma tuu le avanoa i tamaiti e fa'aali manatu ai le manatu autu.

Faataitaiga: O le a sau mea aoga o maua mai le faleaoga, malumalu tapuai, fale faigaluega ma totonu lava o le aiga.

PESE: O si malamalama laititi e faasusulu ina pea
(This is the light of mine, I'm gonna let it shine)

A'OA'OGA:

1. Ia tatou tauivi ma auaina i mea lelei uma mo le Atua .
2. O Iesu Keriso, o le nofoaga malolo lea tatou te sulufai i ai.
3. Aua le faavaivai, a ia maua pea le loto tetele, o lo o soifua le Atua.

.....

ASO: 4 TESEMA 2022

MATAUPU: MAI LE FALEIE I LE FALETELE
(From tent to house)

SINI: Ia malamalama tamaiti i le taua o le suia mai le faleie, i le faletele.

TUSI FAITAU: 2 Samuelu 7: 1 – 7

FESOASOANI MO FAIAOGA:

I le faitauga o lenei Aso Sa, o lo o aumai ai se lapataiga ma se valaau i ai tatou, e agai uma i le faletele. Atonu o lo o faapea mai le manatu autu o lenei aso, o le fale e maua ai manuia mai le Atua. Lona uiga o le aumaiga o le atolaau i lona tulaga tuai sa i ai, i se fale lelei ma anagata e teu malu ai. E pei foi ona i ai tala faasolopito

a le au faatuatua, o le fale lea o lo o afio ai le Atua. A o le musumusuga lea a le Atua i lana auaina o Tavita e pei ona i ai le tala, e manaomia se fale e teu ai le atolaau.

I le gasologa o le olaga ma le soifuaga o Isaraelu, o le mea lava e o i ai, e o lava ma siitai le atolaau. Ua leiloa se mea e tuu ai. Le mafuaaga lea o le poloaiga a le Atua ia Natano, e fautuaina ma musumusu ia Tavita ua tatau ma onomea ona vaai lelei se auala e teumalu ai le atolaau, aua talu ona o ese mai Aikupito, o lo o teuina pea i totonu o ie puipui. Lona uiga po o fea lava e agai ai le nuu, e mautinoa o lo o i ai faatasi ma le Atua.

Feau lea mo tatou le fanau, o a ni ou uiga fa'aali ma le faalogogata i ou matua, ua tatau ona sui nei loa. E pei foi ona tatou masani ai i nisi o tala, e leai se isi e tumau ai i lona tamaititi. O a foi ni suiga ua e vaai i le isi tamaititi, ia aoga lena e fai ma luitau mo oe i le lumanai. E le o le mafuaaga foi lea ua manuia ai Samoa le atunuu pele. O matua ma tuua ua lagomau mai tiasa na tauasaina le saolotoga mo tatou, lea ua tatou fiafia ma maua ai se Samoa filemu ma le faatuatua. O Iesu Keriso lava ia na maliu i le satauro mataga, peitai na liliu e le Atua i lona toetu manumalo mai le tuugamau, lea ua tatou maua ai le ola, ma maua atili ai pea.

GALUEGA FAATINO:

Fai se faasoa a tamaiti o le vasega e uiga i le autu, MAI LE FALEIE I LE FALETELE.

PESE: 380 (Pese ma Viiga)

A'OA'OGA:

1. O lo o ia i tatou le Atua.
2. Faamoemoe i le Atua e ala i le tatalo.
3. E suia e le Atua o tatou tagata.

.....

ASO SA: 11 TESEMA 2022

MATAUPU: O LE A AFIO MAI LE ALII I LE MALUMALU
(*The Lord Will Come To His Temple*)

SINI: Ia malamalama tamaiti, i tapenaga ma sauniuniga aua le faatalitaliga o le Afio mai o le Alii i lona malumalu.

TUSI FAITAU: Malaki 3: 1 – 4

FESOASOANI MO FAIAOGA:

O malaga asiasi ma malaga tafafao a ē maualuluga ma aloaia o se atunuu, o malaga ia e matuā tapena lelei le faataliga, o mea lelei ma faaaloaloga maualuluga e fai i ai. O le malu puipuaia foi o le saogalemu, e maoae lona faatinoina. E le mafai, le mafai ona soona faia se mea. O ai foi e fia feiloai i le malaga, e tatau lava ona uia ala ua maea faatulagaina. E pei o lo o faapea mai le manatu autu o lenei aso, ua tatau ona tatou tapena ma sauniuni, *o le a afio mai le Alii.*

O le vaega o le mataupu lenei na faitauina, o le valoaga i le afio mai o le Alii. O le molimau a le tusitala o Malaki, o se molimau uiga ese lava lenei i lona mamalu ma le taua i le vaai atoa ai foi ma le faalogona a tagata faatuatua. O le fa’aaogaina ai e Malaki o lenei savali i tagata, o le Alii e afio mai le loto maualalo, o le faailoga o le filemu ma le agamalu.

O le afio mai o Keriso, o le fa’aali mai lea e le Atua i le fanau a tagata le nofoaga malolo e to’a i ai le tagata, e sulufai i ai lē ua puapuagatia ma lē ua mafatia.

Ua faailoa mai foi e le Perofeta, o le Alii e afio mai, ua lē manatu lava e amo lona tulaga Atua, a ua faaitiiti teisi ifo lava ina ia o faatasi ma le tagata. O le Alii e afio i lalo i le mea e i ai tagata, ae le o le tietie mai le mea maualuga, aua foi na te le iloa ai foliga o ona tagata. Le faatauaina lea o le tagata i lona finagalo, lea ua ala ai le

pepese ma alalaga, *Osana! Ia manuia le afio mai le suafa o le Alii.*

Ioe, e le mafai, le mafai ona fofoina le faafitauli o Ierusalem, pe afai e le oo i ai Iesu Keriso. Pe afai e le tu laueleele i ai le Tupu o le Malo. O le afio mai la o le Alii, o le sau lea e tapena ma faatino le saolotoga mo le malumalu o tagata agasala. O le malaga faa-tupu a Iesu, o le malaga o le faaolataga, o le malaga laveai, o le malaga faaola agaga.

E ao foi ona faapena i tatou, ua alagataua ona tatou faamanu i le suafa o le Alii. Ia tatou lagonaina le taua o le agaga faafetai i galuega ua maea tapena e le tupu o le a afio mai ma ua afio mai.

O le afio mai la o Keriso, o lona sau lea sei toe tapena faafafine toaga le malumalu na saunia e le Atua, lea ua fai nei ma faatafuga ma nofoaga pefua ua lilofia ma leiloa ai le tagata.

O lona afio mai foi lea sei faailoa mai i le lalolagi, o Ia lava o le Tupu, o le Tupu e galue, o le Tupu e auauna, o le Tupu e afio i le malumalu. E pei ona ofoina mai ai lona soifua atoatoa ma ia saunia ai le taulaga e sili ona lelei ma atoatoa, ina ia le fano se tasi e faatuatua ia te Ia, a ia maua e ia le ola e faavavau.

GALUEGA FAATINO: TALIGA FESILI

1. O ai lenei perofeta o Malaki?
2. “.....e faafuasei foi ona oo mai I lona malumalu o le Alii, o le ua sailia e outou, o le Agelu lava lena o le feagaiga, o le ua outou naunau iai...” O ai oloo faatatau i ai lenei faaupuga?
3. O fea o afio ai le Alii ia te oe?

PESE: E Alofa Iesu ia te a’u (*God loves me*)

A’OA’OGA:

1. Ia faafetai i le Alii e le aunoa.
2. Tapenapena, o le a afio mai Iesu.

.....

ASO SA: 18 TESEMA 2022

MATĀUPU: O LOU AUAI FA'ALAU'ITELE
(Public presence)

SINI: 'Auai i faapotopotoga e te iloa o lo o faaolaina ai agaga o tagata mo le Alii.

TUSI FAITAU: Galuega 2: 37 – 47

FESOASOANI MO FAIĀ'OGA:

O le Evagelia a Ioane 14:15-17, o le tautoga lena a Iesu na fai i ona au so'o ae lei afio atu i luga i le lagi e nofo i le itu taumatau o lona Tamā. O le Agaga Paia o le a afio mai ma 'auai ia te i latou i Ierusalemā.

O lea ua faamatalaina e Luka, i le tusi a Galuega a le au Aposetolo, le taunuuga o lea tautoga a Iesu.

O le a le mea ta'u o le Agaga Paia? O le Agaga 'auai lea o Iesu, i loto ma agaga o tagata o lo o taliaina o Ia. O le agaga e faama'ite ai mea lelei uma e faia e le tagata ua avea ma tagata fou. O le Agaga e na te faalototeleina ma faamalosiā le tagata ia tumau i le Agaga Paia o le Atua (faitau le Kalatia 5:22).

Afai ua malamalama ma lagonaina e le tagata le pa'i mai o le Agaga o le Atua ia te ia, e tatau foi ona lagonaina le 'auai i potopotoga uma e fai a le ekalesia. Tusa lava pe e te lei ekalesia, 'auai pea. E maua ai mafauauga lelei mo le atinaeina o le tino o Keriso. E i'u lava, ona e lagonaina le fia avea ma tagata ua faa-ekalesiaina.

Ia 'auai i potopotoga o lo o e silafia, e faaola ai agaga o tagata mo le Alii. O polokalame o lo o taumafai, e fafaga tagata matitiva, o mafutaga tatalo, o le fesoasoani i tagata e lima vaivai, ma soo se mea lava o loo faia i lenei taimi, e faaeaeaina ai le suafa o le Alii.

Ua toatele tupulaga i nei aso, ua 'auai i tuinauga o le tino. E pei o inuga. Fiafia ma onana ai i le aso atoa. E le o se finagalo lea a le Atua, i tagata ua avea ma fanau o le faaolataga. *Be present in*

programs that you know that will promote a good cause for the glory of God.

GALUEGA FA'ATINO: Taligā Fesili

1. O le a le uiga o le Agaga Paia ia te oe?
2. O le a le fesootaiga o le tusi faitau ma le Ekalesia?
3. O le a foi se feau tāua mo tupulaga talavou?

PESE: O mai outou uma *O come all ye faithful*

A'OA'OGA:

1. Ia e tatalo e le aunoa. Ona e lagona lea o le pa'i o le Atua ia te oe.
2. Ia e 'auai i so o se polokalame e fai, o lo o faaolaina agaga o tagata. Totonu o le Ekalesia, ma so o se faalapotopotoga lava.
3. Ia faamuamua le Atua i mea uma. 'Aua le naunau le loto i tuinauga o le ola nei. Aua o le Atua o le agaga, e leai se tino.

.....

ASO SA: 25 TESEMA 2022

MATĀUPU: O LE ATUA UA IA I TATOU, I O TATOU TUAOI MA TUA ATU. (*God with us, also in the periphery and beyond*)

SINI: O le Atua, e 'auai i soo se mea.

TUSI FAITAU: Mataio 1: 18 – 25

FESOASOANI MO FAIĀ’OGA:

O le uiga lena o le igoa Emanuelu – O le Atua ua ia i tatou. O le Atua na liutino tagata. Na afio mai e laveai tagata o le lalolagi ona o le agasala.

O le soifua ofoina o le Atua e ala i lona Alo pele o Iesu Keriso, o se faataitaiga lea mo tagata uma ua talia Iesu i lona loto. O ana a’oa’oga o le alofa ma le fefa’amagaloa’i. O le loto mauualalo ma le onosai i fita ma tiga o le ola. Faapea foi ma le fesoasoani i tagata ua puapuagatia, ma i latou ua faasauaina.

O ala uma nei e faatino e le Kerisiano faamaoni, e iloa ai ua i a te ia le Atua. E iloa ai foi le ituaiga Atua o lo o tapuai i ai.

E le o se Atua e alofa faapito. O le Atua mo tagata uma. E le faapea a ua e iloa le Atua, o lona uiga, ua na o oe e alofa i ai le Atua. E i ai foi le alofa o le Atua i tagata agasala. O tagata e lei oo ai le malamalama o Keriso. Ae o le matafaioi lena o le Kerisiano. Ia tulei pea le malamalama ia i latou e lei sulugia o latou loto ma agaga i le Tala Lelei.

O le Atua e ‘auai i so o se mea. O lau nofo, tu, savali, ma le tautala. Afai e te nofo, ma tu, savali ma tautala i mea faalelalolagi, o lona uiga, o tuinauga o le tino o lo o e faamuamua. Afai o e nofo, tu, savali ma tautala i ala o le Alii, o lona uiga, ua ia te oe le Alii.

E le gata o le lalolagi lenei o lo o i ai le Atua, e i ai foi le Atua i tua atu o le olaga nei. Auā o ia o le Atua Silisili ese na faia mea uma lava.

Afai ua ia te oe le Alii, e le tatau ona e fefe i mea o le olaga nei. E le tatau foi ona e fefe i le oti. Auā, o le taulaga ola na saunia e Iesu i lona maliu ma lona Toe Tu, ua faatoilaloina ai e ia o mea faigata uma ma mea fefefe ai tagata i le ola nei. Ina ia tumau le faatuatua ma le ola mausali i le ola e faavavau.

GALUEGA FA’ATINO:

1. Ia liliu i lou uso o lo o i ou autafa, ma faatalofa i ai, ma fai se tatalo puupuu mo ia.

2. Fa’aiu le vasega i se tatalo a le faiaoga. Ia manatua i latou o loo puapuagatia ma faasauaina. Manatua i talosaga i latou ua le mafai ona fiafia ma olioli i le faamanatuina o le aso soifua a le Alii o Iesu Keriso. Ma ia ulu atu le mana o le Atua ia i latou e le o taliaina le Tala Lelei.

PESE: Ia manuia le Kerisimasi ma le Tausaga Fou. *We wish you a Merry Christmas and a Happy New Year*

A’OA’OGA:

1. ‘Aua nei masalosalo se tasi i le Atua.
2. O le Atua e auai soo se mea.
3. E iloa foi e le Atua au galuega o lo o fai i luma o tagata, faapea foi i le mea lilo.

.....

MANUIA LE KERISIMASI MA LE TAUSAGA FOU